

Mateu Deuxu Rybe Wihikỹ Tỹmyra, Mateu Tyyritidỹỹdu

¹ Kaheka Jesuisi Kristu labiehekỹ rare. Juhuu tahe Abraõ heka Davi labiehekỹ rare. Iribi tahe Davi heka Jesuisi Kristu labiehekỹ rare.

² Ibutumy ilabiebohonimy arelyykre. Juhuu tybynimy arelyykre idi iriòrenimy: Abraõ, Ijai, Ijaò, ³ Juda, Peresi, (Peresi seriòre tahe Zera inire. Isereny tahe Tamara inire.) Esraõ, ⁴ Araõ, Aminadabe, Nasaõ, Salmaõ, ⁵ Boasi, (Raabe, Boasise rare.) Obede, Rute, Ijese, Kie.

⁶ Davi hãwyy heka Uria hãwyy juhUU raremyhỹ. Iribi Davi-wana roire. Salomaõ iriòre rare. Tii heka Roaboã tyby rare. ⁷ Idi Abia reare. ⁸ Idi Asa, Josafa, Joraõ, ⁹ Uzia, Jõtaõ, Aka, Ezekia, ¹⁰ Ezekia, Manase, Amo, ¹¹ Josia, Jekonia, taseriòre-wana.

¹² Babilonia-ribi rohonyreu tahe tiiboho reare, Jekonia riòre wahe: Salatieli (Tii Babilonia-ki reare.) Zorobabe, ¹³ Abiude, Eliaki, Azo, ¹⁴ Sadòki, Aki, Eliude, ¹⁵ Eliaza, Matỹ, Ijaò, ¹⁶ Ijaò tahe Jyje tyby rare, Jyje tahe Marie hãbu. Jesuisi tahe Kristu Deuxu deòdỹỹna rare.

¹⁷ Kia labiehekỹ sõwe tahe 14my rare, Abraõ-ribi Davi-ò wahe. Tule labieboho 14my rasõwerenyre Davi-ribi Babilonia hãwã-ò ridyreny ixideewimy aõkõ ròte-ò. Ixyby 14my rasõwerenyre. Iribi tahe Jesuisi reare.

¹⁸ Kawese heka Jesuisi Kristu reare. Juhuu Marie Jyje-wana roikremy rare. Tii ijadõmaule

tahe Deuxu Tyytybytyhy ribòtònyre. ¹⁹ Jyje hābu òbiti rare. Tai tahe riixãwididỹnykemy rōhõtynyre. Kia òmo-ò rarybeõlere tuu. ²⁰ Kiau ýju tamy rarybere tarasina-ki: —Jyje, Davi riòre riòre. Ahāwyy, Marie, biteònyõke. Tuu bexihāwyynykre. Iriòre dori Deuxu Tyytybytyhy riòre rare. ²¹ Jesusimy raninykre. Kiani tahe irybereny rare: tarasadu. Ibutumy iny dori iòraruna-ribi ritakre.

²² Iwese Deuxu rybe ihetxiu rarybere wese tahe tii wiji riwinyre. Kia wese ihetxiu rybe rare:

²³ —Ijadòma rabòtònykre. Iriòreni heka Emanueli rarekre.

Kiani tahe irybe-ki kia rare:

Deuxu iny-wana ratxireri.

²⁴ Iribi tahe Jyje dexixade tarasina-ribi. Iwese Inynyrỹreny tuu tamy rarybere wesemy heka tii riwinyre. Tii-wana ratxiòre. Tii aõhe risỹnyõre.

²⁵ Uladu reare xiery tii aõhe rira. Tamy niõ riwahinyre, Jesusi wahe.

2

¹ Belē hāwã-ki Jesusi reare, Judeia bedeki wahe. Iòlò Herodi iòlòmy raremyhỹ. Iu reareu, Hābu Erytyhy mahādu taina tỹmyramy robirenyre. Tai tahe iòlò mahāduõ doidenyde biura-ribi Jerusalē hāwã-ò. ² Tiiboho rỹraxyrenyde: —Iule judeu mahādu iòlò aõbo kaki reare. Jiarỹboho itainamy rabirenyre tahe nadoidenyde riwowydynyrenykemy. Kaiboho teertytenyte aõbo titxibo ratxireri?

³ Tahe inyõ Herodiko relyyrenyde. Herodi kia roholareu sōwemy riòtiinyre. Tule ibutumy Jerusalē hāwã mahādu riòtiinyrenyde. ⁴ Tahe

Herodi ibutumy dinodu mahãdu ributunyre: Xiwena wahidyũdu dinodu, bede ywina tyyriti erydu mahãdu tule. Tahe tamyreny rỹrãxire: —Titxibo Kristu reakemy timybo tyyriti-ki ròritidyũmy roire? ⁵ Tiiboho tamy rarybere: —Judeia bedeki, Belẽ hãwã-ki wahe. Kia tahe ihetxiu rybedu riritinyre.

⁶ —Kai Belẽ hãwã mahãdu. Judeia bede hãwãõ. Kai hãwã yja iny rõhõtinyre. Tahe inatyhy aõkõ rare. Kai hãwã nihikỹre. Aribi dori dinoduõ ròhònykre. Wamahãdu iòlòmny ronykre. Idinodumy rarekre, judeu mahãdu dinodu wahe.

⁷ Tahe Herodi heka biura mahãdu ributunyre ibutumy iny-ribi wasimny. Tamy rỹrãxire: —Tiutxubo taina ròhònyre? Tahe rirawyònyre.

⁸ Tamyreny rarybere: —Kaiboho boibenyke Belẽ hãwã-ò. Idi tahe uladu-ki mahabenykre. Iu wadee manarybebedenykre. Jiarỹ tule tamy arakre ariwowydynykre. ⁹ Biura Hãbu Erytyhy mahãdu roholarenyre. Tahe roirenyre. Ryki ixityre tainamy robirenyre. Uladu tyrehekỹle ritoosònyre. ¹⁰ Iu tahe sòwemy reysarenyre.

¹¹ Heto-ò rehemynyre. Tahe ralorenyre. Uladu rare Marie-wana. Tahe tatiowotimny reserenyre riwowydynykemy. Isareny riraynyre tamy riwahinykemy: womati tỹrỹrỹhỹkỹ, hee aderòna, aderònatyhy wana. ¹² Idi tahe Biura Hãbu Erytyhy mahãdu rarasinyre. Deuxu tamy rarybere: —Kaiboho Herodi-ò bòðsebenyõke. Tai tahe rywixira-di tasubedereny-ò ròðserenyre.

¹³ Biura mahãdu tahe ròireny rahudi tahe Inynyrỹ ýju nade Jyje-ò rybemy, irasina-ki tamy

rarybere: —Ariòre, ise-wana bidyke Egito bede-ò. Herodi dori uladu rubudỹỹmy ratxireri. Adee tiu ararybekreule kaò bòdòòseke. ¹⁴ Tai Jyjeboho rummy rahenyrenyre Egito bede-ò. ¹⁵ Herodi rubusỹtybymy tahe dòòsedenyde. Tii riwinyre iwese ihetxiu tyyriti rarybere wese, Deuxu rybedu rybe wahe:

—Wariòre Egito bede-ribi nadidyde.

¹⁶ Herodi reburere. Biura Hābu Erytyhy mahādu dori tii riitxenanyre. Tai ibutummy uladu rirubunyre Belē hāwā-ki, tule ijō iòhò hāwā-ki. Ibutummy howỹtòdu rirubunyre inataō beòra ijōdikiki tahe rirubunyōre. Tai Jesuisi rirubunykemy risỹnyre, iwese tii rareu Biura Hābu Erytyhy mahādu tamy rarybere. ¹⁷ Kiamy ta rỹire iwese Deuxu rybedu rarybere wese, Jeremia wahe:

¹⁸ —Rama hāwā-ribi ibru-ò iny roholamyhỹre. Rakeli rare. Tii robumyhỹre. Ibutummy iriòre ituere. Tai robumyhỹre. Inyō riteysanyōtyhy iriòre rurureki.

¹⁹ Herodi tahe rurureu, Inynyrỹ ȳju heka Jyje rasina-ki tamy nade. ²⁰ Tamy rarybere: — Bòòsebenyke judeu bede-ò. Uladu ise-wana bidyke. Kia rirubunykemy risỹnymyhỹré tahe, rurure.

²¹ Tahe Jyjeboho ròirenyre judeu bede-ò. ²² Akelau tahe Herodi ròire ronyre iòlòm̄y, tyby deròwmy. Tai kowa-ò Jyje ròirenyōre sỹmy. Rasina-ki rybeō rieryre Kalileia-ò ròirenykemy. Tai tahe ròirenyre kowa-ò. ²³ Nazare hāwā-ki rasỹnyrenyre. Kia tahe riwinyre iwese Inynyrỹ rybedu ihetxiu rarybere wese: —Nazare ludu tii rarekre.

3

¹ Kiau Judeia bederahy-ki Joaõ Sebedỹỹdu heka iny-ò rarybemyhỹre: ² –Deuxu Iòlòna bededỹỹnana iòhòmy ratxireri. Aòraruna-ribi biixãwibenyke, bexirãhĩke! ³ Joaõmy heka Isaia ihetxiu riritinyre kawese:

Inyõ bederahy-ki ryryreri: –Inynyrỹ dee ryòbiti biwinyke. Biywinyke ryõ tamy kanakemy. ⁴ Joaõ kamelo radetyy ityy rare. Iròdutyy iwereysanare. Seihikỹle bidi-wana irỹsỹna rare. ⁵ Ibutumy iny tamy ròirenyre irybe-ò roholakemy iòhò hãwã-ribi, Jerusalẽ, Judeia, Jordaõ bero-ribi wahe. ⁶ Tamy òrarunamy relyyrenyke rabadewomy tamy relyyrenyke. Tai tahe Joaõ heka bero Jordaõ-ki tii riratysebenyke. ⁷ Fariseu mahãdu, saduseu mahãdu doide tamy riratysebenyke. Kiau Joaõ tamyreny rarybere: –Hemylala mahãdu! Deuxu aõhõkỹmydỹỹnana-ribi mahenybenyõtyhy. Aõhe inatyhy? ⁸ Juhuu aõwiihikỹ widỹỹna biwinybeny. Tai tahe iny rierykre kaiboho aòraru-ribi inatyhymy texihutenyke. ⁹ Fariseu mahãdu, kaiboho tahõtintytenyke: Abraõ heka inylabiehekỹreny rare. Rikirãhĩõtyhy. Deuxu-ò kia aõ aõkõ rare. Tamy wikeki mana-ribi Deuxu heka Abraõ riòkòreõ riwinykre. ¹⁰ Woma tahe òwòru-ribi iòhòmy rỹira. Òwòru bederaty wiwihikỹ ihoõkeki, kedesekre. Rasõkre. Woma heka Deuxu aõhõkỹmydỹỹnana wese rare. ¹¹ Jiarỹ bedi araratisebedỹỹnyra

aòraruna-ribi texirãhĩteki. Jesuisi tahe Deuxu Tyytybytyhy-di ròratisebedỹỹkre heòty-wana riratysebenykre. Tii waratyre awityhymy ratxireri. Jiarỹ riwaixỹrunymy watxireri iwa ariwykeki. ¹² Tii maixõmo risykre. Maixõmo ributunyre tahyna-ò. Irỹnysi heòty-di riworonykre. Heòty itueõna heka rare.

¹³ Idi tahe Kalileia bede-ribi Jesuisi nade bero Jordaõ-ò. Tii Joaõ-ò nade riratysebenykre.

¹⁴ Joaõ aõkõmy rarybere: –Jiarỹ tahe aõ aõkõ rare. Kai biwaratysebenyke. ¹⁵ Jesuisi tahe tamy rarybere: –Deuxu deewina heka kia rare. Rikiwinykre. Tahe Joaõ riratisebedyỹre.

¹⁶ Ròratisebenymy rahudi tahe Jesuisi ròtuõra. Biuwetyy rarayre Jesuisi tahe bòtòenimy robire, itxi dobehede, Deuxu Tyytybytyhy wahe. Rybeõ biu-ribi narybede: ¹⁷ –Kia heka Wariòre rare. Jiarỹ heka sòwemy tukure. Idi wadeysareri.

4

¹ Idi tahe Deuxu Tyytybytyhy heka Jesuisi ridyre bederahy-ò. Tai Satanasi riurihikemy tamy rehemynyre. ² Jesuisi heka 40 txumy, 40 rumy heka aõ rirỹsỹõhyhyy bede idi rỹire. Sòwemy heka rama risamy tai raremyhỹ. ³ Taile Satanasi tamy nade. Tahe iurihiximy tamy rarybere:

–Kai inatyhy Deuxu Riòre ahãte wana heka mana-di orotxumy biwitxiranymy biwinyke ahinamy.

⁴ Tahe Jesuisi dirawyònyde: Deuxu Ritidyỹna-ki kiamy roire: –Iny heka orotxudile aõkõ irumy rỹirakre. Ibutumy Deuxu rybedile iny irumy

rỹirakre. ⁵ Idi Satanasi heka Jesuisi ridyre Jerusalẽ hãwã-ò. Templo heto ratyre tahe ritidire.

⁶ Tahe tamy rarybere:

—Kai inatyhy Deuxu Riòre ahãte wana heka katyre-ribi ixi-di behukre bede-ò. Buruõtyhy heka besekeki. Deuxu taỹju kiditeònykre aramykemy. Bede-ò aõkõ bešeke.

Ijõ tyyriti rarybere:

—Deuxu araywinykre taỹju-di. Tii ýju kiditeònykre tebò-di ariijekemy. Awa ritõmonyõtyhy manatyre-ki.

⁷ Jesuisi rirawyònyre: —Tyyriti tule rarybere:

—Deuxu uritere biurihiõke.

⁸ Iribi Diabo heka Jesuisi ridyre hãwãlõ-ò. Tamy ibutumy bede iòlõna riteòsinyre. ⁹ Tahe tamy Satanasi rarybere: —Beseke atiwotimy tahe biwawowydynykeki, adee kia ibutumy iòlõna wiwihikỹ ariwahinykre. ¹⁰ —Make Satanasi, Jesuisi rarybere: —Tyyriti rarybere:

—Deuxu-ò sohojile deàlana, wowydyna biwahinyke. Tiile bityhynykre. Deòdu tamy sohojile mabeke.

¹¹ Satanasi tahe Jesuisi-ribi rexitare. Ýju mahãdu rehemynyre iyrubudỹỹmy.

¹² Joaõ òludu heka ròtenawo-ki ritidira. Kia Jesuisi roholareu, Kalileia bede-ò ròòsere.

¹³ Nazare-ribi rare Kafanaõ hãwã-ki rasỹnykremy rare. Tii aho-ki iòhòre, Kalileia aho wahe. Zebulõ bede, Natali bede tahe inatxi hãwã ibiòwa rare.

¹⁴ Kia tahe Isaia Tyyriti rarybere wese:

¹⁵ —Zebulõ bede, Natali bede, Jordaõ bero kowawe-ribi ijà-ò. Ahohokỹry-ki. Kai

judeukõdu mahãdu bede rare, Kalileia wahe.

¹⁶ Iny kowasỹ mahãdu bede luru-ki rasỹnymyhỹre. Tahe tiiboho loosõnahakỹmy robirenyre. Bede lurusỹ mahãdu-ki tahe Deuxu loosõna ritoosõnyre.

¹⁷ Iribi tahe Jesuisi ritelenyre Deuxu rybe ritỹnynekemy. Tii rarybere: —Aòraruna-ribi bexiràhĩke. Deuxu Iòlõna bededỹynana dori iòhõmy ratxireri.

¹⁸ Kalileia aho ijàti-ki Jesuisi rariamy ratximyhỹ. Tahe inatxi waxidu seriòremy robire, Simaõ Pedro, tule Andre ijõre. Rià-di utura rimymyhỹreny.

¹⁹ Jesuisi tamyreny rarybere: —Bodoike wahemy. Iny wadee bimykre. Iwese araerynanykremy bimyke. ²⁰ Aõwesele tahe tarià ririrenyre. Jesuisi-wana roirenyre. ²¹ Roirenyre tahe inatxi ijõ seriòre-ki Jesuisi robire. Txiau ijõni rare. Joaõ ijõre. Tiiboho Zebedeu riòre roire. Tiiboho talawo-ki ronyrenyri rià riywinyrenymy. Jesuisi tamyreny rarybere: —Wahemy bòdòike. ²² Tai tahe tybyreny ririrenyre. Jesuisi hemy ròirenyre.

²³ Ibutumy Kalileia bedey-ki Jesuisi rariamyhỹre. Tii judeu dohodỹyna heto-ki rarybemyhỹre. Deuxu Iòlõnamy ritỹnynymyhỹre, Rybe Wihikỹ Tỹmyra wahe. Sõwemy webinadu mahãdu riteytenyri. ²⁴ Jesusimy iny relyyre ibutumy hãwã hãwã-ki Siria bede ibutumy. Tai tahe sõwemy webinadu mahãdu didydenyde tamy, iny tyytybybina-di, iny iumy imyremyrehekỹ wahe. Jesuisi ibutumy iny riteytenyri. ²⁵ Iny sõwehekỹ riheludunyri, Kalileia bede-ribi,

Debòwiò hãwã-ribi, Jerusalẽ-ribi, Judeia bede-ribi,
tule Jordaõ bero kowa-ribi.

5

¹⁻² Jesuisi inomy sõwemy robireu, raòwònyre hãwãlò ratya-ò, Ierydỹna mahãdu tamy doidenyde. Taile rierynadỹnomy rononymhỹre.

³ Deuxuko-ki iny ibinamy rỹimyhỹre. Kia iny tuu rexierymyhỹre, teysatyhy rare. Tii deysana sõwemy tai ratximyhỹre, Deuxu Iòlòna heka ihõrõrenomy rarekre.

⁴ Robumy rỹirakeki teysamy heka rỹirakre. Ibede-wona wiòhedỹna rybe-di heka tamy kanakre.

⁵ Kia inytyhy-di widee ratxireri, tii heka teysahyyemy ratximyhỹre. Ibutumy heka iny ihõrõlehekỹle rỹirakre. Bede bede heka ihõrõmy rarekre teysamy rarekre.

⁶ Inyõ-ò òbitinamy lobiximy rurukeki tahe teysamy rarekre. Deuxu tamy òbitina riwahinykre.

⁷ Inyõ ruxetòena-di ratxireri. Deuxu heka tamy ruxetòena-di rarekre.

⁸ Inyõ irayky òbitimy ratxikeki tii heka teysamy rarekre. Tii dori Deuxumy robikre.

⁹ Inyõ ywina-di wiwana rỹirake teysamy rarekre. Ywinaõ-di rarekré, teysamy rarekre. Tii dori rarinikre: Deuxu riòremy.

¹⁰ Inyõ aõhõkỹmy dỹỹnana reuròkeki, tii dori òbitimy rurukeki, tii tulesỹ teysamy rarekre. Deuxu Iòlòna dori ihõrõmy rarekre. ¹¹⁻¹² Inyõ umyreny relyykeki uritere hekỹle. Ruirybe-di umyreny relyykeki, aõhõkỹmydỹỹnana adee riwahinykre wana, tai tahe beysakre. Awimy

mohõtinykre. Kai dori biu-ò mahenykre. Tai tahe beysakre kai awimy nohõtikyre. Uritere nohõti rosarenyõmy. Kia wese tule Deuxu rybemy rybedu aõhõkõmy rotõnyre. ¹³ Kaiboho heka saawesemy atximahãtenyte, jyyra wesemy wahe bede mahãdu iny-ò, kai dori kiamy bede mahãdu tewiõhenanyte. Auri tahe urihimyò biõnonykeki tahe aurihixina heka urihimyòlemy releke. Kaa jyyra urile idi adehu rõikyre iny ityre rariakremy. Awiõhedõnyta biõnonykeki tahe aõma aõkõ beleke. ¹⁴⁻¹⁵ Kai loosõna wesemy atximahãte kabede mahãdu iny-ò. Hãwãõ hãwãlò ratyy-ki roikeki, tiu heka rexiwõõtyhy itõnyhy roimyhõke. Loosõnaõ iny ritoosõnykeki, tule heka tiu heka hyna rawoõ-ki roiõtyhy roosõmy. Aõma roosõnanyhyre ibutu heto jurajuramy heka ibutu ritxuxanyhyre. Aõma tamana-ki rõimyhõreki wahe. ¹⁶ Kaiboho tule amahãdureny awiwihikõmy robikeki tahe Deuxu-ò wowydyna riwahinykre.

¹⁷ Jiarõ heka anaõde bede ywina tuededõny. Anade aõ Deuxu dee rybedu tuededõny aõkõ heka anade. Anade ibutomy aõmybo rarybere widõny. Timybo rarybere wese heka ibutomy tuu rotõnyrarekre. ¹⁸ Inatyhymy adeereny ararybekre bede ywina tyyritiy-ribi tiu ijõ iõõtyhy ijõ sohoji ritiwedena yreõ reseõhykre. Ibutomy roikre aõhebo rotõnyhyreò bede konanako-txi. ¹⁹ Inyõ tõhõti urihimyò bede ywina rosakeki rexidelenymyhõre iny ribedeerynyõkemy iny ritohonyõmyhõkemy. Hãbu tahe iyjamy Deuxuko-ò rarekre, Deuxuko-txi. Inyõ rityhynymyhõre irybe

iny rybedeerynynmyhÿre. Tii tahe Deuxu Iòlòna-ò nihikÿmy rarekre. ²⁰ Kaiboho aõma fariseu mahãdu-ribi awityhymy ix-di mohõtynybenykeki. Tiu heka Deuxu Iòlòna-ò aròterenyõmy. Kaiboho heka awi toite aõma fariseu mahãdu judeu mahãdu wedu ratyre heka awi boibeke. Kia aõkõkeki tahe malòbenyõtyhy.

²¹ Ihetxiu bede ywina Tyyriti kawesemy rare:

—Kai inyõ birubunykeki heka iòwynamy iny akanarubunye. Kia heka bede ywina heka rare.

²² Tahe warybe urihimyò iwitxira bede ywina-ribi. Kai inyõ-ò maraykynykeki. Tai tahe brebunahakÿ-ki tate. Abiòwa-ò bininikeki itxÿtemy. Tamy kai marybekeki: —Kai aõki awiõre. Tai tahe akÿnadykre heka aõma ywisidÿÿduko-ò araòwynykre. Inyõ-ò kai makyaranynykeki kai brebuna-ki texilòromy tate. Kai inyõ deramy mabekeki uriteremy nodu tamy marybekeki, tai brebuna-ki tate. Inyõ òsÿny aradykre wisidÿÿdu mahãdu-ò. Inydee ratyhymy mabeke wana aõkõ raremy marybekeki, heòty kònana bede-ò make lau brebuna-ki tate. Iòhãrure kai heòty bede-ò makemy. ²³ Kaki aõma nieru xiwena wahidÿÿna-ò behemynykeki inyõ-wana aõhe widee botÿÿnykeki òhõti rosaõlemy ahãte wana. ²⁴ Deuxu heka axiwena tewahinyõhyymyhyte aõma xiwena bire-ki heka birike. Tahe biijeke aseriòre juhUU. Aõma wana biòbitynybenyke widee marybebenyke. Iribi tahe tamy bedehemynyke xiwena wahidÿÿna-ò wahe tadevenymy atximahãte wana hãbuõ-ò. ²⁵ Aõma tai tahe iòraru-ki aòludumy relera wana. Tamy behemynyke aõma timybo tii-wana

widi biywinykemy timybo adeva biòwinykemy tamy heka bitobiny òrale heka aõma rieryke urenana. Aradyhemy aõma ywisidỹỹna ube-ò, idi ywisidỹỹna mahãdu, idi soldado. Tai tahe bitobinyke bede rierykemy. ²⁶ Inatyhy heka adee ararybekre ròtenawo-ki malòkeki. Tiu heka aòlòkòmý aõma iòwy mahumy adi ròhõtinkyre. Idi mohõtinyke xiery heka bòhònýke.

²⁷ Juhuu ihetxiu heka kaweselemy Tyyriti-ki rarybere:

—Òtaõmy!

(Bede ywina tyyriti-ki wahe.) Kawesemy heka jiarỹ rebedeerynywãhãre. ²⁸ Òtamy ròhõtinkyeki hãwyy-ò retehekeki òtamy rexinohõtinkyeki. Tai heka tii òta òraru riwinymyhỹre. Iwese iwitxira hãwyy-wana roireri yrubule taheka òta òraru riwinymyhỹre. ²⁹ Arueõ òraruna-txi araatykeki, bitake. Awityhymy biu-ki malòke kawesekile heka awire, Deususỹ-ò malòke wahe. Arue wiòmý tahe awiõmy biu-txi arue yremy heòty bede-ò make tahe ibinatyhyre. ³⁰ Tule eraõ bitake iurelemy era-di make biu-txi. Aumy ibutuhukỹlemy heòty bede-ò rakehãrele tahe awiõre.

³¹ Bede ywina heka kawesemy ròhònýre iny-ò juhUU wahe:

—Inyõ tahãwyy ixi-ribi riteònykeki rixãwididỹỹnyra tamy tyyritiõ riritinymyhỹre. ³² Iwitxira rybe-di jiarỹ arukile tahe hãbu tahãwyy riatyra. Inyõ uritere òta òtana òraru-ki ixi-ribi tahãwyy riteònymyhỹre. Tai tahe hãwyy roimyhỹre hãbu witxira hãbuõ-wana. Tai tahe òta òtadumy kia hãwyy rininire.

Adỹỹwe òraru-ò riteònyre tahãwyy riteònyre uritere òhyynaòle. Tai tahe tii adỹỹwe òrarunaòle heka riteònyre. Taile heka hãwyy hãbu wixiramy heka roimyhỹre ahãbuõ tahãwyy uritere hyynaòle riteònymyhỹre mahãdu hãbu heka. Tii heka tule òtadumy relemyhỹre hãwyy òta òtaduõ heka roireki wahe.

³³ Juhuu heka ihetxiu kia wesemy Deuxu tamyreny kia rarybere:

—Taholatenynte kiamy Deuxu heka uritere ruiõmy atximahãbenyke Deuxu-ò biwinybenykemy marybemy bimyekeki biwinybenyke.

³⁴ Tahe jiarỹ heka kiamy adeereny ararybekre. Aõwidỹỹmy ixi-di nohõtirenyõmy ryberenyõmy iwidỹỹmy. Ixinohõtidiỹỹmy ryberenyõmy ariwinykre biwawiòhenanyke wana biu-ribi wawiòhenanykre wana. Uritere heka tuu ryberenyõmykre kia wesemy biubrò-ki aõkõ biu dori Deuxu rynana rare. ³⁵ Kiamy uritere rybeõmy bedebrò-ki aõkõ aõ biwinykemy aõmy mabekemy. Bede dori Deuxu idi ratximyhỹre rare. Deuxu waa elehyna dori bede rare. Jerusalẽ hãwãbrò-ki tule aõkõ, tii dori Iòlòtyhy hãwã rare.

³⁶ Tule arade-di widỹỹmy uritere dori rybeõmy kai dori awixiranyõtyhy arade iura-ò ilyby-ò urile araykywydynakile tuu ratxike. ³⁷ Aõma araykywydynakile heka tuu riwixiranykemy idi tahõtinyinmỹhỹte. Kiamy heka tarybemahãte iwidỹỹnamy teuremy tarybemyhỹte: —Kohe, kiale ariwinykremy marybeke ada aõkõre, ariwinyõtyhymy aõbo. Kiamy marybekeki iratylemy kohe, aõkõre myỹ aõbo. Sõwemy

marybekeki tahe aõbina binahakÿle heka ròhònykre.

³⁸ Ihetxiu bede ywina ròhònyre.

Inyõ wixira rueõ ribinadÿÿnykeki, iny wixira tule iwesele riwinyke. Kia widÿÿdu rue heka ribinadÿÿnyke. Rue heka wilemy raòwynyre rueõwilemy. Juhu tasÿ ÿjuõlemy raòwynyre. Jiarÿ tahe rebedeerynyre kawesemy.

³⁹ Inyõ aõbinamy adee riwinykeki, aõ aõkõ tamy biwinyke. Inyõ aòsÿny rihetenyekeki, tule iwyò-di beake rehetenykemy. ⁴⁰ Uritere aòludu-ò ixìòwydÿÿõmy. Aõma ijõ atyy ritakeki heka tule tamy arahana biwahinyke. Inyõ sohoji urixinamy adee ixidinymy reake wana. Inatximy heka tii-wana beake. ⁴¹ Inyõ ixitòedÿÿmy aõ aribi riwykeki tamy biwahinyke tule inyõ aribi aõ huòtemy riwyke wana. ⁴² Abròrò itue-di tamy òkeseõmyke iwòde-ki ihuòtemy biwahinyke.

⁴³ Ihetxiu heka taholatenyde kawesemy:

—Kai heka aõ hãwã ludu mahãdu luumy heka madònymyhÿke.

Aòludumy aki ratxike wana tukumy atxike teramy atximahãke. ⁴⁴⁻⁴⁶ Tahe iwixiramy ararybekre. Aòludu heka arabedeerynyke. Tukumy mabekemy inyõ aõhòkÿmydÿÿnana rotÿÿnyreri wana tamy rexitòenyke. Kia wese-ki heka inytyby riòremy mabeke, Deuxu riòremy wahe. Tii dori juu riòlòdÿÿnymyhÿre inybina tyre-ki wahe. Tule iny wiwihikÿ tule-ki aõma biu heka tule riteònymyhÿre. Aõma iny òbitikõdu mahãdu tule-ò. Tule òbiti mahãdu tule riteònymyhÿre. Aõma tukumy ahãte sohoji ratximyhÿre sohojile kai

itukukeki. Kia heka awi aōkō rare ibutumy òraru mahādu heka tule riwinyremyhÿre kia wese. Aōma urile rybedÿÿ azry mahādu, Aseriòre mahādu. ⁴⁷ Tulesÿ kia aōma aōkō rare aōma tule heka judeukōdu mahādu dori tule riwinyke, tii Deuxu rierykōre. ⁴⁸ Òbityhymy kaibocho boibeke. Aōma jiarÿ heka arabedeerynyrenyleri biu-ki inytybyreny ratximyhÿre dori òbityhy rare.

6

¹ Wahisidÿÿna wiwihikÿ kai hāburu-ki iwahisidÿÿōmy iny-ò. Kai itxerenaōnamy biwahinymyhÿ. Aōkōkeki tiu inytybyreny-ribi bitaōtyhy aōwy awahisidÿÿna.

²⁻⁴ Kai biwahinykeu iny adee aōmybo rurumyhÿreó. Uritere ibutumy iny itxerenamy iwahidÿÿōmyhÿ. Inyō-ò òbiti mahādumy riwisÿnymyhÿre mahādu, kia wesemy heka tii riwinymyhÿre heka. Dohodÿÿmy heto-ki tuu riwinymyhÿre kia wesemy tule ibutumy hāwāhākÿ ruetyawetyamy tuu riwinyrerimy ihÿre. Inatyhy dori adee rarybereri: —Aōma wahisidÿÿnatyhymy heka adee rarybereri: — Wahisidÿÿnaō ixidee ritamyhÿre. Aōbo Deuxu wahisidÿÿnaō heka adee riwahinyōtyhy. Tai heka Deuxu wahisidÿÿnatyhy riwahinyōtyhy tamyreny. Iny-ò aō biwahinykeki, abiōatyhy-ò belyyōke. Wasilemy tamyreny awiòhedÿÿna biwahinyke. Iny tybyreny dori ibutumy aōna aōna ròtena rieryre aōwahisidÿÿna adee kidiwahinykre.

⁵ Iwese budu mahādu riwinymyhÿre wese uritere iwidÿÿōmyke. Kia wesemy aōkō heka bexitòenyke. Ibuturu-ò rexitòenymyhÿre

dohodỹna hetowo-ki heka lamamy rex-
itòdenymyhỹre. Hãwãy-ki dori rexitòdenymyhỹre
ibutu itxerenakemy. Inatyhymy heka adee
rarybere: –Atarasana ibutumy ritare. ⁶ Inatyhy
dori ritare.

–Bexitòenykeu malòke aheto jurawo-ò.
Ixi-di biijòtòbònyke. Ierykõnamy boo
ratximyhỹreò heka bexitòenymy myike.
Ibutumy heka boo aõbo wasimy iny
riwinyriwinymyhỹremy robimyhỹre.
Tai-ki tahe bede ywina wihikỹ heka adee
kidiwahinykre. ⁷ Tule rexitòdenymyhỹreu
uritere irehemy idi lamaõmy uritere
ixityre ixityremy tamy ixitòedỹõmy
wiwesewesehyyle. Judeukõdu mahãdu
dori kawesemy riwinymyhỹre. Kiamy heka
raraykywydynanymyhỹre aõma rexitòenyre
ehehekỹkeki heka roholatyhykemy
rohõtinyinymyhỹrenyre uritere widỹõmy
iwese tii riwinymyhỹre wesemy.
⁸ Inytybyreny dori rierymyhỹre aõmybo
iny raraykynymyhỹré. Inyboho
heka rexitòenymyhỹreu rierymyhỹre
aõmybo inyboho rurumyhỹrenyre.
Iny sõwemy rarybemyhỹrele aõkõ
heka tii roholamyhỹre. Aõmybo iny
rurumyhỹrenyre, heka bexitòenybenyke.
Kia wese:

⁹ Wahareny, biu-ki atximahãte. Anityhy iny
ibutumy rityhynkemy idi rierykemy
watzireri.

¹⁰ Aiòlòna heka wymy kanake. Iny adeewile ri-
winykemy iwese biu-ki relemyhỹre wese.

- 11 Wadeereny txuõ txuõ rÿsÿna bidiwahinyke.
- 12 Waòrarunareny òhòti-ribi bitosadÿÿnyke.
Iwese jiarÿ inyõ òraruna wanohòti iribi aritosadÿÿnymyhÿre wese.
- 13 Isiratyhy urihixina-ribi heka biwayrubunyke,
òraruna-txi reseke lau. Aõna aõna bina-ò bidiwaijebenyke. Iòlòna, ruru, loosòna heka ahòròhy rare. Kie.
- 14-15 —Inyõ ariixãwidinykeki iaõbina-ribi. Tule inytybyreny riwaiixãwididÿÿnyke. Deuxu iòraruna-ribi riixãwididÿÿnyke. Beinareheke wana.
- 16 Uritere aòsÿny bedètiidÿÿõmy iwese budu mahãdu rÿira wesemy. Tai heka byreõmy iny-di txuu rÿimyhÿremy widi retehemyhÿre. Wiji òhòtirenny reake. Heka raòwynyra inarehena irareny. 17 Tai narehereheu tainareheny teu. Atarina-di ahãtemy beake aòsÿny bisuhòke.
- 18 Inywitzira heka anaeryòtyhy kai tenarehemy atxiteri. Inytybyreny sohojile heka rierymyhÿre. Inyõ tuu robiòtyhy. Tii tahe ibutumy aõna aõnamy robimy wasimy rÿiramy. Iribi tahe tii araòwynyrenyke.
- 19 Aõna aõna butudÿÿõmy tyy, nieru, aõna aõna wiwihikÿ butudÿÿõmy kabede-ki. Txudòera dori ibutumy kabede-ki tuu riroxike aõna aõnamy. Aõma rararÿÿnyke iaõmydÿÿna ibutumy rararÿÿnyke rahuke. Wasidu tamy ralòke. Iaõmydÿÿna-ò sòweò wyremy rasinyke iaõmydÿÿna-di. 20 Kaki ibutudÿÿlemy heka biu-ò bibutunyke. Tai heka txudòera aõ riròòtyhy tule rararyòtyhy. Tule wasidu aòkò rare.
- 21 Titxibo aõmydÿÿnana ratxireri iwesele taheka arayky ratximyhÿre. Biu-ki aõbo ada bedè-ki

aõbo. Aõma bedeki araykywydyna ratxireri wana heka kakile taraykywydynante. Biu-ki araykywydyna ratxireri wana heka biu-ki heka arayky aõmydỹna butuna raykywydyna ratximyhỹre. ²² Arue heka loosõna wesemy rare. Aumy dee itỹnykeki heka aumy ibutumy loosõna-di tỹximy rarekre. ²³ Aumy ibinakeki tahe bedeki loro-ki matxike. Aumy bedeki lorohokỹ-ki ratxikeki ibinatyhymy matxike aõma butunale-di iny rõhõtinykeki heka tiu Deuxu iny riwiõhenyõtyhy. Deòdumy heka releõtyhy. ²⁴ Inatxi wedu-ki dori inyõ rityynyõtyhy. Tule heka tii roholamyhỹre ijõ-ribi tahe tõhõti rosamyhỹre. Inyõ Deuxu deòdumy releõtyhy tii aõna aõna butunadile rõhõtinyhỹreki. ²⁵ Tai heka tuu rarybereri adeereny. Uritere nohõtiryõmy arỹsỹnamy tule atyymy, idi matykynykemy. Aumy dori rỹsỹna ratyre aõnityhymy ratximyhỹre. Tule aumy tyky ratyre aõnityhymy ratximyhỹre. ²⁶ Nawii-di inihe betehemyhỹre. Tiiboho heka aõòworumy aõkõ ròbròmỹhỹreny. Aramyre heka aõma tarỹsỹna wydymy bederahymy tarỹsỹna riyrubunyõhyymyhỹre heto nihikỹ-õ. Deuxu biu-ki ratximyhỹre heka nawii riyrubunymyhỹre irỹsỹna tamy riwahinymyhỹre. Kaiboho tahe iratyretyhy toite, Deuxu-ki wahe. ²⁷ Sõwetyhymy maraykywydynanykeki aõbohe, arumy aõbo arirarehemy mariake. Aõkõre. ²⁸ Uritere nohõtiryõmyke atyymy. Betehemyhỹ inihe noijasa-di. Aõma tiiboho heka raaõmysỹdỹõhykymyhỹre. Tai tyky wihikỹ-di rexityynyke. Tyy ixidee riwinyõtyhy.

Ihãre tahe Deuxu rityynywihikỹre heka tyy wihikỹ tamy riwahinyreri. ²⁹ Salomaõ heka itykynihikỹra. Ihãre tahe ityky heka awityhy aõkõ rare. Noijasa heka iratyre ityky wityhyre. ³⁰ Deuxu heka noijasa ritykynymyhỹre aõma noijasa heka wijilemy idi ihỹre. Biurasòmy tahe ixãwilemy reamyhỹre, risõra. Tii heka tyky adee kidiwahinykre. Nohõtiyreõmy tahe. Tii dori adee kidiwahinykre tykyõ. Aityhyna dori ibutetyhyre heka. ³¹ Tahe raykyõmy nohõtiõmy titxiribibo arỹsỹna bidiwykré, atyky amona. ³² Tyhydỹỹdukõdu mahãdu heka kiaõle heka ritõhõtidiỹnymyhỹre. Inytybyreny heka rierymyhỹre aõmybo tarumahãte. Ibutumy heka araerymyhỹre aõmybo taruterimahãte. ³³ Tii Deuxu aõma dỹỹnana sohojidile. Manaykynykeki heka tii ibutumy adee riwahinykre. ³⁴ Uritere nohõtiyreõmy aõbo biurasò kia aõmydỹỹnana-ò. Rỹire dori sõwemy wiji biaõmysỹdỹnanykremy biwinykré. Iwitziramy bidiwinykre iwitxira aõmydỹỹnanaõ.

7

¹ Iny witxira witxira-di ywisidỹỹõkeki. Aywisidỹỹna wesemy heka Deuxu ruxetõena-di ywisidỹỹmy araywinykre. ² Iny teywinymahãte wesemy heka Deuxu araywinykre. ³ Kai heka òwòru nihikỹereõ arue-ki ijõdikeki, aõherekibo bederarasi sõmo-di inywitxira rue-ribi bitakemy atxiteri. ⁴ Tai heka kai bobiõtyhy itarasa-ki wahe. Arue-ki dori òwòruere ijõdireki heka bobiõtyhy. Òwòru ere dori aòraruna sõwemy rỹire

wesemy heka atximahâte. ⁵ Kai texibònyteri. Aòraruna-ribi juhuu bexiòbitinykre. Idi tahe aseriòre òraruna-ki biwiòhenanykre. Aòraruny-di rierymy idi òbitimy betehekre iòraruna-ribi iixitarasadỹỹmy biwiòhenanykemy.

⁶ Inyõ heka utura rati mana wiwihikỹ-di rehuõtyhy aõma ixỹni herina-txi. Ixỹni dori ityre rariake tahe riõnonyke adee heka kanakemy wahe. Iwese tule heka ijòròsa-ò biwahinydỹỹõmyke. Rybewiwihikỹ hãbu òrarudutyhy-ò iwahisidỹỹõmyke.

⁷⁻⁹ Rexitòenykeki tahe bitake kia. Biekeki tahe tai mahake. Bihetenyekeki heka iny adee riraynyke ijòtòbòna. Inyõ heka Tyby-ò rỹsỹnaõmy rexitòenykeki, mana heka tyby tamy riwahinyõtyhy. ¹⁰ Uturaõmy rexitòenykeki tahe hemylala binahakỹ tamy tiu riwahinyõtyhy. ¹¹ Kai aõna aõna wiwihikỹ biwahinyke heka teerymyhỹte auladu-ò wahe, hãbu òrarudu hãrele wahe. Aõbo heka tule Deuxu inytybyreny inydeereny riwahinyke aõna aõnaõ wihikỹõ. Rexitòenykeki tahe tamy ariwahinyke. Inytybyreny heka tamy riwahinyke. Iwese iny witxira teyrubunymahâte wesele heka iny araywinymy ixi-di tahõtinyinmahâte wese. ¹² Tule kai aõwiwi inyõ ixidee aõhebo rotỹỹnymyhỹkemy taruterí, kiaweselemy tamy botỹỹnymahãke. Kia heka Moisesi bedede ywina tyyriti-ki roire. Kiale Deuxumy rybedu mahãdu ribedeerynyre.

¹³ Bui bedede wiwihikỹ kia ryỹijòhỹtỹdile malokre. Heòty ijò bederyijò heka nihikỹ rare. Iny kia ryhykỹ irumy rakre heka isirare iny ibute kowa ralore. ¹⁴ Irumy nonona ijò tahe ihỹtỹre. Ryy

heka ihÿtÿre heka ibutere iny ryhÿtÿ-di ròtedu timy bede erydÿÿkõdu-ò.

¹⁵ Bexiijebenyke kia mahãdu lau Deuxu rybe rybedu mahãdu tyhymy aõkõ lau wahe. Budoeni wese ratximyhÿre inytyhy wesemy. Tawo-ki tahe inatyhy rare ahola debore wesemy heka ratximyhÿre. ¹⁶ Teeryte wesemy ibederaty-ò betehekeki. Hede-ò heka uvamy figomy tule tiu iratyõna. Iaõmydÿÿna-ò bierybenyke tibo roiré. ¹⁷⁻¹⁸ Tii heka bierybenyke aõhebo rotÿÿnyre wana teerytenyete. Tii heka riitxenanyõtyhy kia aõma matyty matynimy heka tiu biitxenanyõtyhy. Tule betehekeki, bierybenyke aõwesele heka òwòruõ bierybenyke. Aõma bederatyõ birÿsÿkeki tiu heka bederaty wihikÿõ arÿsÿõna òwòru raty-ò, bederatybinahakÿ tule rierykre. ¹⁹ Òwòruõ bederaty wihikÿmy raratynyõkeki heka hemy raòròròke rokoke. ²⁰⁻²¹ Kia weselemy heka iny teerytenyete. Aõhebo iny rotÿÿnyke wahe. Tai tahe terytenyete heka, tetehetenyerikile wahe. Òbiti mahãdu wesemy rarybemyhÿre. Tahe òbitimy aõkõre ihÿre. Sõwemy heka iny tawedumy riwaninire. Ihãrele tahe biu-ò ralòõtyhy. Deuxu tyhydÿÿdule tahe ralokre. Ywisidÿÿnatxu heka kawesemy wadee rarybekre. ²² Sõwemy iny wahe: –Wanyrÿ, Wanyrÿ, jiarÿ hewa iny iwitxira sõwemy aijyy rarybemy rare wahe. Tule heka tyytybybina reteõnomy rarewãhã. Tule deytana wiwihikÿ heka ani-di rewinyhÿre. ²³ Tai tahe jiarÿ tamy ararybekre heka: –Kõrehe, kaiboho aõ wamahãdumy aõkõ atximahãte. Umy reerykõre. Waribi bexitake. Aòraruna dori sõwere.

24 Kawesemy heka iny bede eryna ratximyhÿre. Warybe-ò roholamyhÿreu heka aõwesele riywinymy rityhynymyhÿre. Kia hãbu hetowidÿÿdu wesemy heka rare. Iheto heka manatyre-ki riwinyre. Tii heka ibedeery sõwemy ihÿre. 25 Biu heka beòra heka rariamyhÿre. Iu tahe biu rejuxunymyhÿre, yhy rebonyre. Tahe tiu reseõtyhy manatyre-ki dori riwinyre. 26 Warybe ijohonadu tahe iwitxiramy ihÿre. Hãbu itxÿte tahe warybe-ribi aõwesele tõhõtireny rosamy reamyhÿre. Kaiboho aõbedeeryhykÿ aõkõre roire. Tii heka iwese hãbu ÿnarakile heto riwinymyhÿ wese rare. 27 Biu risebenykeu, beòra rareareu, yhy rebonyreu tahe iheto reseke, ibutumy iõre, rahura.

28-29 Ibutumy heka Jesuisi rybe erysydÿÿna-ò bede riõtiinyre. Tii heka hãbu erysydÿÿdu wesemy tii ribedeerymyhÿre. Aõ judeu wedu wesemy aõkõ ribedeerynyre.

8

1 Tiu hãwãlò-ribi dobehedeu, sõwemy heka iny ihemy doidemide webinadu, tybina heka tamy nade. 2 Wowydyna rybe-di heka tamy rarybere: —Adee wikeki heka kai biwateytenyke. Jesuisi dirawyõnyde: 3 —Wadee awire, arateytenykre. Tahe tamy tebò ritytere tamy reerimy. Itybybinana riteytenyre. 4 Tahe Jesuisi tamy rarybere: —Boholakre, iny-ò uritere rybeõmy.

Kai tahe makre xiwena wahidÿÿdu-ò xiwenaõ biwahinykre. Idi tahe Moisesi bede ywina raryberewesemy xiwenaõ biwahinykre. Kai tahe iny rierykemy heka yteny ratximyhÿre.

⁵ Jesuisi Kafanaõ hãwã-ò rehemynyreu heka hãbu soldado weduõ tamy rehemynyre. Tii tahe Jesuisi-ò rexitøenyre: ⁶ –Wadeòdu biteytenyke raterenymy ratxireri waheto-ki. Sõwemy aõhõkõmy rotỹnyreri. Ibinatyhymy roireri rexisiranymy raratykõhykylemy. ⁷ Tai tahe Jesuisi tamy rarybere: –Rakakre, tai ariteyteynykre. ⁸ Idi soldado wedu rariwyònyre: –Aõkõre, Kai hãbu wiwihikỹ tate. Jiarỹ tahe hãbu aõ aõkõmy jiarỹ watxiwãhãre. Waheto-ò manalõõtyhy. Karibile marybekre tamy taile taile tahe wadeòdu reytekre. ⁹ Jiarỹ dori reyryre. Jiarỹ heka tule hãbu weduõmy watxiwãhãre. Soldado heka sõwemy riwatyhynymyhỹre. Iny sohoji-ò aõma rakremy rarybemyhỹré heka, ramymyhỹre. Tule ijõ dee rarybemyhỹre: –Manake, tai tahe namyhỹde. Ijõ dee rarybemyhỹre wana: –Kai biwinyke, idi riwinymyhỹre. ¹⁰⁻¹¹ Tai tahe Jesuisi ribedeòtiidỹnyre irybe-ki wahe. Tahe rarybere erydỹna mahãdu-ò: –Judeu mahãduy-ki tai rahaõre ijõ-ki kahãbu wesemy inatyhynana sõwerekki. Sõwemy heka judeukõdu mahãdu rityynykre kia weselemy. Ijõ txu aõ wiji aõkõ heka riroxirenyke: Abraõ, Ijai, Ijaò-wana biu-ki heka riroxirenyke bedede ludu iny mahãdu-wana. ¹² Judeu mahãduõ ròirenyõkre tamy. Tule kaibohoõ tahe aõhetykrebo. Ijõ mahãdu dori bedede lorohokỹ-txi resekre. Taiki tahe irynamy rurykre aõkõmydỹnana-ò. ¹³ Taita Jesuisi soldado dinodu-ò rarybere: –Makre, timybo wiji tahõtinyinmy tetyhynyte wesemy heka rarekre. Iurele teòdu reytere.

¹⁴ Iribi tahe Jesuisi Pedro heto-ò ralòre. Iriòre lahi heka aõma rubuna nihikỹ roimyhỹ. ¹⁵ Tahe Jesuisi rimyre tebò-di tamy rerire. Idi tahe irubuna iribi ròhònyre. Tai tahe tii ronyre. Ronomy tahe rỹsỹna riwinomyhỹ tamyreny. ¹⁶ Txiorotyhymy inyõ didyde aõma tyytybybina nihikỹ-di ratximyhỹõ. Iu Jesuisi sohoji rybeõmy rarybereu tahe aõwesele iribi ròhònyre. Kia webinadu didyde, tule reytere. ¹⁷ Iwese ihetxiu Isaia ryberiti rarybere wesemy heka tule riwinyre:

Jesuisi riwinyre. Kiamy wahe. Wabinanareny waribireny riwyre. Inatyhyre.

¹⁸ Iny sõwemy ributunyre. Tai tahe taerydỹña mahãdu-ò tii rarybere: –Rokoirenyhe kanawe-ribi ijà-ò. ¹⁹ Tai judeu mahãdu, bede ywina bederydỹduõ tamy rarybere: –Awana arakre titxibo makreu heka ahekile anakre. ²⁰ Tahe Jesuisi dirawyõnyde tamy heka rarybereri: –Ijòrò heka ihãloo dire, ibỹtỹ dire, nawii bỹtỹ isỹ dire. Tahe jiarỹ, Deuxu Riòre Hãbutyhyhykỹ wahe, wahetoõre, waherinaõre. ²¹ Ka ijõ iheludu mahãduõ tamy rarybere: –Wanyrỹ, waha heka rurura. Tai heka juhoo arituunykre. ²² Tamy rarybere: –Manake, wijile biwaheludunye. Rubuõmy rỹira, rubu mahãdu heka rituunykemy idi ratxireri.

²³ Jesuisi hãworo-ki ronyre tahe reurore. Ieryredỹña mahãdu riheludunyre kia lawokile. ²⁴ Ahobetya-ki tahe yhy debore nihikỹ tamyreny rehemynyre. Tahe òbò nihikỹmy resemyhỹre. Uritereribile yhyhykỹ bee riòbònyra hãwò rilỹmynye iòhòtyhyre. Jesuisi tahe rõrõmy roimyhỹ iu. ²⁵ Tai tahe

ierydỹna mahãdu heka riixixadỹnyre. Tamy raryberenyre: —Biwayrubunyke, Wanyrỹ. Aõkõkeki, rukururenykre. ²⁶ Jesuisi tamyreny rarybere: —Aõherekibo kaiboho taberutenyteri? Aityhyna sõwe aõkõ atxitenyteri. Jesuisi tahe rỹimy reare. Yhy debure-ò, òbò-ò rarybere: —Biyryke, bedede binahakỹ. Tahe aõwesele ibutumy riryryra. ²⁷ Ierydỹna mahãdu urile ribedeòtiinyre. Tiiboho raryberenyre: —Aõhãbubo tii ihỹre. Òbò, tahe yhy-wana tamy roholare. Iwese tii rarybere wese rityhynyre. Irybemynale riwinyre.

²⁸ Kalileia aho ijõ weribi ijana-ò ritehemynyre. Kowa bedede heka Kadara inire. Tule hãbu inatxi heka tyytybybina-di tai rasỹnyreny wabedewo-ki. Kiary-ki tahe ibutumy iny ruberure. Iribi tahe ròhònymy reare. ²⁹ Aõwesele heka ryrymy roirenyre Jesuisi-ò rarybekremy: —Aõwe wadireny tate, Deuxu Riòre? Kai aõbina binahakỹmy wahõrõdỹõmykre. ³⁰ Tahe kowa-ki ixỹni juramy riroximy rỹimyhỹ. ³¹ Tyytybybina tahe Jesuisi-ò rexitòenyre: —Biwatòenybenykeki, ixỹni jurawomy aralorenykemy biwateònyke. ³² Tahe Jesuisi rarybere: —Bòibenyke hãbuwo-ribi. Tahe ròirenyre ixỹniwo-ò. Ixỹni jura tahe ibutumy rejuxunyre ijõtira-ribi. Berawo-txi tahe rabòròròre. ³³ Ixỹni-di itxeredu mahãdu tahe hãwã-ò roirenyre ijyymy. ³⁴ Kia hãwã ludu mahãdu tahe roirenyre Jesuisi-ò itxeremy. Tai tahe tamy rarybere ibede-ribi ròhònykemy.

9

¹ Ribererenyre aõma hãwò nihikỹro-ò reuròrenykre kanawe-ribi ijà-ò. Tai tahe

Jesuisi tahãwã-ò rehemynyre. ² Tai tahe didydenyde weryrybòõ byre-di idi betyky-di ramyremyrenymy roimyhÿre. Tahe hãbu mahãdu inatyhyna Jesuisi rieryreu heka hãbu dee rarybere: —Waexi, beysake, aõraruna dori reixãwididÿÿnyra. ³ Tai tahe ritidÿÿna bederydÿÿdu mahãdu retehereri. Ixideele heka rarybemahã: —Kia heka ibinamy Deuxumy rarybereri. ⁴ Iyky Jesuisi rieryre tahe tamyreny rarybere: —Kai aõbo ibinamy waki tahateri arayky-ki. ⁵ Timybo heka kaiboho tahõtinyteri. Aõma iõraruna ariixãwidinyke aõbo ada iumy ariteytenyke aõbo? Aõbohe isiratyhyre wadee tahõtinyte wahe. ⁶ Deuxu-ribi waruru dire. Kabede-ki heka õraruna ariixãwididÿÿnyke jiarÿ heka Deuxu Riõre Hãbu tyhyhykÿ rareki wahe. Tamy rarybekre: —Myike, abyre bimykre ta mariakre asÿ-ò. ⁷ Tai tahe hãbu aõwesele rÿimy reare. Tahe taheto-ò rare. ⁸ Tahe bedede inysõwetyhy heka ribedeõtidiÿÿnyre. Deuxu heka wowydyna riwahinyre. Tii iny-ò ruru riwahinyreki wahe.

⁹ Jesuisi iribi rariamy rare. Tai tahe tii Mateu-wana heka witxi reare ryki: —Jiarÿ heka nieru butudÿÿna heto-ki ranymahã. Jiarÿ rebutunymahã aõma inyòwydÿÿna heka rebutunymyhÿre. Iu Jesuisi wadee rarybere: —Manake waerydÿÿnaõmy heka beleke. Tai tahe jiarÿ tii-wana heka rare aõwesele heka ihemy rare.

¹⁰ Tai jiarÿ retobinyre kanakemy waheto-ò. Waheto-ki riroxikemy taerydÿÿna mahãdu-wana. Tai tahe sõwemy heka iny waery mahãdu dòidenyde, õrarudu nihikÿ mahãdu wahe.

¹¹ Tule heka fariseu mahãduõ tai ratximyhÿ.

Tahe Jesuisi erydỹna mahãduõ kiaõ-ò heka rarybere: –Aõherekibo Jesuisi òrarudu nihikỹ mahãdu-wana riroxireri? ¹²⁻¹³ Tai Jesuisi roholarehe tamy rarybere: –Aõma òhotibedu heka, webinadu mahãdulemy aõnityhymy rarumahãre. Òhotibedu-ò kanakemy. Binadu mahãdu-ò tahe tiu ararariòwyõtyhy aõma òbiti widỹdu mahãduòle heka anade. Warurumy rurumyhỹle mahãdu ariwiòhenanykemy anade. Aõ awihikỹmy ixi-di rõhõtinyreriò aõkõ wahe. Deuxu Ryberiti-ki tahe kaweselemy roire:

Ixiwe heka wadee awiõre aruxetòena wadee awire.

Kaiboho bierybenyke aõbo katyryiti rare.

¹⁴ Tahe Jesuisi-ò rarybere Joaõ eryna mahãdu: –Aõherekibo Joaõ Sebedeỹdu kia erydỹna mahãdu renarehemyhỹre rexitòenykreu. Fariseu mahãdu erydỹna heka tule heka renarehemyhỹre. Ihãrele taheka aõherekibo abedeerydỹna mahãdu heka tiu iwesemy riwinymyhỹre. Aõherekibo ka. ¹⁵ Taita Jesuisi dirawyònyde: –Iu iny inyhãwymy roimyhỹreu heka iny reysamyhỹre. Aõma kia weryrybò hãwyy kialina heka teysamy ratxirerimy ihỹre. Tiu rirubunyõhymyhỹre teti-ò. Tahe aõutxumy tahe weryrybò hãwymy heridu heka inyõ ritakremy ratximyhỹre. Iu tahe renarehekre heka. ¹⁶ Uritere inyõ deratyby ritòbònyõtyhy tyytỹmyra-di. Inyõ itòbòna tỹmyra-di ritòbònykeki, raykake heka iura ranihikỹke. Aõma iwesele rare aõma vỹ tỹmyra iròdutyy tỹmyrahakỹle ritidikreu. Aõma itỹmyra-ò heka iròdutyy itỹmyrahakỹle raykake. ¹⁷ Aõhe tiu vỹ tỹmyra iròdutyy tyby-ò rihynyõtyhy. Inyõ

kia wesemy riwinykeki taheka raykake heka rejuxunykre irube. Ihyna heka rabinake. Vĩ wihikỹ taheka aõma iròduty tyĩmyra hyynawo-ki ka awimy rỹike.

¹⁸ Iu dohodỹỹdu hetoõ bede erydỹỹduõ heka Jesuisi-ò nade tariòre rurureki wahe. Tai ta Jesuisimy reàlære tamy heka rarybere: —Aõma wariòre rarurura wahirari wahe. Kai waheto-ò manake wariòre ruru-ribi biixixanykremy. ¹⁹ Tahe Jesuisi taerydỹỹna mahãdu-wana roirenyre tii wana wahe. ²⁰⁻²¹ Tahe hãwyy røhõtinyre heka: —Jikarỹ heka ityky reroti-kò karirikrekule karekytekre. Tii dori ihãlubu rihyõhyy raremyhỹre waò inatxi reurò beòramy. Iòhòm y iribi reare. Ireroti wereysanakile rimymy resere. ²² Taita Jesuisi ròðemy reare. Tuu robire tamy rỹraxire: —Lerỹ, awi heka rare. Aityhyna heka arateyteynyre. Inatyhymy teyteta. Tai tahe hãwyy aõwesele reytemy reare. ²³ Idi tahe aõwesele rehemynymy reare. Judeu wiuna bedeerydỹỹdu heto-ò rehemynyre. Tai heka hãwyy sõwemy robumy rỹimyhỹ rubura-ki rawiunymy rỹimyhỹ. ²⁴ Tai tahe Jesuisi tamyreny rarybereri: —Bòibenyke hewahe. Hirar-ihikỹ heka ruruõhyky roireri. Urile heka rørømy roireri. Tahe iny rutzueny. ²⁵ Tai iny sõwemy røhòn yre iribi. Tahe Jesuisi raløre titxibo hirar-ihikỹ roireriò. Debò-ki rimyre tahe riteyteny. Rexixare ixyby. ²⁶ Ibutu bede bedemyhe inina-ò roholare. Kia deytana riwinyraò.

²⁷ Tahe hãbu ruetà inatxi Jesuisi riheludunyre heka. Kia hetoy-ribi wahe. Tamy heka raryberenyre: —Kai heka iòlò Davi riokore tate. Tai tahe ruxetòena-di biwawotòenyke. ²⁸ Idi tahe

Jesuisi taheto-ò ralore tai rasỹnyny ratximyhỹò. Iny mahãdu ihewomy rare tahe ralòre. Tamy rarybere: —Inatyhymy aõbo tetyhynytenyte, ixyby arãitxeredỹnykeò. Tiiboho raryberenyre: —Kohe Wanyrỹ, retyhynyre. ²⁹ Jesuisi rarybere: —Ainytyhynadireki arue tabita. Aõwesele robirenyre. ³⁰⁻³¹ Jesuisi heka rarybere tarurumy tamyreny uritere ijyyõmykremy. Tai tahe aõma ròirenyre ibutuko relyyrenyre.

³² Idita tako-ò rexidorunymy reareki tasỹ kia hãbuõ-txi reare tyytybybina-di ratximyhỹõ. ³³ Tahe Jesuisi-ò didydenyde hãbu irybeõna kia tyytybybina òraru-ki wahe. Jesuisi tuu òlòdỹnyre iribi. Iule tahe hãbu aõwesele heka rarybere iroo-ki. Kia iny ibutumy ribedeòtiidỹnyre. Timy heka rarybeõhyyre iko-ki juhUU raremyhỹu. Tuu rabiõhe iwesedỹnadumy. ³⁴ Idi tahe fariseu mahãdu rarybere: —Tyytybybina-di ratximyhỹre. Tai heka tyytybybinahakỹ reteònymyhỹre iny-ribi. Ihãrele heka Satanasi-di ihỹre. Tyytybybinatyhy wedu heka ratximyhỹre.

³⁵⁻³⁶ Idi tahe ibutumy hãwã hãwã-di Jesuisi rariamy rare ròbedeerydỹmy. Judeu mahãdu dohodỹna heto-ki relyymyhỹre, Rybewihikỹmy. Tai Iòlòna kia ritỹnynymy tuu relyymy. Ibutumy iny bina bina kia heka riteytenyre. Iny nade ihewo-ribi. Sõwemy heka iny aõna aõna bina binahakỹ riwinymyhỹre idi rỹimyhỹ. Titx-ibo rakre heka rieryõhykymyhỹre ta aõna aõna òraru-ki idinoduõreki wahe. Tai tahe Jesuisi riwotòenymyhỹre ibutumy tiiboho dori budoeni wese ratximyhỹre, itxeredu ihoõreki. ³⁷ Tai tahe

taerydÿÿnana mahãdu-ò Jesuisi rarybereri: –Iny heka maixõmo sõwehekÿ rÿira wese heka iny ratx-
imyhÿre. Aõma ibutelemy heka arixidu rÿira.
38 Bexitòenyke Deuxu-ò. Tii heka bederomy
maixõmo rÿira wedu rare. Bexitòenyke tamy aõbo
maixõmo arixidu-ò kiditeònykemy. Irybe-di heka
raaõmysÿdÿÿkre ibedero-ki. Ibutu bedero-ki heka
idi raaõmysÿdÿÿkre.

10

1 Ributunyre Jesuisi aõma tawa-ò inatxi reurò
kia bede erydÿÿna mahãdu. Tamy heka ruru ri-
wahinyre. Aõma tyytybybina riteònykemy. Tule
tamy riwahinyre ibutu binana deytana heka ri-
wahinyre tamy.

2 Kia heka tadeòdÿÿmahãdurenynimy ararybekre.
Juhuu heka Simaõ Pedro. Juhuu heka Simaõ inire,
ihewomy tahe Pedromy naninide. Andre ijõ. Tii
heka Pedro seriòre rare. Txiau, Joaõ-wana heka
Zebedeu riòre rare: 3 Filipi tasÿ ijõ rare. Idi
tahe Bartolomeu ijõre. Tome ijõre. Mateu ijõre,
jiarÿ wahe. Jiarÿ nieru tarasaduõ rare, imposto
tarasadu wahe. Ijõ Txiau tasÿ Afeu riòre rare.
Tadeu ijõre. 4 Simaõ ijõre. Tii Kana bede luduõ
rare. Judasi Isariò ijõre. Tii heka Jesuisi tyhedÿÿdu
rare.

5 Jesuisi taerydÿÿna mahãdu waðinatxi
reruòmÿ riteònyre. Tamyreny rarybere: –
Judeukõdu mahãdu-ò aõkõkre reteònyre. Aõma
Samaria mahãdu hãwã heka ralòõhyymyhÿre.
6 Kaiboho heka bòibenyke judeu mahãdu-ò
sohojile. Tiiboho Israeli riokore mahãduõ
ihÿre. Aõma budoeni reòsamyhÿre mahadu

wesemy tiiboho ratximyhÿrenyre. ⁷ Aõma tamy marybekenye: –Deuxu Iòlona biu-ki heka aõwesele kedehemynykemy ihÿre. ⁸ Webinadu mahãdu heka biteytenyke. Aõma iny rubu-wana witxi beakeki, biixixadÿÿnyke rubu-ribi. Tykybina yjy yjyhykÿ-ribi iny biteytenyke. Tyytybybina inywo-ribi biteònyke. Iwese aõ tetate wese iòwykõ heka ijõ-ò biwahinymahãke, iòwykõ wahe. ⁹ Uritere nieru wydyõmy, womati tÿrÿrÿhÿkÿ nieru aõkõ, prata womati nieru aõkõ, cobre womati nieru aõkõ wahe. ¹⁰ Aõma anieru hyna nihikÿ wydyõmy, awa ijõ wydyõmy, ijõ dera wydyõmy. Aõma òwòru arirana wiòhedÿÿna wydyõmy. Aõmysÿdÿÿdu taòwy riwykre. Kia òbitire. ¹¹ Hetoõ malòke. Kia heka arayrubunykre. Adee riwahinykre ibutumy aõmybo rarumyhÿkre. Iu hãwã-ò malokreu, hãbu ityhydÿÿdu mahãduõ biijekre. Taihyy bonykrehyy tahe iwitxira hãwã-ò iribihyymy makre. ¹² Iu hetoõ-ò malòkeu Deuxu ywina tamy marybekre, Deuxu deysanamy wahe. ¹³ Kai awimy ityhydÿÿdu hetomy rÿike wana, biwahinyke aalàna tamyreny. Kai òbitimy aõkõ atxiteri wana tahe uritere tamy Deuxu deysanamy tamy wahidÿÿõmy. ¹⁴ Aõma tii arybe-ò roholaõkeki, kai hãwã-ribi bexitake taheto-ribi wahe. Tahe iribi bòhònykeu tahe awabrybyxi biubÿtÿnymy bòhònyke. Tii tahe tamyreny rioimyhÿre. Aõma tamyreny ibinatyhykre. ¹⁵ Inatyhymy heka adee ararybekre. Sodoma hãwã mahãdu, Komora hãwã mahãdu inatyhymy heka ibinare tamyreny tahe isiraõkre aõhòkÿmy dÿÿnana wahe. Aõma kia hãwã arybe-ò raholara heka kia ratyre heka tamy isiraõkre. Kia hãwã

tahe aõnityhymy aõhõkõmy rotõyõnykre. Ywisidõyõna txu heka rõekreu wahe.

¹⁶ Iwese budoeni ijòrò aholay-ki rõyikre wese heka kaiboho boibekre. Hemylala erydõyõna wesemy heka maraykynykre. Idi tahe sõwemy aõma ywina-di maraykynybenykre bõtòewesena-di. ¹⁷⁻¹⁸ Uritere inatyhy heka aramykre araròtenykre dohodõyõna hetowo-ò adi ralokre. Waòraru-ki heka bede dinodu mahãdu heka araywisidõyõnynakre. Judeukõdu mahãduko Rybewihikõ Tõmyra rarybekre. Tiiboho arahãtenykre. ¹⁹ Aõ heka belyyke ikoreny ibutumy roholakemy. Aramykeu heka uritere nohõtìõmyke aõmybo marybekremy ywisidõyõna-ki wahe. Bede heka ariwahinykre rybe ibededõyõnanau. Rybeõmyke, urile rybeõmyke. ²⁰ Kai ixiwanaale aõkõ marybeke. Aõma Deuxu Tyytybytyhy arãwiòhenanymyhõreny. ²¹ Inyõ heka taseriòre rityhenykre. Tybyõ tule tariòre rityhenykre. Aõma iriòre tasõ tyby-ò iky reakre idi rirubunykre. ²² Ihyy ibyrymy heka aluu aõkõkre waòraru-ki. Ibutumy iny deramy rarehyyke waòraru-ki: Inyõ tule òbitimy rarekreki, ikonanatxu-u, Deuxu Iòlòna-ò ralokre. ²³ Tahe anatakre. Aõma hãwãhãkõ-ki atxikeki mahenykre ijõ hãwã-ò. Ihewoludu ikonana hãwã hãwãhãkõ-ribi behemynyke-ribi tahe adòòsekre. Judeu hãwãhãkõ-ò behemynykrekõule tahe adòòsekre, jiarõ Hãbutyhyhykõ wahe.

²⁴⁻²⁵ Aõma bederydõyõdu mahãdu tahe aõma ierydõyõna mahãdu ratyre rare. Tule iwedu deòdu ratyre heka ihõre. Iwesereny tahe boibebenykre. Tahe awedu tate. Inyõ tahe riwarinimyhõre Sa-

tanasi, Belisibu wahe raremy. Tahe iwesele heka iny araninikre waweselemy, ibinatyhyre wahe. ²⁶⁻²⁸ Jiarỹ adee wiji relyreri. Biurasòmý heka tuu bedelyykre ibutu ijohonanamy adeereny relyreri. Wasimy wijirumy adeereny relyyre. Biurasòmý tahe ibutu ijohonanamy tuu belyy-benykre. Uritere ilau brebuõmy. Aõbo wasimy rỹire heka ibutumy ratỹnykre. Uritere ilau brebuõmyke. Adeelekre rirubunykre atyytyby ta rirubunyõtyhy. Iruruõre dori atyytyby rirubunyké. Deuxule tahe bityhynyke. Tii dorihe iruru-di heka rare. Tii bede luru-txi heka atyytyby bede luru heòty-txi heka adi rehuke. Bityhynyke idile maraykynyke. Hãbu lau brebuõmy hãbu aõbina bina riwinyhyre lau brebuõmy. ²⁹ Nawiiõ iny riwinyhyre womati nieru iyja-di, iòwy riõre iny heka riwinyhyre. Ibutumy heka Deuxu nawii rieryre sohoji sohojimy. Tiu heka Deuxu rieryõhyhyre nawii sõmo rurumyhyreu heka tiu rieryrykõmy idi reteheõtyhy. Kiawese aõbo tahõtinymahãte. Aõkõre, inatyhymy idi retehemyhyre. Ijõ rurumyhyreu heka tuu robimyhyre. Aõma Deuxu heka anaerymyhyre nawii sõmo ratyre heka aumy rierymyhy. ³⁰ Ara erymy heka aõma arati-ki tiwesebo radeti rỹimhyre heka rierymyhyre. ³¹ Breburenykõmykre, kaiboho dori nawii ratyre Deuxu-ò toite. ³²⁻³³ Kai marybeke: —Jiarỹ retyhynyre dori tahe umy arelyyke. Jiarỹ heka umy ararybeke inynrỹ dee biu-ki wahe. Iny sõwehekỹy-ki riwatxiõnykeki tule aratxiõnyke jiarỹ Wahako-ò. Jiarỹ heka suò anade.

³⁴ Aõ ywina wydymy aõkõre heka anade. Jiarỹ

heka ywina aõkõre diwyde. Bedejejeidỹmy anade iribi wadee wou rỹikremy. Hãbu heka tybe òludumy rarekre.

³⁵ Tule hãwyy tadi òludumy arisynykre. Tule iriokorese tariòrelahi òludumy arisynykre. Aõma inyõ òludu heka tasỹ mahãdu òludumy rarekre.

³⁶ Boluu adireny boreny heka boibekre. Kia lumy heka boibekre. Tai tahe iratyremy boibekre aõkõkeki tahe waluuõkeki tahe wahõrõ mahãdumy aõkõ boibeke.

³⁷⁻³⁹ Kaweselemy boibeõkeki. Tai tahe kai wahõrõ mahãdumy aõkõhe mabekre. Aõma biyrurubunytyhykeki tahe kai ihãrele aõkre. Aõma kai waòraru-ki aõhõkỹmy botỹnykeki wadee waaõmysỹdỹ òraru-ki inyõ anarubunyekiki aõhe adee rutỹnykeki. Tai tahe aumy ròhõnykre inyõ tasỹ-ò aradykeki iwese tii tasỹ-ò riwadyra wesele heka aradykre.

⁴⁰ Tii riwadyra wana Deuxu heka ridymyhỹre riwateònyreki wahe. ⁴¹ Deuxu rybeduõ bidybenyekiki. Tii Deuxu-ò arãwahinykre. Deuxu adee uriiõno kadiwahinykre. Adeereny kidiwahinykre. Wahisidỹna ritakre wese heka tule kai bitakre. Adeereny ararybekre. Deuxu hõrõ mahãdu heka bimymahãbenyke. Aheto-ò bidybenyke hãbuwi ihỹreny. Tiiboho dori wese uriiõno ritarenykre wesele kaiboho bitabenyke. ⁴² Kai uladu-ò bemonã biwahinykeki bedi imonamy. Tai tahe kanakre inatyhymy adee aõ kidiwahinykre. Kai waòraru-ki ityhydỹdu-ò bee biwahinykeki, inatyhymy heka aòwy adee kanakre.

11

¹ Jesuisi heka rexihure aõma taerydỹna mahãdu waõinatxi bederydỹna-ribi. Kia bede ywina tamyreny riwahinyre. Rexihureu tahe rare røhønyre iribi hãwã-di. Aõma rybe ritỹnydỹmy rakremy hãwã hãwã-ò.

² Idi tahe røtenywokile heka iu Joaõ roimyhỹ. Aõbo Jesuisi tahe iu aõna aõna wiwihikỹ ritxienymyhỹreu heka Joaõ tamy roholare. Røtenywo-ki roimyhỹ-ribi. Idi tahe Joaõ taerydỹna mahãdu riteònyre Jesuisi-ò dỹraxy: ³ –Kohe, anaraòdenyde tate. Aõma Deuxu deòdỹna wahe kanakre aõbo ihewo-ribi. Ariraòrenykre aõbo urihimyò. ⁴ Tai Jesuisi rirawònyre: –Aõma bòòsebenyke ixybyle Joaõ-ò. Belyybenykre ikò aõna aõna wiwihikỹ rewinyre arureny-ki tule tabite wamyreny. ⁵ Aõma iruetàhãkỹ heka. Reruedỹnymy rare wahe. Itiere tasỹ retinywãhãre dinoduhukỹ ityy reytemyhỹre. Aõma ijõ Rybewihikỹ Tỹmyra roholaõhyymyhỹre tasỹ tule reijohonadỹnyre. Aõma rubu tule rubu-ribi reixixadỹnyre. Rybewihikỹ Tỹmyramy heka retỹnydỹnyre ibutu iny-ò wahe, iny aõkõ mahãdu-ò wahe. Tule Joaõ-ò marybebenyke kaweselemy wahe. ⁶ Maratyhybenykeki, beysabenyke.

⁷ Iribi røhønyreu tahe Jesuisi heka rarybere Joaõ bededỹnanamy. Aõmybo wahe Joaõ-di røhøtinyrenyre aõmy tuu bedi nohøtinyrenyre tamy itxereny bederahy røirenyreki wahe. Otxirarade wese yhy-ki tahøtinyteri. ⁸⁻⁹ Ada aõma hãbu urimynodutyhymy aõbo idi røhøtinyrenyre. Aõma butòre wesemy idi røhøtinyrenyre. Ada iwitxiramy

aõbo idi tahõtintytenyte hãbu tyywihikỹdiremy idi rahõtintytenyte. Iòlò taheto wihikỹ-ki ratximyhỹre. Aõkõre, kia iny heka aõ Deuxu rybeduõmybo tahõtintytenyte. Inatyhy tii kia rare. ¹⁰ Iratyre heka tii rare. Aõma dori Tyyriti-ki rarybemyhỹre:

–Tii heka wako-ki kadehemynykremy ratximyhỹre, wamy relyykemy, wary riywinymyhỹre.

¹¹⁻¹⁴ Inatyhy heka rare. Tii heka ibutu hãbu ratyre ratximyhỹre. Ihãrele tahe heka Deuxu Iòlòna-ki heka ijõ iny iratyre ratximyhỹre. Hãbu binahakỹ heka Deuxu Iòlòna-ò raaõbinanymyhỹre. Joaõ rexidelenyre rybe itỹnydỹmy rexidelenyreuhyle heka ritelemy ralore. Tule wiji nalòmhyhỹde sõwemy. Iu Joaõ rehemynykõle heka tuu rarybemyhỹre ibutu Deuxu rybedu mahãdu heka tuu rarybemy raremyhỹ. Tule Moisesi bede ywina kia rarybere. Tii Eliasi wesele ihỹre. Tetyhynytenyte aõbo. Iwese Deuxu rarybereri wesemy heka tii nade. ¹⁵ Inyõ ierysomy rurukeki, roholake wiji. Aõmybo ararybekre kainymy tiwesebo rỹimyhỹremy. ¹⁶ Tiiboho heka iwese weryry uladu risinymyhỹre wesemy ihỹrenyre. Kiamy heka tiinamahãdu-ò rarybemyhỹre: ¹⁷ –Jiarỹboho heka aõma wiunawihikỹ-di rawinymyhỹrenyre. Idi tahe teysatenyõhyymãhãtenyte. Tahe wiuna bederarysyna-di heka rawiunymyhỹrenyre. Ta bedewoõhyymahãtenyteri. ¹⁸ Joaõ Sebedỹydu heka riroxiõre. Vĩmy riõõre. Inywesereny tai tarybetenyte: –Tii raitxỹtemy ihỹre. Tyytybybina-di ihỹre. ¹⁹ –Jiarỹ Deuxu Riòre

heka rehemynyre Hãbutyhyhykÿ wahe. Jiarÿ reroximyhÿre. Reõmyhÿre tahe kiaboho heka waluu aõkõ heka toite. Urile heka wamy tarybemyhÿtenyte wabyre nihikÿremy wabemomohõkÿremy. Aõma òrarudu kia liinatyhy heka jiarÿ rare. Aõ ikõkõlemy heka taraykynymyhÿtenyte ihãrele taheka òbitilemy ixi-di tanohõtityhÿtenyte.

20 Jesuisi heka sõwemy aõwiihikÿmy riwinymy raremy. Ihãrele heka imahãdu rityhynyõhyymyhÿre heka. Kia Jesuisi heka rarybere kia hãwã mahãdumy. 21-22 Orasi hãwã aõ heka adee binatyhymy kanakre amahãdu-ò wahe. Besaida hãwã mahãdu, kaiboho aõna aõna wiwiihikÿmy tabitenyte ahãwãreny-ki. Tiu heka ixi-txi õhõtireny reaõhykymyhÿre. Jiarÿ aõma Tiro hãwã-ki Sidõ hãwã-ki aõna aõna wiwiihikÿ ariwinyre wana inihe heka ixi-txi tõhõtireny reare iniheka saumy tyky rexytyynyre tule brybysi ixityrereny heka rexihumy. Sidõ hãwã Tiro hãwã heka urihimyò adeereny isirakre. 23-24 Kafanaõ hãwã mahãdu! Kaiboho heka tule ixitxireny õhõtireny reaõhykyre. Aõma kaiboho heka awireny ixidireny tahoõtitymahãtenyte, awityhyremy. Kaiboho heka òhõtenamy bekoabenykre bedebina heòtyhykÿ-ò dori besebenykre. Sõwemy dori aõwiihikÿmy kaiboho tabitenyte. Deysana wiwiihikÿ-di wahe. Tiu heka ixi-txi õhõtireny reaõhykymy aòrarurenny-txi. Aõ wiwiihikÿ Sodoma hãwã-ki rewinyre wana wahe. Tiu heka rabinaõhyre inihe heka wiji-ò. Aõkõ botÿÿbenykre aõma Sodoma hãwã ratyre heka aõhõkÿmy botÿÿnybenykre, Deuxu ywisidÿÿnatxu.

25 Tahe Jesuisi rexitòenyre Deuxu-ò: –Waha, biu bede-wana iwedu atximahâte. Kai uladu-ò aõna aõna tetÿnynyte. Tewòmahâte heka kia ibedeeryhykÿ lau heka tewòmahâte. Kai ix-di bedeeryhykÿmy rõhõtinyinmyhÿre lau wahe. 26 Tii heka adeewinare. 27 Ibutumy heka Waha wadee riwahinyre tii heka riwaeryre. Jiarÿ tule tii reeryre. Aõma ixidee wikeki inydee ariteòsinyke. Timybo Waha rare. 28 Elehydÿÿmy buruke aõbo? Manake wadee. Jiarÿ heka araelehynykre. 29 Walòtityreherina ixidee bitidibenyke. Tai tahe wawana maaõmysÿdÿÿbenyke. Arabederynykre heka ywina-di. Aritidiòtyhy heka aõ utxiehekÿ atyreneny. Elehyna adeereny ariwahinykre awo araykyreny-ò. 30 Aaõmysÿdÿÿna adeereny rewahinyhÿre isiraõre heka. Iutxiemy aõkõ rare.

12

1 Sabado txuu, judeu elehynatxu Jesuisi rariamy ròirenyre maixõmoni oworu-ki. Tahe rekoarenenyre aõma maixõmoni oworuro-di heka irenyre. Kia heka tahe Jesuisi taerydÿÿna mahãdu heka riarimyhÿre aõma riyrenykremy rama rahuraki. 2 Iu-ki tahe fariseu mahãduõ rethememy ratximyhÿre. Tiiboho tahe rarybere kia Jesuisi-ò rarybere: –Kia hewa brebuna rare aõma sabadotxu riwinymyhÿré: –Aõherekibo aerydÿÿna mahãdu iu riwinyrereri. 3 Tahe Jesuisi tamy rÿÿraxire aõma ijyymy ikoreny relyyre iwese Davi riwinyre wesemy heka riwinyrereri ramy rahureu. 4 Davi riki heka ralòre Deuxu dohodÿÿna hetowo-ò heka ralore. Tai tahe rirÿsÿmyhÿ kia

aõma xiwena-ki heka riymy. Kia orotxu heka aõma xiwena-ò hidỹỹna mahãduòle rỹimy. Tahe ihãrele heka riyrenyre heka. Taijoi mahãdu-ò riwahinyre. ⁵ Kia wesemy aõma tariakõte bede ywina tyyriti-ki wahe. Aõma xiwena wahidỹỹdu heka rityynyõhyymyhỹre. Aõma sabadotxu kia wahisidỹỹna. Xiwena bede ywina wahe. Iu dohodỹỹna hetowo-ki ratximyhỹu. Tii heka sabadotxu bede ywina rityhynyõhyymyhỹre. Tahe heka aõbina bina riwinyrenyõhyymyhỹre. Kia tahe heka tule heka bede ywina tyyriti heka ritidỹỹna roire. Idi tariatenyõte. ⁶ Inatyhymy heka adee ararybekre. Inyõ kaki ratxikeki jiarỹ heka kaki heka inyõ ratximyhỹre aõma dohodỹỹnahakỹ heto-ki wahe. Dohodỹỹdu mahãdu ratyre heka watximahãre jiarỹ wahe. ⁷ Kiamy heka ritidỹỹna rỹimyhỹre. Jiarỹ heka xiwena luure ihãre tahe sõwemy heka iratyre ruxetõena luure. Jiarỹ aõma xiwena luure ihãre tahe iratyre heka aõma ruxetõena luure sỹ. Kaiboho terytenyete wana. Aõma heka ibinamy tarybehyyynyhỹte inyõ teòsamy ratxikeò. Aõma aõ riwinyrenyõhyymyhỹre. Kiamy wahe. ⁸ Jiarỹ dori Deuxu Riòre Hãbu watximyhỹre. Jiarỹ tule aõma sabadotxu wedu wãhãre.

⁹ Tai tahe Jesuisi nade heka ixyby aõma tohodỹỹnareny heto-ò. Ralòre heka sabadotxu. ¹⁰ Hãbuõ ratximyhỹre debò binare. Debò rayjayja ihỹmyhỹre. Tahe fariseu mahãdu heka Jesuisi-di mynamy ratximyhỹre. Aõ rybebinamy rarybeke òraru-ki rimyky. Tai tahe rỹỹraxire Jesuisi-ò: –Timyrebohe brebuna aõbo sabadotxu deytedyỹ ada aõkõre aõbo. ¹¹ Tai ta Jesuisi ri-

rariwònyre: —Kaweselemy rōkōhōtinyrenyke. Kai heka aōmy abudoeni sohojilere. Sabadotxu heka reseke hālooro-txi aribi. Timybo mohōtinyke aōma bitake hālooro-ribi. Inatyhyre aōbo. Sabadotxu hārele bitake. Kohe, inatyhyra. ¹² Hābu heka buudoeni ratyre heka iòwy rare. Aōma sabadotxu aōwaxinyre heka reyteke. ¹³ Tai hābu-ò rarybere Jesuisi: —Ebò biditytyke. Debò ritytyra ta wiwesele debò relere awimy. ¹⁴ Fariseu mahādu heka wii ributunyre, iribi rōhòrenyreu wahe. Widee raryberenyre: —Aōma timybo rikisỹnyrenykre rikimyrenykre rikirubunyrenykre.

¹⁵ Tahe Jesuisi rierymyhỹ kiamy rarybermyhỹreny heka roholamyhỹ. Tahe Jesuisi rierymy heka. Iribi irehemy ratximyhỹreny hārele, rierymy heka. Iribi tahe rexitare heka hāwā-ribi wahe. Idi heka ihemy heka rare riheludunyre. Sōwemy heka webinadu ihemy rare. Ibutumy riteytenyre. ¹⁶ Teyteydỹna mahādu-ò rarybere: —Uritere itỹnydỹỹōmykremy tuu ijyyōmykremy inyko-ò. ¹⁷ Ihexiu Isaia tyyriti-ki heka kawesemy rỹimyhỹre. Tii heka Deuxu rybeduō rare.

¹⁸ —Kaheka Wadeòdu rare. Tuure heka jiarỹ, tii heka retare. Rehitynyre. Tii heka deysana wadee riwahinymyhỹre Tatytybytyhy tamy ariwahinykre. Ywisidỹna txuu heka ibutuko-ò relyykre.

¹⁹ Tii heka rryrōtyhy rebureōtyhy heka inyō-wana widee. Tiu heka inyō roholaōtyhy irybe dee. Ryki heka inyō irybe-ò roholaōtyhy.

²⁰ Aōma bòtòreō irybòhòmny roiukeki. Tii raòròōtyhy. Txuheòtyjurà loosòna

urihimyòkeki heka tiu ruriõtyhy eleti-di.
Tii ritakre iaõbinana, inatyhynaõ binana
wahe.

²¹ Ibutumy heka iraròsòna iribi ritakre.

²² Hãbu rybeõ ruetàõ heka iny didydenyde
Jesuisi-ò wahe ralòmhyhÿreki wahe. Tii tyytybybina
iwo-ò ralòmhyhÿreki wahe. Jesuisi tyytybybina
riteònyre. Tai irue heka awimy relere rarybere.

²³ Ibutu iny sòwe heka heka ribedeòtiidÿÿnyre.
Widee tahe raryberenyre: –Ka heka Davi
riore riòre òsana rare, Deuxu deòdÿÿna wahe.

²⁴ Tahe fariseu mahãdu-ò roholare. Tahe
rarybere Jesuisimy: –Tii inatyhymy tyytybybina
riteònymyhyre inywo-ribi. Aõma tyytybybina
wedu ruru-di heka riteònymyhyre. Belisibu
ruru-di wahe. ²⁵ Jesuisi heka rieryre iraykyreny.
Tai tahe tamy rarybere: –Ijyymy heka tamy
rarybere. Iòlòna mahãdu wiribi ibutumy
rexihitxinykeki tahe rexihukre ibutumy
wiribireny. Tahe hãwã mahãdu taijoiy-ribi
rexihitxinykeki, awi aõkõ rare tai wahe.

²⁶ Wiribi rexihitxinyke wana. Tule awi aõkõ
rare tai wahe. Aõma Satanasi rexideònykeki
tahe tayreny-ribi rexitake. ²⁷ Belisibu ruru-di
tyytybybina ariteònyke wana aõdibohe aheludu
mahãdu riteònykemy ratximyhyre. Tiiboho
heka aywisidÿÿdurenymy ratximyhyre. ²⁸ Jiarÿ
Tyytybytyhy ruru-di ariteònykeki heka kaiboho
arurunareny Deuxu-ribi nade. Iòlòna adeereny
rehemynyre. ²⁹ Inyõ heka hãbu rurutere
hetowo-txi ralòõtyhy wasimy wahe. Tai
rawasinymy ratximyhykeki tahe urile juhoo hãbu
ritaataake. Idi tahe iheto-ribi aõdibo rawasinyke.

³⁰ Inyõ wabiòwamy aõkõ ihỹre wana heka, waòludu rare. Inyõ wawana ibutumy ratxiõmyhỹre wana tahe raybàtàmỹhỹre. ³¹ Inatyhymy jiarỹ adee anarybekre. Ibutu òraruna kanaixãwididỹỹke. Hãbu aõtxile aõbina bina rarybemyhỹre. Sohojile taruxãwidỹỹõtyhy. Aõtxile inyõ aõbina binamy Deuxu Tyytybytyhy rarybekeki. Tii aòraru rataõtyhy. Kia heka òraruna tiiehyymy rarekemy ihỹre. ³² Hãbutyhyhykỹ heka Deuxu riòremy aõbina binamy iny rarybekeki, wamy wahe, tii tahe ixãwidina dire. Deuxu Tyytybytyhyhymy rarybekeki, tii tahe iixãwidinyõhyre. Tiehyy kia òraruna-di rareke. ³³ Jesuisi rawesenanyre iny òwòru wese rare. Òwòru awimy rỹike wana, tai heka iratywihikỹõ-ki iny rahake. Ruru rasunymyhỹre raruburerimy ihỹre. Kia tasỹ iratywimy aõkõ rỹike ibinamy. Aõma òwòru iny rierymyhỹre aõbo iribi iraty dejuxunymyhỹde òraru-ki iny rierymyhỹre, awire. ³⁴⁻³⁵ Kaiboho heka hemylala mahãdu wesemy atximyhỹtenyte. Kaiboho heka abinatyhymy ahãtenyte. Timybo heka kaiboho aõwihikỹmy marybebenyke. Arayky aõbina bina hakỹlemy tõhõtinyteri wana. Tai taheka ary tuu ròhònyke ary tuu rarybeke. Aõma hãbu wihikỹõ ratxiremyhỹre wana aõnana wihikỹle tarayky-ki riyrubunymyhỹre. Tii heka rarybemyhỹre. Hãbu bina tahe tarayky-ribi ibinalemỹ rarybemyhỹre. ³⁶ Ibutumy aõmybo iny rarybemyhỹre heka ywisidỹỹna txu tuu rarybemyhỹre rierymy timykibo tuu rarybere wahe. ³⁷ Òrarukibo rarybere: –Arybe òraru-ki heka ywisidỹỹna-ki atxiteri. Bitakemy aõbo ada

aõkõre aõbo.

³⁸ Bedeerydỹdu mahãdumy heka fariseu mahãduõ tamy rarybereri: —Erydỹdu, wadeereny biteõsinyke awiwihikỹõ. ³⁹ Jesuisi dirawyõnyde: —Iny kamahãdu heka ibinatyhy rare aõ awiwihikỹ rexitõenymyhỹre. Abina binale wahe. Aõ wihikỹle bobiõtyhy. Tahe sohoji aõwihikỹõmy heka mohõtinyke. Jonasi widỹna wahe. ⁴⁰ Jonasi Deuxu rybeduõ widỹna wahe. Tii inataõ txu inataõ rummy uturahakỹ wona-ki ihỹmyhỹwesemy. Iwese Deuxu Riõre Hãbutyhyhykỹ bede-ki rarekremyhỹ wesemy inataõ txummy inataõ rummy. ⁴¹ Ninive hãwã mahãdu heka roholarenytxi tõhõtireny reare. Iu Jonasi rybe ritỹnydỹreure wahe. Tahe inyõ kaiboho tamy taholatenyte. Sõwemy heka iny Jonasi ratyremy ihỹre. Ihỹrele kaiboho ixitxireny õhõtireny reaõre. Ninive tamahãdu tahe ibinany adeereny rarybekre. Ywisidỹnatxu wahe. ⁴² Iòlò Hãwyyõ heka ibòò irehe-ribi nade. Aõma Salomaõ bede erydỹna-ò roholakemy. Kaiboho heka inyõ-ò taholatenyte. Salomaõ ratyre heka sõwe inihikỹ ihỹre. Ihãrele ta ixitxi nohõtireny reaõre. Ywisidỹnatxu heka Iòlò hãwyy ibinanamy kỹnarybekre umyreny wahe. Ywisidỹnatxu. ⁴³ Aõma tyytybybina hãbu-ribi ròhònykreu tahe elehyydỹna riijekre. Aõma bedebinana tõehekỹ tahe tuu reakre. Ihỹre tahe tai rahaõhykre elehyyna-ki wahe. ⁴⁴ Tai tahe ixidee rybekre: —Aròõsekre kỹhe. Iribi ranywỹhỹreò anakre. Tai tahe kia hãbu-ki rahara. Tyyrahakỹmy iwo-ki iruxeramy. ⁴⁵ Tai tahe ijõ-txi reare. Debò inatxi reurò tyytybybina-txi iratyre tyhy wahe ibinare.

Tai tahe ridyke tahãbu-ki rasỹnyrenykemy. Kia hãbu heka iwese juhu raremyhỹre ratyre ibinamy ratximyhỹre. Kaiboho heka kia tyytybybina wese atximyhỹtenyte.

⁴⁶ Jesuisi tahe ijõ-ò rarybere ijõ ijoi-ò, tai tahe ise rehemynyre, iseriòreboho-wana. Sõwemy iny mahãdu-ò heka rarybere. ⁴⁷ Inyõ tamy rarybere: —Inyõ heka arãijereri adi ahelỹỹna. Kie heka rehemynyreri adee rarybekemy adi ratxireri. ⁴⁸ Jesuisi dirawyònyde: —Mota heka nadireri, mota heka waseriòrereri? ⁴⁹ Tai tahe tebòhe riteòsiriteòsinyre taerydỹỹna mahãduõ-ò. Ka heka nadi rare. Ka heka waseriòrere. Ka ijõ heka waseriòre. ⁵⁰ Wahadeewi riwinymyhỹreki tahe, tii heka nadi rare. Waseriòre rare. Waha dori biu-ki ratximyhỹre.

13

¹ Itxu taheka Jesuisi rare heto-ribi Kalileia aho ijã-ò. Tahe tai ronyre. Tahe rexiterenyre Jesuisi iny ribedeerynyny. ² Tai ibututyhymy heka iny wirotyre. Tai tahe Jesuisi rexitareny urihimyò hãworo-ò ronony rexitaranyre. Iny sõwehekỹ mahãdu tahe aho ijãkile heka roholamy rỹimyhỹre. ³ Tii heka relyymyhỹre aõma ijyyõ relyyre: —Aõna aõna wese ijyy rawesenanyre. Hãbu alòbòròmy rara. Tii heka alòbòròna dehuu rare. ⁴ Ijõ heka idi rehumyhỹu heka ijõ ryro-txi resere. Nawii heka riròmyhỹre riore heka. ⁵⁻⁶ Ijõ tahe rejuxunyre aõma manarutysu-txi. Tii tahe raumynyre aõwesele. Iraruxiòlemy heka rỹimyhỹ suu ibutureki. Idi bedetòtee rimoedỹỹnyre. Idi tahe rure. ⁷ Òwòrudỹỹ resere edey-txi. Idi ta ruhunyre

edewanale. Idi tahe ede riòdesedỹỹnymyhỹre. Tai heka raratynyõlemyhỹre. ⁸ Ijõ tahe resere suwitxi-rawihikỹ-txi. Tai tahe sõwemy raratynyre. Sohoji õwõrutu-ribi tahe 30my raratynyre iraty wahe. Ijõ 60my raratynyre iribi. Ijõ ta 100my raratynyre. ⁹ Tahe Jesuisi heka rarybere: –Kia bohولاتyhymy bonyke. Õhõtirenydikeki bohولابenyke.

¹⁰ Tai tahe ierydỹỹna mahãdu Jesuisi ritỹỹraxinyre: –Aõherekibo kai ijyy-di bierynanykemy atxiteri, rawesenanyreri wahe.

¹¹ Tai tahe dirawyõnyde: –Kaiboho aõmybo Deuxu reerynanyre kaiboho bierybenyke. Ijõ mahãdu tiu ijyy rieryõtyhy. Kaiboho dori Deuxu Òlõna teerytenyde. ¹² Hãbuõ iaõdikeki ijõ heka iratyre tamy ariwahinyke. Tai tahe sõwemy tamy rauhenyke. Tahe hãbu ihoõkeki ibutelemy ijõdikeki heka kiale iribi ibutumy aritakre.

¹³ Retehe my ihãre tahe robiõhyymyhỹrenyre tahe ririõhyymyhỹre. Tai heka ijyy-di reerynany watzireri. ¹⁴ Iwese Isaia tyyriti-ki roire wese heka tiiboho ihỹrenyde:

–Roholamyhỹre, roholamyhỹre ihãre tahe rieryõhyymyhỹre. Retehe my ihãre tahe tiu robiõhykymyhỹre.

¹⁵ –Irayky tererenydeki wahe rieryõre heka. Õhõtireny heka ritòbõnymyhỹre ta ijohonana-ribi. Tarue ribrenymyhỹre robike lau. Tahe wadee ròðseõtyhy. Aõkõre heka ariteytenykemy idi watzimyhỹre. Tibo heka terareny aõkõre.

¹⁶ Jesuisi ijõ relyymyhỹre tamyreny: –Kaiboho heka eysamy atxitenyteri. Kaiboho

heka bobibenyke tahe bierybenyke. Aõmybo kaiboho tabitenyteri heka, taholatenyteri wahe. ¹⁷ Ihetxiu mahãdu, hÿÿna mahãdu wahe, tuu lobiximy riwisÿnymyhÿre. Aõma aõwobo kaiboho taholamyhÿtenyteò heka roholakemy riwisÿnymyhÿre tahe roholaõhyymyhÿre. ¹⁸ Tahe bohohake heka adee aritÿnynyke aõbo ijyy rare. ¹⁹ Òwòruty ryro-txi resemyhÿre heka iny ijoireny wesemy ihÿre. Ijohona tuuwesemy wahe. Tibo roholamyreny ihÿre tahe rieryõhyymyreny. Aõma Satanasi heka nade tai tahe warybe heka iribireny ritamyhÿre. ²⁰ Ijõ manarutysu-txi resemyhÿ mahãdu tahe ijõ ijohonadu wesemy heka roire. Tiiboho heka deysana-di roholamyhÿreny. ²¹⁻²² Tai tahe urihimyòle rityhynymyhÿreny aõhõkÿmy dÿÿnana kanakeu tahe aõwesele riatyke ririmy reake. Kia edey-txi resera tasÿ aõma ijõ ijohonadu mahãdu wesemy heka rare. Tiiboho heka aõma 1000 nierule aõnityhymy idi rõhõtinyinymyhÿreny nierudile. Tai tahe rexibedewonymyhÿreny. Tiu heka Deuxu aõmydÿÿna riwinyõhyymyhÿre, Deuxu Rybe riwiõhenanyreny. ²³ Kia suwitxira wihikÿ-txi resera wana tahe iwitxira ijohonadu mahãdu wesemy heka rare. Tiiboho heka roholamyhÿreny rityhynymyhÿre sõwemy Deuxu dee roholamyhÿreny heka. Ijõ 100my wesemy raratynyre. Ijõ 60my raratynyre ijõ 30my raratynyre. Iny sohoji sohojiõ heka Deuxu-ò aõ riwinyrerimy ihÿre.

²⁴ Idi tahe iwitxira ijyymy relyyre Jesuisi tamynyre: —Deuxu Iòlòna heka kia wesemy

ihÿre. Oworudu heka aõma alòbòròna wihikÿõ ritòbrònymyhÿre taoworuro-ò. ²⁵⁻²⁸ Tahe iòluduõ rummy heka tamy nade. Tahe iu ibutummy iny ròròmyhÿreu, asibinaty-di tamy rehure. Tai tahe alòbòròna asibina-wana ruhunyre kia aõma ede wana wimy urilemy. Taiki tahe kia aõma oworudu kia aõmysÿdÿÿdu mahãdu. Tuu heka ijyy-di nade tuu ijyymy. Idinodu rarybere: — Aõma waòludu heka kia riwinyre wadee. Idi oworudu narybede: —Aõhebohe arotÿÿnyrenykre? Ta idile aõbohe arisiherenykre araxirenyre. Tai tahe rirawyònyre: ²⁹⁻³⁰ —Aõkõre wahe, kia ibutummy alòbòròna rirarutxinykre. Ixinamy heka ratybienykre tii-wana wiurilemy kia maixõmo arixina bededÿÿnamy bede relerekeu tahe iribi raarike. Ararybekre heka tamy kia aõma oworu-di raaõmysÿdÿÿkreò. Juhu delemy asi arisykre. Tahe ritoonykre. Idi tahe maixõmo heka riarikre kia maixõmo hetowo-ò riyrubunykre.

³¹ Tahe Jesuisi ijõ ijyy witxiramy relyymyhÿre: —Aõma Deuxu Iòlòna heka aõma alòbòròna sõmo sõmo wesemy ratximyhÿre. ³² Aõma raumynyreeri heka aõma òwòru iyjatyhymy ibutummy òwòruty-ribi rariewesele relemyhÿre. Taiki tahe kia nawiile tuu rÿtÿnymyhÿre kia òwòru-ò.

³³ Uri paõ uri ixiòlòdÿÿna heka Deuxu Iòlòna wesemy heka kia ihÿre. Hãwyy heka paõ riwinymyhÿreu, riurinymyhÿreu tahe ibutummy raubÿtÿmyhÿre kia ibemy.

³⁴ Tai tahe rexiòlònymyhÿre Jesuisi heka sõwemy tuu relyymy raremyhÿ. Iu iny ribedeerynymy raremyhÿu. Tiiemy heka Jesuisi relyyhyy

raremyhỹ iu ròbedeerydỹỹmy raremyhỹu. ³⁵ Deuxu rybedu dori ihetxiu rarybere:

–Jiarỹ ijyy-di rebedeerynymyhỹre. Aõma tuu relyymyhỹre heka ierykõna rare. Tiuhe rieryõhyymyhỹre. Iu bede rexideelenyrauhyyle.

³⁶ Idi tahe Jesuisi rexitare iny sõwey-ribi rexitare. Hetõ-ò heka ralore. Tai tahe aõmybohe wakoreny inihe bedelyyke. Aòludu inybo arasỹnyremy. Kia ijyy heka aõma hãbu ede-di rehure ioworu-ò, taòludu oworu-ò. Kia inihe wadee bitỹnynyke aõbo rare wahe. Kia ijyy telyyté.

³⁷ Tai tahe Jesuisi tii dirawyõnyde: –Kia hãbu alòbòròna wihikỹ ribòrònyre heka Deuxu Riòre Hãbutyhyhykỹ, rare wahe. ³⁸⁻³⁹ Ioworu heka ibutu bede heka roimyhỹ wesemy roimyhỹre. Aõma alòbòròna wihikỹre heka ityhydỹỹdu iwese rỹirawesemy rỹira. Asi tahe kia ityhydỹỹdukõdu mahãdu wesemy heka ihỹre. Aõma kia iòludumy rarybereri tahe kia Satanasile heka ihỹre. Kia iyresynamy rarybereri aõbo bedekonana heka tuu rininimy heka tuu rarybereri. Kia ýju heka iyresydumyhỹ tuu rarybereri. Kia rimykre ede riorokremy rarybereri heka aõma ityhydỹỹdukõdu mahãdu heka tuu rininimy rarybereri. ⁴⁰ Ritakre heka rihitxinykre. Heòty bedehékỹ heka idi rehukre risòkre iu wahe. Iwesele taheka bedekonana heka rarakre. ⁴¹ Deuxu Riòre, Hãbutyhyhykỹ heka aõma ýju riteònykre ibutu iny ributunykre.

Ityhydỹỹdukõdu mahãdu ijõ iny òraruna-txi rityhedỹỹdu mahãdu heka ibutumy ributumykre widee. Ibutumy aõbina bina widỹỹdu

wahe.

⁴² Idi tii rihukre. Tai tahe ryrykre aõkỹmy rotỹỹnykre tai. Robumyhỹre taju. ⁴³ Kiau aõma

Deuxu hõrõ mahãdu tahe Waha Iòlòmý ronymyhỹre kie ronykre. Tiiboho loosòny wesemy heka ritoosònanykre txuu loosòna wesemy.

Õhõtirenydikeki ibutumý heka boholabenyke.

⁴⁴ Deuxu Iòlòna tahe nieru wesemy ratximyhỹre. Aõma nieru heka hynaõ-ki rahara nieru-di tỹximý aõma surawo-ki idi hãbu ixyby riwore. Tai tahe tii reysatyhymý ròðsere. Kia ibutumý taaõmydỹỹna-di heka rohonyre. Kia bedero riwykremý.

⁴⁵⁻⁴⁶ Ijõ tahe tule Deuxu Iòlòna wesemy ka ratximyhỹre. Iwese ixiura wydydu ihỹre wesemy heka Deuxu Iòlòna ihỹre. Iwydydu heka iijese iijesemy riwumyhỹre. Aõwi riererimý riererimý heka tai rahamyhỹre iruxera-ki tii tahe riwumyhỹre. Kiau tahe tai rahare aõ òwyhykỹõ-ki heka rahare. Tii idi tahe rohonyre ibutumý taaõmydỹỹna-di idi tahe kia iwydymý idi ratxireriò riwýre.

⁴⁷ Riãõ wese heka tule Deuxu òlòna ihỹre. Aõma riã-di iny rehumyhỹre wana heka ibutumý utura rimumyhỹre. ⁴⁸ Kia aõma idi tahe idi raixỹnymyhỹre riarimyhỹre iky-ribi. Aõma awi-di awihe riarirerimý iky-ribi. Ibinare rihitxinumý iribi. ⁴⁹ Kia bedekonana tahe iweselemý heka rarekre. Kia aõma ýju heka riarikre awi heka ibinau-ribi riarikre. ⁵⁰ Rehukre heòty bedebinakỹ-ò wahe. Tai ki tahe rirajuamýhỹkre ta aõhõkỹmy rotỹỹnymyhỹkre. Txuu rikýinymyhỹkre

⁵¹ Tahe Jesuisi tamy rỹraxire: –Kiamy ibutumy teerymyhỹtenyte? Tiiboho riraòwònyrenyre: – Kohe, reerymyhỹrenyre. ⁵² Idi Jesuisi rarybere: – Inyõ bedede ywina bedeerydỹỹna heka rityhynyreu, waheludu rarekreu wahe. Tii tahe iwese hãbu butudỹỹdumy ratximyhỹre wese heka ronymyhỹre. Tii heka ibutudỹỹna heto-ribi ritamyhỹre, tasỹ mahãdu-ò riwahinykemy. Aõ tyby aõ tỹmyra. Ibutumy heka ritamyhỹre.

⁵³ Tahe iribi Jesuisi rexitareu, ⁵⁴ tahe tahãwã-ò ròòsere. Judeu dohodỹỹna heto-ki ribedeerynyre. Tahe ibutumy ribedeòtiidỹỹnyre. Tiribibo heka tii bedeeryna rierymyhỹre: –Timyreki bohe aõwiihikỹ rierymyhỹre. Tii kỹny heka aõma òwòru besedỹỹwidỹỹdu riòre heka rare. ⁵⁵ Jyje riòre wahe. Marie heka tule rare ise wahe. Txiau, Simaõ, Jyje, Judasi-wana iseriòre ihỹre tule wahe inatyhy? ⁵⁶ –Iseriòre hãwyy heka tule kaki rasỹnymyhỹre inatyhy. Timyrakibohe aõna aõna ikòkò rierymyhỹre. ⁵⁷ Tahe rityhynyõhyymyhỹre heka tai wahe. Jesuisi tamyreny rarybere: – Deuxu Riòre Hãbutyhyhykỹ heka tiu tauludu wijirana hãwã-ki inyõ rityhynyõtyhy rybeduõ ihetomy ijirana-ki. ⁵⁸ Tai tahe aõna aõna wiwihikỹ heka tai riwinyõhyre, rityhynyõmyhỹreki.

14

¹ Kia bedeu tahe Herodi, Kalileia iòlò, Jesusini-ò roholare. Aõikòkò heka riwinymyhỹre. ² My heka rarybere teòdu mahãdu-ò: –Kia Joaõ Sebedỹỹdule aõbohe rubu-ribi riixixadỹỹnyre. Tai tahe tii aõikòkò riwinymyhỹre. ³ Herodi tahe juhUU Joaõ ròtenawo-ki riteònyre. Tii taseriòre hãwyy òraru-ki

kia wesemy riwinyre, Herodia òraru-ki wahe. Herodia heka Filipi hāwyy rare. ⁴ Juhuu Joaõ Herodi-ò rarybere: —Awi aõkõ rare. Kai dori aseriòre hāwyy-wana atxiteri. Uritere heriõmyke. ⁵ Tai tahe Herodi heka Joaõ rubudỹỹmy riwisỹnyre. Urile ruberumy judeu mahādu lau. Tamyreny Deuxu rybeduõmy rỹiramy Joaõ Sebedỹỹdu rare. ⁶ Herodi kai beòramy bede reareu tahe worana bedehesi ritxienyreny. Herodia riòre ijadõma heka iko-ò resemyhỹre. Iixe-ki tahe awimy Herodi rahare, Ijadõma luure wahe. ⁷ Tii tahe tamy rarybere kanakemy. Aõmybo wadee bexitòenykre. Inatyhymy adee ibutumy ariwahinykre. ⁸ Tai ise ijadõma-ò rarybere: —Aõma bexitòenykre: Sebedỹkỹdu ratilemy tamy bexitòenykre. Tai tahe ijadõma tamy rexitòenyre: —Wadeke bidiwyke Joaõ Sebedỹkỹdu rati, pratoro-ki. ⁹ Tai tahe iòlòhe rabadewore. Ibutu ijohonaru-ò dori tuu rarybere ijadõma-ò. Tahe ibutumy riwinyke rỹire. ¹⁰ Tahe ihārele iòlò heka soldadoõ riteònyre ròtenawo-ò kia Joaõ rati resymy. ¹¹ Inyõ diwyde pratoro-ki. Ijadõma-ò heka riwahinyre. Tahe tii tadi-ò idi rare. Riwahinyre. ¹² Idi tahe Joaõ erydỹỹna mahādu dioryde iumy, riwykremy, rituunykremy. Iribi tahe roirenyre Jesusiko relyre.

¹³ Kia roholareu tahe Jesuisi ròhònyre ixisohojilemy bederahu-txi. Hāwò-di rexitaranyre rare. Iny sōwemy bede-di ròirenyre ihemy titxibo iru-ki rakemy. ¹⁴ Rehemynyreu tahe iny sōwehekỹmy Jesuisi robire. Tai tahe Jesuisi riwotòenyre. Ibutumy riteytenyre webinadu mahādu. ¹⁵ Tahe

ratxioronyre. Tahe ierydỹỹna mahãdu tamy nade. Tamy rarybere: —Txuu ratxioronyra. Bederahy-ki dori atxiteri. Iny tahe biteònykre hãwãò-ò tai rỹsỹna ixidee riwykemy. ¹⁶ Tahe Jesuisi rirawyònyre: —Aòkõre, ariteònyõtyhy jiarỹ. Kaibohole tahe aõ tamy bidiwahinybedenyke. ¹⁷ Jiarỹboho kỹny diwatxiõnyreri iruyre orotxu-di, utura inatxire. ¹⁸ Tai tahe Jesuisi narybede: —Bidiwahiny wadee. ¹⁹ Jesuisi tahe ibutummy iny asityre-ki ronykemy risỹnyre. Orotxu in-aubiòwa, utura inatxi rỹire, utura-wana rimyre tahe ritehere biu-txi àlana Deuxu-ò riwahinyre. Idi tahe paõ riyreyrenymyhỹre teòdu mahãdu-ò riwahinyre. Idi rare iny sòwehekỹ-ò. ²⁰ Ibutummy iny riroxirenyre ihãre rihydyre. Kia iuhe-di ierydỹỹna mahãdu 12 weriri ritỹxinyre. ²¹ Hãbumy 5000 òsana rỹimyhỹre. Ihãre tahe uladu-di rariaòhyyre hãwyyboho-di.

²² Tahe Jesuisi taerydỹỹna mahãdu riteònyre aho kanawe-ribi ijà-ò reuròrenykemy hãwò-di. Jesuisi tahe rarire iny sòwehekỹ mahãdu rirybedỹỹmy. ²³ Jesuisi heka iny tahetoreny-ò riteònyremy rahudi tahe tii raòwònyre hãwãlò ratyy-ò ixitòdedỹỹmy. Taihyyle idi bede roronyre ixi sohojihyyle. ²⁴ Kiaule hãwò ahotya-ki rare. Òbò nihikỹy-txi ixinalemy ratximyhỹre. Tiò tiò òbò riwelòrò riwelòròmý idi rehumyhỹ. Yhy deade txura-ribi. ²⁵ Rudile tahe Jesuisi biura-di heka rare taerydỹỹna mahãdu-ò, beratyredile heka rare. ²⁶ Iu Jesusile betyredile tamy rarau tahe, tiibohe heka ruberurenyre. Rirajuarenyre: —Worỹsỹ òsana inydee rareri. ²⁷ Tai tahe

Jesuisi rarybere: –Aworeny bitamadỹnybenyke. Jiarỹle watzireri. ²⁸ Tahe Pedro rarybere: –Wanyrỹ, inatyhymy kai atxiteriwana heka wadee manyarybeke betyre-ki arariakemy. ²⁹ Tahe Jesuisi tamy rarybere: –Manake wahe. Aõwesele tahe Pedro hãwò-ribi ròhònymy reare, Jesuisi-ò rakemy. Betyre-ki rariare. ³⁰ Yhylemy tahe robure. Tii urile ruberure. Tai ijirahakỹlemy riwisỹnyra berahatxi-ò. Tai tahe Pedro rarybere: –Biwatakewa Wanyrỹ. ³¹ Tahe Jesuisi rimyre: –Ainatyhynakỹny ibutelemy atxiteri. Aõherekibo heka tiwatyhynyõteri. ³² Idi hãworo-ò wiwana rorukurenyre. Yhy ruhure. ³³ Ierydỹna mahãdu Jesuisimy realàre. Inatyhymy heka kai Deuxu Riòretyhy tate.

³⁴ Tai tahe reuròrenyrene Kenesare bedè-ò. ³⁵ Ibutumy iny kowa Jesuisi rieryrenyrene. Ti ibutumy webinadu mahãdu-ò relyyrenyrene Jesuisimy. Tahe hãwã ikòkò-ribi ritelenymy didydenyde. ³⁶ Tahe Jesuisi-ò rarybere. Ixinamy watyky-ò rerike, awimyre relerenykeny. Ibutumy tamy rerire heka reytère.

15

¹ Jerusalẽ hãwã-ribi bedè ywina bedè erydỹna mahãduõ dehemynyde Jesuisi-wana rarybekemy. Tiiboho-wana tule fariseu mahãduõ dehemynyde. Tiiboho heka Jesuisi-ò rỹraxyrenyrene: ² –Aõherekibo aerydỹna mahãdu tebòreny risuhòkòreri roxiko-ki. Inydeereny kia bedè ywina rare. Aõherekibo rityhynyõreri ihetxiu lahi rybe. ³ Jesuisi rirawyònyre yỹraxina-di: –Aõherekibo kaiboho Deuxu rybe tetyhynyõteri kaiboho lahirybele

tetyhynytenyte. ⁴ Deuxu bede ywina kawesemy rarybere:

—Boo adi-wana ibutumy heka bityhynybenyke. Inyõ rybebina tadi-ò tyby-ò rarybekeki. Tii tahe ruruke, tuu bede ywina rybe wahe.

⁵ Kaiboho tahe kawesemy tebedeerynytemy tewitxiranyte: Inyõ tadimy tybimy rarybekeki Wanieru Deuxu-ò wahisidỹĩnamy. ⁶ Tai tahe inieru-ei tyby tadi-wana riwiòhenanyõre kia bede ywina wixira tewinymahâte. Deuxu bede ywina rityhynyõreki. ⁷ Kaiboho itxerenadu mahãdu atxitenyteri. Isaia inatyhymy umy rarybereu:

⁸ —Kia mahãdu wadee rybe-di ri-wadeàlànanyrenyre. Wowydyna wadee riwahinymyhỹrenyre. Inatyhymy aõkõ heka kai tarybemahâte. Arayky dori Deuxu-ribi irehemy ratximyhỹre. Teerytyhyõlemy heka atximahâte.

⁹ Iwowydyna heka wadee aõ aõkõ rare. Wabede ywina ribedeerynyõtyhy. Texibedeerynymahãtenyte abede ywinarenydile.

¹⁰ Jesuísí rexidelenymy ribedeerynyre: — Boholabeny warybe-ò. ¹¹ Brebuna roxina-di biroxibenykeki, aõ adeereny ibinaõtyhy aõ aryrenymy ralõmyhỹre aõkõ heka ibinare. Ryribi ròhõmyhỹre heka ibinare, arybe wahe. ¹² Tai tahe Jesuísí erydỹĩna mahãdu Jesusiko rarybere: —Fariseu mahãdu kỹny tamy awiõre kia wiji tuu tarybeta wahe. ¹³ Tahe Jesuísí rarybere: — Aõhere aõkõ rare. Timyre aõkõ rare. Ixinamy tuu raryberenyre. Iorutere-di nohõtirenyõmy.

Kia fariseu bedeeryna lòbòròna wese rare. Waha ribòrònyõre. Ibutumy waha ribòrònyõre suribi mahãdu ritakre. ¹⁴ Inatxi hãbu ruetà widee ryò ritỹnynymyhỹre wese. Hãwãry-ribi wiwanale hãloo-txi resekre. Tiiboho ixinamy biribenyke. ¹⁵ Tahe Pedro Jesuisi-ò rỹỹraxire: — Wakoreny inihe biditynynyke, roxina brebuna ijyy wahe. ¹⁶ Kaiboho ibutu wese atxitenyteri. Teeryõtenyte. ¹⁷ Ibutumy iny aõ rirỹsỹmyhỹre weryri-di ramyhỹre tahe ròhònymyhỹre. ¹⁸ Tahe inyõ rybebinamy rarybemyhỹre. Tii iwo ibinare, irayky ibutumy ibinare tai wahe. ¹⁹ Raykywydyna binahakỹ-ribi heka òtaòtana, rubuna, wasina, ruina ujõmo inyry-ribi ròhònymyhỹre. ²⁰ Kia aõmydỹỹnana iny risurisumyhỹre, inydee ibinare. Tahe roxinako-ki iny tebò risuhòmymhỹré, kia tahe aõ aõkõ rare, ibina aõkõ rare.

²¹ Iribi tahe kia-ribi ròhònyreu tahe Jesuisi rare irehetytymy Tiro hãwã-ò Sidõ hãwã-ò. ²² Kana bede hãwyyõ tamy nade. Tahe tamy rexitòenyre: —Wahĩ, Davi riòkòre, biwaruxetoenyke hewa. Waritxòre heka tykytyby bina-di iwoku-ki ratximyhỹre. Anohòkỹmy heka idi rotỹkỹnymyhỹre. ²³ Tahe Jesuisi aõmy rarybeõhyre tamy. Taerydỹỹna mahãdu tahe rarybere: —Biteònyke hewa. Inyboho dori riixiranyrenyteri. ²⁴ Jesuisi tahe rarybere: —Jiarỹ Deuxu riwateònyre judeu mahãduòle, tabudoeni mahãdu iõre mahãdu wese wahe. ²⁵ Hãwyy ixityre nade. Tatiowotimy resere. TAhe ixityre tamy rarybere: —Biwawikòhenanyke hewa, Wahĩ. ²⁶ Jesuisi rirawyònyre: —Awiòhedỹỹna kia wese

rare aõma hãbuõ tariòre-ribi rỹsỹna riwyrta tahe idi rehura ijòròsaòle. Kiawese rarekre, jiarỹ arawiòhenanykeki. ²⁷ Hãwyy rarybere: –Inatyhy rare. Kuladu-ribi ano rỹsỹna resemyhỹre bedexi, tiki tahe itxòròsa ritxòre idi riwyy reakamy riròmyhỹre. ²⁸ Inatyhyy Jesuisi rirawyònyre: – Kai ainatyhyyna sòwere. Adeex ariwyykre aõmybo textitòenyteri. Iule iriòre reytemy rare.

²⁹ Tahe Jesuisi ròsere ixityre Kalileia ahokỹ-ò. Raòwònyyy rare hãwãlò-ò. Iratytyre ronyre. ³⁰ Sòwemy heka iny webinadu didyde: itiere mahãdu, iruetà mahãdu, irybeò mahãdu, aõ ikòkò heka bina bina wixira wixira idi rare. Jesuisiko-ò heka ritidirenyreki ibutummy riteytenyrye. ³¹ Iny rueta rỹira mahãdu itxeretyhyy riwyyrye. Rarybekòmy rỹira mahãdu, rarybemy rỹimyhỹ teysamy. Itiere rỹira mahãdu, rariamy rỹimyhỹ. Tai ibutummy iny ribedeòtiidỹnyrye heka tahe judeu mahãdu Deuxu-ò wowydyna riwahinyre.

³² Jesuisi rarybere taerydỹnyrye mahãdu-ò kanakemy. Tahe tamyreny rarybere: –Jiarỹ kỹny rewotòenyryeri kainy mahãdu rỹireridi. Inataò txummy bedexiera waki. Aõ heka ihokòre rirỹsỹrenykye. Iòwedỹkòlemy ariteònykeki heka ijò reseke ryrowetyakile. Rama riatyke. ³³ Tai tahe ierydỹnyrye mahãdu rarybere: –Inyboho bederahy-ki, titxibo heka rỹsỹna arimyykre iny sòwehekỹ-ò ariwahinyrenykye? ³⁴ Tahe Jesuisi tamyreny ritỹnyrye: –Tiwesebo roxina-di atxitenyteri. Tahe rirawyònyre: –Debò inatxi reurò orotxu sòmo sòmomy idi watxireri utura deyrye ijò rare. ³⁵ Jesuisi rarybere ibutummy iny

ronykemy. ³⁶ Tahe tíí rexitòenyre Deuxumy reàlàre. Orotxu, utura-wana riereerenyre tahe taerydỹỹna mahãdu-ò riwahinyre idi rakremy. ³⁷ Ibutumy riroxire heka kia iny sòwehekỹ ta rihydyre. Tabyre rahudi tahe riarire ierydỹỹna mahãdu. Tai tahe rahure tỹxihikỹlemy. Debò inatxi reurò weririmy heka ritỹxinyrenyre. ³⁸ Tahe 4000 hãbumy riòwenyre, kia txuu wahe. Uladu, hãwyy-di rariaõhyre. ³⁹ TAhe Jesuisi iny-ò rarybere tasỹ-ò ròòsekemy ixyby. Iribi tahe Jesuisi hãwò-di reuròmý rare Magadã hãwã-ò.

16

¹ Fariseu mahãdu saduseu mahãdu nade Jesuisi-ò iurihixidỹỹmy riitxenanyrenykemy: –Aõbedeerydỹỹnabo heka biu-ki iribi rexitòenyre. Biwateòsinyke heka aõwiwihikỹ-di biu-ò jiarỹboho arieyrenykre, kai inatyhy tate wahe. ² Idi tahe Jesuisi rarybere: –Kaiboho heka awirenyre biuwetyky erysy-ki. Jesuisi rarybere: –Kia rybe tarybemahãte. Txiorotxumy heka biuwetyy isòhòkỹra-ki, biurasòmý tahe awimý txu kedeakre. ³ Biurasou ibede lyby lybýmý txu-di kedeakeki tahe biu ròahyyhy bedé txu rariakre. Myhe tarybemahãte. Kaiboho heka iwitxira aõhebo rotỹỹnykre heka teerytenykõlemahãtenynte. ⁴ Iny kamahãdu heka ibutumy ibina binare. Tiu heka rityhynyõhyymyhỹrenyre. Rexitòenymyhỹrenyre heka biu-ò rityhynykemy. Tahe riwahinyõtyhy heka aõma bedeerynaõ. Kia Jonasi-ò bedeeryna rareõle tahe tamý rakre heka. Tahe Jesuisi rexitamý rare iribireny.

5 Idi tahe aho weribijà-ò reuròrenyreu tahe, tōhōtirenny rosare tarỹsñnarenny-ribi. 6 Jesuisi tamy rarybere: –Fariseu mahādu, saduseu mahādu iurina-ò bexiebenyke. 7 Ierydỹỹna mahādu tahe widee rarybere: –Tii kia rarybere iny orotxu diwyōdeki. 8 Jesuisi roholare aōmybo raryberenyre tahe tamyrenny rarybere: – Aityhynarenny urihimyōre. Aōherekibo orotxummy jiarỹ rarybererimny tahōtinytenyter? 9 Tiu kaiboho bierybenyōtyhy. Iruyrenny orotxummy remyrenny. Idi 5000 hābumny reōwenyrenny. Ihāre tahe weriri txỹxi tỹxihikỹlemny rỹimyhỹre rauhenyrenny. Itxi aōbo ōhōtirenny reakōmyhỹre. 10 Ixityrenny tasỹ 4000my reōwenyrenny, debō inatxi reurō orotxu-dī. Ixiyrubule rauhenyrenny. 11 Jiarỹ orotxummy rarybeōre. Fariseu mahādu, saduseu mahādu urina-ribi bexiebenyke. 12 Tai ierydỹỹna mahādu rieryrennyre aōmybo rarybemyhỹmny Jesuisi heka fariseu saduseu bedeerydỹỹnamny rarybereri.

13 Idi tahe Sesaria Filipi hāwā iōhōmny rehemnyrenny. Jesuisi rỹỹraxire taerydỹỹna mahādu-ò: – Inny wamny rarybereri. Mobo heka jiarỹ raremny heka wadi rỹireri. Jiarỹ Hābutyhyhykỹ rare, Deuxu Riōre wahe. 14 Ijō kỹny rarybemy rỹireri: –Kai riki heka Joaō Sebedỹỹdu atxiteri. Ijō riki Elia atxiterimny adi rỹireri. Ijō tahe Jeremiamny adi rỹireri. Ijō heka Deuxu rybeduō riki heka atxiterimny adi rỹireri. 15 Tai tahe Jesuisi rỹỹraxire taerydỹỹna mahādu-ò: –Mowexe watxirerimny wexe wadi tahōtinytenyter. 16 Simaō Pedro heka rarybere: –Kai Křistu atxiteri Deuxu deōdỹỹna heka tate. Kai heka Deuxu Riōre tate. 17-18 Tahe

Jesuisi rirawyònyre Pedro-ò: —Inatyhymy Pedro tate, Waha, biu-ki Mana ani rare. Boholake, ratximyhỹrele kia adee riteòsinyre. Iny aõkõ kia adee riteòsinyre. Wadohodỹỹna mahãdu kia mana tyre-ò ariwinykre. Rubu dori heka tiu ituedeõna. ¹⁹ Waiòlõna rayna heka adee ariwahinykre. Kabede-ki aõwidỹỹ adee binakeki tule biu-ki ariijõnykre. Aõtxiletxibo aõwidỹỹmy burukre tasỹ biu-ki tule adee ariwinykre. ²⁰ Jiarỹ inatyhymy Deuxu deòdỹỹna rare. Tuu ijyyrenyõmyke.

²¹ Iribi tahe Jesuisi itỹny relymy taerydỹỹna mahãdu-ò. Rurukremy heka relyre: —Arakre heka Jerusalẽ-ò. Tai heka matuari mahãdu, õnosõna bedeeryna mahãdu, xiwena wahidỹỹdu mahãdu-wana riwarubunykre. Inataõ txu-di tahe ixyby rubu-ribi adexixakre. ²² Idi tahe Pedro heka Jesuisi ridyre ijõ erydỹỹna-ribi tahe tamy rarybere: —Aõkõre, Wanyrỹ, tiu heka tiibofo ararubunyrenyõtyhy. ²³ Tahe Jesuisi rarybere Pedro-ò: —Waribi bexihitxinyke. Kai heka Satanasi weselemy atximahãte. Iwese kai taraykynymahãte heka aõ Deuxu deewinamy aõkõ tuu tahõtinyinmahãte hãbudeewile rare. ²⁴ Idi tahe Jesuisi rarybere taerydỹỹna mahãdu-ò: —Inyõ wawananomy rurukeki, ixi-ribi heka tõhõti rosake. Nomy rurukeki heka taitxeò rimyke idi tahe wahemy kanake. ²⁵ Inyõ wahemy rariakemy ixi-di rõhõtinyhyke wana heka irumy inonana irehemy ixi-di ratxikeki heka tii ihãrele ruruke. Inyõ taumy riõnonykeki waòraru-ki tai tahe tii ròtake. ²⁶ Inyõ heka ibutumy aõna aõna bedeki ributunykeki. Tahe ihãrele heka tii ruruke. Tule

umytuedeõna riõnonyre. Aõ tarasana tamy aõ aõkõ rare. Iny iruna riòwynyõhyymyhÿre, ixiyby tamy kanake wahe. ²⁷ Jiarÿ, Deuxu Riòre, Hãbutyhyhykÿ dori kanakre wana aõwesele. Taÿju loosõna-ki tii kanake.

Iny ibutumy ariòwynykre bibutunymy aõbo iny riwinymyhÿré heka aõwiwihikÿ aõbina bina. ²⁸ Iu jiarÿ, Deuxu Riòre, Hãbutyhyhykÿ, kanakeu tahe inyõ kaibohoõ tuu robikre, Iòlòmÿ kanakreu.

17

¹ Reare heka debò sohoji reurò txumy. Tahe Jesuisi ridyre Pedro, Txiau, Joaõ-wana. Joaõ tahe Txiau seriòre rare. Tahe raòwònyre tii-boho-wana hãwãlò ratòðhòkÿ ratyy-ò. Inyõ heka tii wana raõhyyre. ² Ikoreny-ki tahe Jesuisi rexi-witxiranyre. Iòsana heka roosòre. Txuwese-hekÿle relere iòsana heka ratÿrÿrÿnyre. Ityky tasÿ rauranyhÿkÿre. Tahe roosõna itoosònadihikÿre. ³ Iu tahe tuu robire Moisesi rubu, Elia rubu, Jesuisi-wana widee rarybemyhÿreny. ⁴ Tahe Pedro tamy rarybere: —Awire, Wanyrÿ, kawese watxirenyrerereri kaki. Adee wikeki hetomy ari-winyrenykre ijõ adeekre, ijõ ta Moisesiòkre, ijõ Eliaõkre. ⁵ Iu Pedro rarybereriule tahe biuwe-tyky urahakÿ relere. Iyribile rybeõ narybede: —Kia heka Wariòre waluu heka rare. Boholabeny irybe-ò. ⁶ Idi tahe ierydÿÿna tamy roholareu, tahe ruberure. Tahe reserenycre iòsanareny bede-ò. ⁷ Jesuisi tamyreny nade: —Breburenyõmyke hewa bodorukubedenyke heka. ⁸ Reteherenyre tahe Jesuisi sohojile tai rÿire.

⁹ Iribi tahe diberenydenyde hãwãlò ratyy-ribi, Jesuisi narybede: –Uritere waijyyõmyke inyko wiji tuu tabitimy. Iu jiarỹ, Deuxu Riðre Hãbutyhyhykỹ, rubu-ribi riixixanykreu tahe tuu belyykre. ¹⁰ Tahe ierydỹỹna mahãdu Jesuisi-ò rỹỹraxire: –Aõherekibo tarybetenyteri –Elia juhUU kanakemy ako-ò juhUU kanakemy. ¹¹ Jesuisi rirawyõnyre: –Inatyhy rare tii juhUU kanakre. Ibutumy heka bede riywinykre. ¹² Tule ararybekre kiamy: –Elia nade tahe ihãrele heka iny rieryõhyyre. Aõhõkỹmy risỹnyre. Iwese Elia aõhõkỹmy risỹnyre wesele tahe Deuxu Riðre Hãbu heka aõhõkỹmy risynykre, jiarỹ wahe. ¹³ Tai tahe Jesuisi erydỹỹna mahãdu rieryrenyde aõmybo Eliamy tii raryberemy Joaõ Sebedỹỹdule tahe Jesuisi rarybere.

¹⁴ Iribi tahe dòðsedenyde iny sõwemy riraõmy rỹimyhỹre. Hãbu-ò nade Jesusiko-ò tatiowomy resere: ¹⁵ –Wanyrỹ, ruxetðena wariðre-di biwahinyke. Irayky awimy aõkõ ratximyhỹre. Bera-txi resemyhỹre. Heòtyru-txi resemyhỹre. Ibutumy aõna aõna riwinyrerimy ihỹre. ¹⁶ Aerydỹỹna mahãdu-ò heka adidyde tahe tiu riteytenyõtyhy. ¹⁷ Jesuisi rirawyõnyre tamyreny: –Kaiboho isira mahãdu atxitenyteri. Aõ heka inatyhyna heka akireny ijõkõre. Tiwese bede dỹỹnana bohe araòludunyrenykre. Bedese inihe bididy uladu wadee. ¹⁸ Tahe Jesuisi rarybere kia uladuwo-ki ratximyhỹð: –Iribi wa bohonyke! Tahe uladu reytemy reare.

¹⁹ Idi ierydỹỹna mahãdu Jesuisiðle rarybere: –Aõherekibohe jiarỹboho tyytybybina iribi

reteònykõreri? ²⁰ Aõmareki kiehe ainatyhyna ibutetyhyreki òwòruty sõmowesele ainatyhyna dikeki heka kai aõwiwihikỹ biwinyke. Kai hãwãlò-ò marybeke: –Iribi bexitake! Tai tahe hãwãlò rexitake iwitxira suò. Aõ aõkõ adee isirake, ainatyhyna direki wahe. ²¹ Kia tyytyby bina iwitxira rare. Isiratyhyre heka. Kaiboho bexitòenybenykeki, binarehebenykeki, ixiery tyytybybina biteònybenyke.

²²⁻²³ Kalileia bedeki Jesuisi taerydỹna mahãdu-wana ributunyre. Tai Jesuisi rarybere tamy: –Jiarỹ, Deuxu Riòre Hãbu, rare. Tai inyõ riwahinykre hãbubinaõ-ò warubudỹmy. Inataõ txu-di tahe rubu-ribi adexixakre. Tai tahe ierydỹna mahãdu rabedewo nihikỹre.

²⁴ Iu tiiboho heka Kafanaõ hãwã-ò ritehemynyreu, inyõ Pedro-ò nade. Tii dohodỹna òwy butudỹdu rare. Tahe rarybere: –Awedu aõbohe tii rexiòwinykekõ. ²⁵ Pedro rirawyònyre: –Tii riòwynymyhỹre. Tai tahe Pedro rakemy reare. Iu Pedro tuu Jesuisi-ò rarybekemy hetowo-ò raloreu, Jesuisi juhoo rarybere: –Moribibo iòlò rexitòenymyhỹre òwydỹnamy. Mynydu mahãdu-ribi aõbo ada ta taijoiribile aõbohe rotamyhỹre. ²⁶ Pedro tahe rirawyònyre: –Mynydu mahãduòle rexitòenymyhỹre. –Inatyhy rare, Jesuisi rarybere. Ijoi mahãdu òsana riòwinyõhykymyhỹre. Jesuisi rarybere: –Ihãre tahe ròkòòwydỹkre. ²⁷ Òbitimy rakaòwònyrenykre. Kia Templo heto òwomy. Ibinamy kia iny-ò ariwinyõtyhy. Kai heka makre ahohokỹ-ò awaxi-di behukre. Juhu utura kanakrele heka bidimykre. Idi iry biraynykre. Tai nieruõ-ki

mahake. Iribi biditamy tahe makre iny òwydỹỹmy.

18

¹ Iule tahe Jesuisi erydỹỹna mahãdu tamy rehemynyre rỹỹraxire: –Mobohe Deuxu Iòlòna-ki nihikỹmy rarekre. ² Jesuisi heka ratximyhỹ uladuõ ibire-ki. ³ Idi tamy rarybere: –Kai uladu weseleõmy mabeõkeki, Deuxu Iòlòna-ò malòbenyõtyhy ⁴Uladu wese maraykynybenykeki heka, tii tahe Deuxu Iòlòna-ki inatyhymy rỹirakre. ⁵ Kai waòraru-ki uladu kawesemy biwiòhenanykeki tiwawiòhenanymahãte ⁶ Kai uladuõ òraruna-txi resekemy risỹnykeki, kai abinatyhymy atximahãte. Inyõ òy ritakamy reroti-di aratakemy heka inyõ adi rehuke bera-txi. Tii tahe awityhyre adee.

⁷ Sõwemy heka aõna aõna rỹira wary-ribi iny riatykemy. Tii adee ibinatyhyre. Tiiemy heka tuhy rarekre. Inydee heka ibinakre heka. Wary-ribi riòlòdỹỹnymyhỹre heka tamy ibinakre. ⁸ Ebò òraru-ki tahe wainatyhyry-ribi bexitakeki, ebò biòròmmy idi behuke. Awityhyre heka adee Deuxu Iòlòna-ò malòkre sohoji ebòdile. Inatxi ebò-di heòty bedebina-ò malòkeki, awiõre heka. ⁹ Tule arue sohoji òraru-ki kia òrarunamy beseke lau, urile bitake idi behuke. Arue wiò-di heòty bedebina-ò malòheny arue-di wiòle. Biu bedewihikỹ-ò malòke tahe awire heka arueyremy. ¹⁰ Iny nihikỹ ityhy iny yja mahãdu heka tuuõre. Uritere heka iweserenyõmy atxibenyke kaiboho bexiijebenyke tamy. Iny aõkõ mahãdu dori tii iỹju dire heka. Iỹjureny heka Deuxuko tii ibutumy relyymyhỹre turenny. Idi òhõtirenny-ribi

bosabenyõke. ¹¹ Jiarỹ Hãbutyhyhykỹ rare, Deuxu Riõre wahe. Ityhydỹdukõdu mahãdu ibutumy ar-itakemy anade. ¹² Rakawesenanykre heka kaijyy wesemy. Rakarybekre heka kahãbu 100 budoeni ijõdire wesemy. Sohoji heka iõre iy-ribi. Kia hãbu idi itxeredu tahe iy-ribi iõre rakre ijesemy. Iuhe tahe hãwãlò-ki riroximy ririre. ¹³ Tai rahakre wana heka teysamy ratxikre. Kia sohoji òrarukile reysakre. ¹⁴ Iwesetyhylemy taheka inyõ iõõtyhy Waha-ribi. Tamy dori kia ibinare.

¹⁵ Inyõ adee rexiòrarunykeki tahe tamy makre rybemy. Uritere inywitxirako-txi rybeõmy tuu. Tahe tamyhyylemy marybeke. Aityhydỹdu seriõre heka arybe-ò roholakeki, tahe ixi-txi tõhõti reake wana, ixi dee ibinamy rõhõtinyra wana, tai tahe kai ixyby tii-wana ityhydỹdu seriõre biõwamy beleke. ¹⁶ Aõhe wana tahe arybe-ò roholaõhykre, tahe ixityre make inyõ wana rexibiõwanymy.

Iny inatximy ixihe-ki bidyke. Tii tahe arybe-ò ijohonaduke inatyhy raremy arybera-txi resekemy wahe. Iu dohodỹna-ki rarybekreu, tai tasỹ tii rarybeke teõsamy aõkõ ratximyhỹrelemy rarybeke. ¹⁷ Tii irybereny-ò roholaõkeki, tai tahe dohodỹna mahãdu-ò belyyke. Tii irybereny-ò roholaõkeki, tai tahe biteõnyke. Tii iwese òrarudu mahãdu heka adee rarekre, bede dinodu-ò nieru wydydu wese wahe. ¹⁸ Iwese kaiboho waityhydỹdu mahãdu kabede-ki rõhõtinyre wesele, tule araykywesetyhyle Deuxu biu-ki rõhõtinykre. Aõbo adee kabede-ki aõwidỹ ibinare ada awire heka tule biu-ki ibinamy

rarekre, awimy rarekre. Arybe riwitxi-ranyõtyhy kowa biu bede-ki. ¹⁹ Iwitxiraõmy adeereny ararybekre: –Ijõ titxibo inatxi ada inataõ ityhydỹydu seriõre wiweselemy raraykynykre. Waha-ò rexitõenymyhỹreki iwese rexitõenyre wesele heka tamy riwinykre biu-ki. ²⁰ Titxibo waniõraru-ki inatxi, inataõ wii ributunykre heka, jiarỹ taile watzireri.

²¹ Tahe Pedro rỹraxire Jesuisi-ò: –Bede erydỹydu! Waityhydỹydu seriõre heka wadee rexiõrarunykeki, tiwesebo sõwe ariixãwidỹnykre ixi-ribi debò inatxi reurò, my aõbo? ²² Jesuisi rirawyõnyre: –Aõkõre, debòinatximy aõkõre, 490 wesemy wahe. Ixityre ixityre biixãwidỹnykre. ²³ Deuxu Iòlòna kawesemy rare: –Iòlòõ heka teòdu mahãdu kia contamy robikemy idi ratzireri. Tiwesebo inieru-di rasiranyre wesemy wahe. ²⁴ Sohoji teòdu juhoo dehemynyde. Sõwemy heka tevedỹyña ratximyhỹre, 1000,000 womati tỹrỹrỹhỹkỹ nieru wahe. ²⁵ Inieruõre heka iòwydỹyña wahe. Idi rohonykemy heka iwedu riteõnyre deòdu mahãdu wesemy. Tariõre-wana tahãwyy-wana ibutumy deòdumy roirekemy. Aõbo tai rỹimyhỹ heka ibutumy idi rohonyre. ²⁶ Tai kia deòdu heka tatiowotim� resere kia iòlòko-txi: –Waiòlòreny, txiòinihe biwaraòkre ariòwinykre ibutumy. ²⁷ Tai tahe iòlò riwotõenyre aõma ixinahykylemy ritusanyre. ²⁸ Tai tahe kia hãbu he rare kia urihim� tamy radevenymyhỹò heka rexinohõtĩdỹnyre. Tai tahe hãbu lòtikile rimy. Rierenymy resere ribòtòrarytxynyre: –

Bidiwaòwynykre kŷnyhe wijityhyle. ²⁹ Tai tahe tatiowomy resere, rarybere: —Txiokre inihe ariòwynykre ibutulemy. ³⁰ Tai tahe rirutyre ròtenawo-ò idi riòtenyre. Riwotòenyreòhyyre. ³¹ Itxeredu mahādu heka rabadewore tai tahe ibutumy relyyre iòlòko. ³² Tai tahe ixityre tamy rarariòwyre tamy rarybere: —Aòherewe, deòdu binahakŷ, jiarŷ araixāwididŷnyre ibutumy inatyhy? Kai dori ixitòedŷna wadee tewinyta. ³³ Aòherekibohe aleina kia adee nadevenymyhŷde kia teixāwidinyòta, iwese jiarŷ araixāwidinyre wese. ³⁴ Tai tahe tii rimyre reburere itere iòlò, tai imynomy riteònyre rotenawo-ò riòwynykre xiery riòlòdŷnykremy. Tai aòhòkŷmy rotŷnymyhŷre. ³⁵ Jesuisi rexihura narybede: —Kiawesele heka adeereny rarekre. Ityhydŷdu seriòre taseriòre riixāwidinyòkeki heka iwesele heka waha adi riwisŷnykre.

19

¹ Jesuisi ibedeerydŷna-ribi rexihureu, Kalileia bede-ribi ròhònyre. Bero Jordaò weribijà-ò reurora, Judeia hāwā bede kanawe-ribi ijà-ò rehemynyre. ² Tai tahe sòwemy iny webinadu mahādu rŷire. Idi tahe ihemy rare. Ibutumy riteytenyre. ³ Fariseu mahādu imynomy idi riwisŷnymyhŷre aòbinamy rarybekeki rimyky. Tai tahe tamy dŷraxyimy namyhŷde aòsirahakŷmybo: —Iny bede ywinareny tahāwyy riteònymyhŷre urirybelemy, wiribi reseky. ⁴ Jesuisi dirawyònyde: —Ritidŷnamy aòbo tariaòmyhŷte idi? —Deuxu ibutu widŷdu heka juhūu hābu hāwyy-wana riwinyre.

⁵ Idi tahe rarybere:

—Hābu heka tybyboho-wana tadibocho-wana
wiribi rexihitxinymyhÿre tai tahe
tahāwyywanale wii ributunymy rÿira.

⁶ Inatxi heka sohoji weselemy rarekre, hābu
tahāwyy-wana. Deuxu heka hābu tahāwyy-wana
ributunyre, inyō heka tiu rihitxinyōtyhy. ⁷ Tahe
ijōmy fariseu mahādu rityÿraxyre: —Aōherekibo
Moisesi kawesemy juhūu rarybere:

—Hābu tahāwyy riteōnykeki juhūu urile tyyriti
tamy riwahinyke riteōnykekoki.

⁸ Tahe Jesuisi kawesemy rarybere: —Kaiboho
heka ieryna urihimyōlereki aō isirareki heka kia
riwinyre. Juhūu tahe kawese aōkō rÿire. ⁹ Aōmale
tahe ixinamy riteōnyke ixi-ribi òta òtadule heka
aōwaxiny tuu riteōnyre ixi-ribi. ¹⁰ Tai tahe iery-
dÿÿna mahādu rarybere Jesuisi-ò: —Tahe kiawe-
sekeki heka uritere heriōmy hāwyyōmy, hābuōmy.

¹¹ Jesuisi tahe dirawyōnyde: —Kaa bede eryna
heka aō ibutuhukÿ-ò aōkō tureri aōma Deuxu
bede eryna tamy riwahinymy hÿreòle heka tureri.

¹² Aōtxi-ki tahe tuu hābuō rÿira hāwyy my heridumy
aōkō rÿira. Ijō hābuō tahe tiemy tunodumy
rÿirerimy ihÿre. Iwixira hābu-ò rexiwahinymy
rÿireriki heka tuu rÿirerimy ihÿre. Ijō tahe tuu
rÿirerimy ihÿre aōma Deuxu aōmysÿdÿÿna òraru-ki
wahe. Kaa rybe tahe inyō tahe rityhinykeki tii
inatyhymy rityhinyke.

¹³ Inyō didyde uladuō Jesuisi-ò tamy
rexitōenykemy tebò iraty tyre-ki roirerilemy.
Ierydÿÿna mahādu tahe uritere iixiradÿÿōmyke.

¹⁴ Tahe Jesuisi rarybere: —Ixinamy kanamyhÿke

uladu wadee. Uritere itinysÿrenyõmy. Uladu wesemy dori Deuxu Iòlòna ròtedu mahãdu ratximyhÿre. ¹⁵ Jesuisi tahe iratytyre tebò ritidire tamy rexitòenyre. Idi tahe Jesuisi rare.

¹⁶ Aõu tahe hãbuõ Jesuisi-ò nade: –Erydÿÿdu, aõhebo arotÿÿnykre. Aõma, timykibo umytuedeõna aritakemy wahe. Aõwidÿÿ wiwihikÿbo ariwinykemy. ¹⁷ Jesuisi rarybere: –Aõherekibo wadee aõwiwihikÿmy widÿÿ tÿÿraxiteri? Iny sohojile awi rare, Deuxule wahe. Kai bede ywina ibutumy bityhynyke, umytuedeõna hakÿ-ò molokre. ¹⁸ Aõbedeywinabo arityhynykre? Tahe Jesuisi rirawyònyre:

–Rubudÿÿõmy, Òta òta widÿÿõmy, wasiõmy, ruiõmy,

¹⁹ Adi boo-wana bityhynyke, iwese ixiluure wese heka abireludu mahãdu luuke.

²⁰ Hãbu rarybere: –Kia heka aõu aõu jiarÿ retyhynyre. Aõijõmybo arotÿÿnykre? ²¹ Jesuisi rirawyònyre: –Kai òbitimy mabekekile aõmydÿÿna-di ibutumy. Kia idi bohonyke òwy tahe biwahynyke urimynodu mahãdu-ò. Tai sõwemy aõna aõna biu-ki ahõrõmykre. Iribi tahe biwaheludunye. ²² Iu hãbu kia roholareu tahe rabadewonihikÿre inieru sõwereki heka rabadewore.

²³ Tai tahe Jesuisi taerydÿÿna mahãdu ribedeerynyre: –Isiratyhyre heka biu bede-ò ralòke aõma ityhy nihikÿkeki. ²⁴ Isirare heka aõma kamelo tyy rurena òtumy ralòke heka isirare, inatyhy? Tai tahe aõma ityhy mahãdu ralòke tarasanamy reake heka isirare. ²⁵ Jesuisi erydÿÿna mahãdu ribedeòtiinyre kai-ò roholareu. Tai tahe

rõhõtinyre: –Aõkõre isiratyhyre tuu ròte. Inyõ tarasanamy reaõtyhy. ²⁶ Jesuisi tamyreny retehere tahe rarybere: –Inatyhy rare hãbu-ò isirare. Deuxu dee tahe isiraõle rare. ²⁷ Tai tahe Pedro rarybere: –Jiarỹboho ibutumy aõmydỹnareny adiridenyde. Araheludunymy watxiwãhãre. Aõma ritarenykre? ²⁸ Jesuisi tahe dirawyònyde: –Kiamy heka adee ararybekre. Jiarỹ Deuxu Riòre Hãbu tyhyhykỹ wahe. Kaiboho heka tule borukubenyke aiòlònaryna-ki iu ibutumy ratỹmyrakreu. Kaiboho iny sohoji sohojimy judeu ijoio biywisidỹnanybenykre, waijoi waòinatxi reurò mahãduõ wahe. ²⁹ Inyõ kia ibutumy aõbo waòraru-ki ririmyhỹre iwese taheto ririmyhỹre waòraru-ki, taseriòre, tadi, tyby, uladu, taoworu, ririmyhỹre. Kia sohoji sohoji-ribi heka aõ sohoji sohoji òwymy 100 ritakre. Tule umytuedeòna ijõmy ritakre. ³⁰ Inyõ nihikỹmy ityhymy ratxirerimy ihỹre, tii iyjalemy relekre, aõma aõkõ tai relekre. Tule iyja nihikỹmy relekre. Sõwemy urimynodu kaki rỹirerimy ihỹre tahe biu-ki inihikỹmy rarekre.

20

¹ Jesuisi tasỹ riteòsinyreri ijyyõ timyrebo Deuxu Iòlòna. Hãbu aõmysỹdỹydu heka oworu widỹmy heka riteranymy tamy rarybemyhỹre: ² –Aõmamy araòwynykre, sohoji prata womati nieru, iwese ibutumy raòwynymyhỹre wese, sohoji txuòwy wahe. Tai tahe tii raaõmysỹdỹyre uva oworu-di raaõmysỹdỹmyhỹ. ³⁻⁴ Idi tahe tii reare 9 horau tule, txutyeyu tule, titxibo iaõmysỹdỹyña rỹireri titxibo hãbu teaõmysỹdỹmyhỹò. Tahe tuu robire urile ratximyhỹmyhe idi retehemyhỹ.

Tai tahe tamy rarybere: —Maaõmysÿdÿÿke hewa, waoworu-ki. Ikonana txu heka òbithyky araòwynykemy adi watxireri. ⁵ Tiiboho raaõmysÿdÿÿre tule. Txutye tasÿ ixiyrubule ijõ riteranyre aõma iwese kia juhoo ijõ-ò rarybera wesele. ⁶ Txuinyòbira-ò ijõ rimyre, tule ijõ txiorotxure. ⁷ Iruyre hora-ò ijõ tasÿ riteònyre. ⁸ Tahe txiorotxumy ròhònyra tahe kia iòwydÿÿdu tamy rryre. ⁹ Tahe 1 womati nieru tamy riwahinyre, sohoji hora raaõmysÿdÿÿre mahãdu wahe. ¹⁰ Tahe txusohojimy raaõmysÿdÿÿre tahe iratyre ròtakremy ixi-di ròhòtynyre. Tahe tule riòwynyra iwese ijõ riòwynyra weselemy, 1 womati nieru, sohoji sohoji wahe. ¹¹ Tai tahe rimyre nieru urile tamy rexibinanymy rarybere: ¹² —Kowa heka sohoji horale raaõmysÿdÿÿhãrele heka 1 teòwynyta. Jiarÿ boho tahe txuhyy raaõmysÿdÿÿra, bede tòtee-ki wahe. ¹³ Tahe iwedu rarybere: —Wabiòwa, adeereny rarybera. Wiji 1 womati nieru ariwahinykremy heka inatyhy? Tuheka adeereny rewahinyre. Aribi rawasinyora. ¹⁴ Boibenykre heka ibutumy araòwynyneri. Wiwesetyhylemy heka araòwynyrenyneri, iwese rarybere wese. ¹⁵ Hora sohojilemy raaõmysÿdÿÿraò sohojimy wanieru ariòwynykre inatyhy. Tamy wanieru ariwahinykemy ixideewimy, aõhe inatyhy? Aõherekibo tebureteri? Jiarÿ urihimyo raaõmysÿdÿÿraò wawiremy tarybetenyteri wahe. ¹⁶ Jesuisi tahe rexihure kia rybe-di, kiamykre bede: —Ikoludu heka ihewoludu-ò resekre. Ihewoludu tasÿ iko-ò resekre.

¹⁷ Tai tahe Jesuisi ròwònyre Jerusalẽ hãwã-ò.

Iny-ribi tawaò inatxi reurò mahãdu rihitxinyre. Tamy relyyre timybo aõhebo rotỹnykremy Jerusalẽ hãwã-ki: ¹⁸ —Jiarỹ, Hãbutyhyhykỹ adee ararybekre: —Inyõ riwawahinykre aõma-ò Xiwena wahidỹdu wedu mahãdu-ò. Tule diwatyhenykre judeu wedu mahãdu-ò. Tahe riwarubunykemý heka tiiboho wamy rarybekre ijõ iny-ò. ¹⁹ Tii heka riwamykre tahe riwawahinykre Roma iòlò-ò, judeukõdu mahãdu iòlò wahe. Ibinatyhymy aõhebo riwasỹnyny riwahetenyre. Itxeò nihikỹ-ò riwatamadỹnykre. Tahe txu inataõ-di rubu-ribi areixixanykre.

²⁰ Zebedeu riòrese Jesuisi-ò nade. Tatiowotimy resere tahe rexitòenyre aõmybo Jesuisi-ò tariòre-wana nade. ²¹ Jesuisi tamy rarybere: — Aõbo rare hãwyy rarybere: —Waritxòre inatxi hãbu rare. Tikiboho kỹnyhe, aikòlònykuna rynana-ki ronykre awana. Ijõ aruruna-txi, ijõ ahywe-txi wahe, kai aikòlòkuna-kò malokreku wahe. ²² Jesuisi heka iriòre-ò rarybere: — Kaiboho aõmybo texitòenyteri teerykõleteri. Kai Txiau, kai Joaõ, teerytenyte aõbo aõhebo wadi rotỹnykre arurukre dori jiarỹ kaiboho tulekre? Tiiboho dirawyònyde: —Tulekre. ²³ Tahe Jesuisi rarybere: —Inatyhy rare kaiboho tule aõhõkỹmy botỹnybenykre. Tahe mobo warora-txi ada waruruna weribi rynana-txi ronykre. Jiarỹ reerykõre. Wahale heka rieryre. Tiile tamy riywinyre. ²⁴ Idi tahe debòwiò ierydỹna mahãdu kia rieryre aõmybo Txiaku Joaõboho rexitòenyrenyrá. Tai tahe tiiboho rakyarananyrenyre. ²⁵ Tahe Jesuisi ibutumy

taerydỹña mahãdu tamy kanakemy rarybere: —Iny iòlò iruru dire. Ibutumy dinodu tahe kia weselere —taijoi mahãdu riteònymyhỹre. Teòdu mahãdu riteònymyhỹre. ²⁶ Tahe aõ tuukre aõkõ heka rare ayreny-ki. Inyõ dinodumy ixidikre heka deòdumy rarekre. ²⁷ Kia iny nihikỹmy ixi-di rexinohõtinyreri tasỹ aõ aõkõ tii rarekre. ²⁸ Iwese jiarỹ riwinyre wesemy heka rarekre. Hãbutyhyhykỹ aõ dinodumy aõkõ anade. Iwese deòdu rỹira wesemy heka nade waumy riwahinykremy rubu-ò kabede-ki. Tai sõwemy iny ritakre.

²⁹ Iu Ijeriò hãwã-ribi ròirenyreu, tahe sõwemy iny riheludunyre. ³⁰ Inatxi iruetãmy heka ronymyhỹ iu Jesuisi ibire-di rareu. Tiiboho roholarenyre kia Jesuisi raremy. Rexidelenyre ryryre Jesuisi-ò: —Davi riokore, wadee hewa ruxetòena biwahinyke. ³¹ Tai tahe iòhòmy iny iribi rỹimyhỹ rarybere: —Txiokre inihe, biyryke! Ixityre ryryre tarurutyhy: —Inynyrỹ Davi riokore, Biwawotòenyke hewa. ³² Jesuisi tamy rarybere: —Aõwexe adeereny ariwinykre. ³³ —Wanyrỹ, Kai wa bidiwaruenykre warue biraynykremy. ³⁴ Tahe Jesuisi riwotòenyre iruebymy reare tebò-di. Aõwesele tahe ruòmy reare. Tai tahe Jesuisihe riheludunyre.

21

¹ Jesuisiboho tahe rehemynyrenyre Jerusalẽ hãwã iòhòmy. Betabaji hãwã-ò heka rehemynyre. Kia Oliveira hãwãlò-ribi irehemy aõkõ ihỹre. Tahe Jesuisi inatxi iny riteònyre hãwã-ò, taerydỹña mahãdu wahe. Tamy rarybere: ² —Juhu hãwã dele-ò malokreule aõma bobikre, jumenta

tariòre-wana. Tahe bitaanalawekre ta bididykre kaò. ³ Inyò aratỹỹraxinykre wana, tai tahe kiamy bisỹnykre aõma: —Wawedu hewa idi ratxikemy rōhõtinyreri. Tai ki tahe ahemy kiditeònykre. ⁴ Kia ihetxiu ritidỹỹna tuheka relemy roimyhỹre. Kamy rarybere: ⁵ —Marybeke heka Jerusalẽ hãwã-ò:

—Deuxu Iòlòna heka kanakre adeereny wahe. Tii inihikỹ wesemy aõkõ kedehemynomy, jumenta tyre-ki heka kedehemynykre.

⁶ Tahe ierydỹỹna mahãdu riwinyre iwese Jesuisi rarybere weselemy. ⁷ Didyde tahe jumenta tariòre-wana. Ihetyreny jumenta tyre ritidire. Jesuisi ityre ronyre tahe idi rare. ⁸ Tahe inyõ sōwemy-ribi tahetyreny-di rehumyhỹre iryko-txi idi rariakemy ityre-di. Ijõ tasỹ hereru-di iryko-txi rehure iryube hetymy ityre-di rariakemy. ⁹ Sōwemy tai iny rirajuamy rỹimyhỹ iko-ò, ihewo-ò:

—Iòlò Davi riokore heka sōwemy iny wowydyna tamy iny riwahinyreri. Tii Deuxu Rìore Hãbu rare. Deuxu deysana heka tamy biwahinyke!

¹⁰ Jesuisi hãwãy-ki rehemynyreu, ibutumy iny ribedeòtiidỹỹnyre: —Mohãbuwe kia ralòreri Jerusalẽ hãwã-ki wahe? ¹¹ Tai tahe iny mahãdu rarybere: —Aõkõre, kia Deuxu rybeduõ rare. Jesuisi inire Kalileia bede-ribi Nazare hãwã-ribi dehemynyde.

¹² Tahe ralore Deuxu dohodỹỹna heto-ò. Tai kia aõna aõna-di rohonyreri heka riteònyre. Kia aõma nieru wiuròna iòwòruwebese tahe riatyre. Kia aõma bòtòe dohodỹỹdu ryna ibutumy ritxiwire

riatyre. ¹³ Tahe Jesuisi rarybere: –Deuxu Tyyriti rarybere:

–Dohodỹña heto heka waha heto rare, ixitòedỹña heto rare.

–Kaiboho heka inywasidu mahãdu-di tetỹxinytenyta. ¹⁴ Sõwemy iny itiere, iruetà, nade Jesuisi-ò dohodỹña heto-ò. Jesuisi taile riteytenyre. ¹⁵ Tahe xiwena wahidỹñdu wedu tuu robire. Tule judeu bede ywina bede eryna mahãdu robireu tahe, aõma uladu templo-ki ryrymy rỹimyhỹò aõma: –Davi riokore heka Deuxudeewina rare. Tai tahe kia rybe-ò reburerenyre. ¹⁶ Tiiboho tahe raryberenyre Jesuisi-ò: –Kai aõbo taholate aõbo rarybereri. Jesuisi rirawyõnyre: –Kohe, raholare. Kaiboho teeryõtenyte:

–Uladu dori wowydyna tamy riwahinykre. Tiu aõbo tariatenyõhyymahâte kia Tyyriti-ki.

¹⁷ Tahe Jesuisi iribi rõhõnyre Betỹnia hãwã-ò. Taile tahe ruu idi rỹire.

¹⁸ Biurasò txumy tahe tii dòòsede Jerusalẽ-ò. Tahe rama risare iu. ¹⁹ Òwòruõ tai rỹire. Tai tahe diaride figoraty-ò. Tahe iratyõre, txirule rỹire. Tai Jesuisi rarybere òwòru-ò: –Tiu heka kai maratynyõtyhy aõwesele tahe irade rairuxỹrure. ²⁰ Tai tahe ierydỹña mahãdu heka ribedeòtiidỹnyre: –Timykibo heka aõwesele rairumyrõmy reareri. ²¹ Tahe Jesuisi tamy rarybere: –Kai ainatyhyna ijõdikeki heka iwesele biwinyke. Iratyre biwinyke. Kaiboho heka bitxiõnyõkeki kaa hãwãlò-ò dori marybekre kiamy: –Iribi bexitake tahe aho-ò boikre.

Tai hãwãlò-ò aõwesele heka ahoro-ò roikre. ²² Aõtxile kai bexitòenykre heka adee ijõ rỹikre. Bityhynytyhykeki, tahe ibutumy bitake.

²³ Tai Jesuisi dehemynyde Deuxu dohodỹỹna heto-ò. Tai tahe ròbedeerydỹỹmy ratximyhỹ. Tahe xiwena wahidỹỹdu mahãdu, tule judeu bede ywina erydỹỹna mahãdu tule tamy dỹỹraximy nade. Tai tahe Jesuisi-ò rỹỹraxire: –Morurudibo heka kai aõmydỹỹnana tewinymahãte? Mobo heka arateranyre kia biwinykemy. ²⁴ Tai tahe Jesuisi tamy rarybere: –Kai aõbo myỹraxikeki wadee tai ako tuu arelyykre. Kai dỹỹraxinaõmy bidiwatỹnynykeki tahe, adee tuu arelyykre.

²⁵ –Joaõ Sebedỹỹdu heka morurudibo nade morybekibo tuu tadiwinymahãte wesemy. Morybekibo Joaõ iny risebenymyhỹre. Deuxu Rybe-ki aõbo ada iny rybe-ki aõbo. Tai tahe widee rarybe raryberenyre: –Aõma Deuxu Rybe-ki tuu ròsebedỹỹmyhỹre. Mykeki rakarybenykre taheka: –Aõherekibo tetyhynytenyõte myle tii risỹnykre.

²⁶ Aõmamy rikisỹnyrenykeki: –Iny rybekile tii tahe nade. Myỹ rikisỹnyrenykeki tasỹ kia ijoi inydeereny rakyarananyke. Joaõ Sebedỹỹdu dori ibutumy iny rityhynyrenyre moma tii Deuxu deòduõ ratximyhỹre heka. Rakarybenyõkre tahe.

²⁷ Tai tahe Jesuisi-ò raryberenyre: –Aõkõre, reeryrenyõre heka irawyòdỹỹ titxiribibo iruru nade. Tahe Jesuisi rirawyònyre: –Tule jiarỹỹỹraxina adeereny aritỹnynyrenyõtyhy. ²⁸ Ijõ

Jesuisi relyyre: –Timybo maraykynybenykre ka ijyymy arelyykre. Hãbuõ heka inatximy iriòre raremyhỹ. Tariòre dela-ò rarybere: –Dàà, maaõmysỹdỹỹkre waoworu-ki, wiji wahe.

²⁹ Tahe tamy dirawyònyde: —Waha, araòkre hewa. Ihãrele tahe tawo rirahòrere rakremy. Tahe rare. ³⁰ Idi tahe tyby rarybere helỹna-ò: —Kai tule makre waaòmysỹdỹna biwinykremy: —Dei wahe, arakre araaòmysỹdỹkre. Ihãrele tahe tii raòhyyre. ³¹ Adeereny inihe araỹraxikre. —Tibohe weryrybò aõma tybyrybe rityhynyre? Tai tahe dirawyònyde: —Juduludule irybe rityhynyre. Tai tahe Jesuisi tamy rarybere: —Iny òrarudu tyhy heka wydena-wana ralòkre biu bede ròtena-ò. Ihãrele tahe kaiboho birònybenyòtyhy. ³² Joaõ Sebedỹdu dori adeereny rarybere. Ihãrele tahe kaiboho ixitxireny aòrarureny-txi òhòtireny reakemy Deuxu bityhynkemy. Kaiboho heka teramy tekoamahãte tahe sòwemy òrarudu mahãdu wydena mahãdu rityhynyreny. Kaiboho tuu tabitenyte ihãrele teerytenykòte.

³³ Ijò ijyymy arelykre:

—Hãbuò heka uva oworuhukỹle ritòbrònyre. Tahe òtityna riwinyre. Tai tahe utà riwinyre yrubudỹdu mahãdu itxerenamy.

Tai tahe rihuòtere oworu wahe hãbu mahãduò-ò. Tii tahe rabetỹinymy rare taheto-ribi. ³⁴ Iu uva bederaty kia siredenamy bede reareu, riherehe txuramy ixidee ritxuakemy wahe. ³⁵ Tai tahe huòtedu mahãdumy heka teòdu mahãdulemy raòhòtere. Ijò tahe rirubunyre ijò manadile tamy rehunanymy rỹimyhỹ. ³⁶ Iribi tasỹ teòdu mahãduò didyde sòwetyhymy juhuna ludu ratyre. Tahe ixybyle tuu raòhòtere juhoo iwese tuu rotỹnyra wesele. ³⁷ Tahe iwedytyhy ròhòtynyre: —Aõma wariòrele kòri ariteònykre. Tai tahe wariòre rityhynkemy heka. Tahe tariòre

diteònyde. ³⁸ Tahe huòtedu mahãdu weryrybòmý robireu, tahe wideereny rarybere: —Kaa heka iwedu riòrele rare. Aõma iwedu rurukreu iaõna aõna, ioworu heka ixideereny rikimyrenykre.

³⁹ Tahe rirubunyrenyire iumy-di rehurenýre oworuro-ribi. ⁴⁰ Tahe Jesuisi rarybere: —

Adeereny arãÿraxikre aõbo iwedu tamyreny riwinykre huòtedu mahãdu-ò iu tii rehemynykreu wahe. Timybohe tii riwinykre? ⁴¹ Tiiboho dirawyònydenyde: —Kia rirubunykre ibutumy hãbu bina. Inywitzira-ò huòtenamy ele elemý wijuramy riatykre-ò riwahinykre. ⁴² Tahe Jesuisi tamy rÿÿraxire: —Kaiboho aõbo Ryberiti-di tariaõletenyteri:

—Mana-di heka heto widÿÿdu rehumyhÿre kia manale heto hàtxi-ki ritidimý roimyhÿre. Jiarÿ kia mana wese rare. Inynyrÿ Deuxu kia riwahinyre. Tai awi heka rare. Ijõ riwiòhenanyre, mana wahe.

⁴³ Tahe Jesuisi tamyreny rarybere: —Tule jiarÿ adeereny ararybekre: —Deuxu Iòlòna heka aribi ritakre. Tahe inywitzira-ò aribi riwahinykre. Inyõ txura wylemy riwahinykremý Deuxu-ò.

⁴⁴ Kia iny mana tyre resemyhÿkre heka tii heka wiòròmý ixòdumý rare. Mana inytyre resekeki tasÿ iny risurusurunya. ⁴⁵ Inyõ roholakeki kia aõbo aõma xiwena wahidÿÿdu mahãdu roholamy rÿimyhÿ tule fariseu mahãdu. Tule rexierymyhÿrenyire tiiboho Jesuisi turenyle rarybereri heka rierymyhÿrenyire. ⁴⁶ Tai heka tii mahãdu rimykemý idi riwisÿnymyhÿ tahe iny sõwehekÿ lau ruberumyhÿrenyire. Iny mahãdu dori idi rõhõtiny tii Deuxu rybeduõ ratximyhÿremý.

22

¹ Jesuisi heka rexidelenyire ijyymy relyykremy:
² —Timybo Deuxu Iòlòna rare ijyymy heka relyykre. —Iòlòò heka tariòre herinamy worana bedehesi riywinyre. ³ Iaõmydỹỹnana ròrarukõmy rỹidi tahe teòdu mahãdu iòrysomy roire. Rexihumy rỹireriki iaõmydỹỹnana, kanakremy wahe. Tahe òrysyna noderam y reare. ⁴ Ijõ riteònyre teòduõ iny ritobinykremy. Aõhere tahaka, wabroreni kỹnyhe rerubunyre heka. Ibutumy heka waaõmydỹỹna rehumy rỹireri. Tahe kedea kedea heka kòdòidenyke heka. ⁵ Tahe timy heka irybe rityhynyrenyõhyre. Iny sohoji sohoji tatyresidi-ijohona-ò, ijõ taaõmysỹdỹỹna-ò rea reare, ijõ taoworu-ò reare. ⁶ Ijõ lobidỹỹna reburere teòdu mahãdu dee. Tii teòdu dee heka rawobinare. Ijõ aõbina bina heka ritxienyire ijõ rirubunyre dori. ⁷ Tai tahe iòlò reburere lobidỹdỹna mahãdumy bina bina raòhòtedỹỹnyre, rirubunyre. Ihãwã ritoonyre. ⁸ Tai iòlò rarybere teòduboho-ò: —Waworana bedehesi rexihumy rỹireri ibutumy. Kia iny mahãdu ijoi juhuu retobinyra heka aõ ibina heka roire. Urile riòmisanymyhỹrenye. ⁹ Tai tahe ibutumy boibenykre hãwã-ò ibutumy iny-txi bekoabenybekre heka bitobinybenybekre ibutumy waworana bedehesina-ò kedea kedeakremy. ¹⁰ Tai tahe didyde iny wiwihikỹ, iny ityhy iny bina mahãdu. Hetowo tahe ritỹxire tỹmyra mahãdu-di. ¹¹ Tahe iòlò ralore hetowo-ò kia iny mahãdu dee rybemy. Tahe tii robire hãbuõmy kia worana bedehesi kia tykyõmy ratxirerimy. ¹² Tai tahe tamy iòlò rarybere: —

Waliiny, aõherekiwe worana bedehesi kia tyky-di aõkõ atxiteri? Kia tahe hãbu rybeõmy riijere. ¹³ Tai tahe iòlò aõma rarybere teòdu mahãdu-ò: —Bimybenyke kaa hãbu. Waa bitaataabenyke imy behubenyke tahe idi diòlòdỹmy idi rehukre luruhukỹ-ò. Tai Aõhõkỹmy dỹñnana-ki tai txuraruti rikyikyiny. Tai rahinykre. ¹⁴ Tai tahe Jesuisi rarybere: —Sõwemy iny heka kidirahukre tahe ibutemy kanaarikre.

¹⁵ Tai tahe fariseu mahãdu ròhònyre wii rotyre. Aõbinamy Jesuisi rarybekeule heka rimykyemy idi rỹimyhỹ. ¹⁶ Kia aõma fariseu ijoio heka riteònyre Jesuisi-ò. Tule Herodi ijoi mahãdu riteònyre. Rỹraxire Jesuisi-ò: —Erydỹdu, kai heka hãbuwi tate, hãbu òbiti. Kai heka tòbedeerydỹmahãte Deuxu deewinamy. Awire aõbo ariòwynyrenykre Roma hãwã mahãdu dinodu-ò. ¹⁷ Kai heka ixinamy aõma adee iny rarybererimy ihỹre. Timybo iny raraykynyrerimy ihỹre. Iny bede ywinareny aõbohe ixinamy nieru aõna aõna òwydỹnamy ròhònyke aõbohe awire? ¹⁸ Tai Jesuisi heka rierymyhỹ aõma awimy aõkõ tai rahareri heka rexierymyhỹre: —Kaiboho òbitimy aõkõ toite. Aõherekibo heka kai biwaitxenanybenykemy wamynomy wadi atxitenyteri? ¹⁹ Timybohe nieru-ki rakaharenykre aõna aõna òwydỹnamy. Biditeòsinyke kia-ò arierykremy. Tai tahe tamy riteòsinyre womati nieruõ. ²⁰ Tahe Jesuisi ritỹraxyre: —Motyytybybo koa rỹire. Monibo ityre-ki koa roire? ²¹ Tai tahe rirawyònyre: —Roma hãwã iòlònile tai roire. Tai tahe Jesuisi rarybere: —Tibo Roma hãwã iòlò nierubo heka tamy biwahinykre. Tibo Deuxu nierule tasỹ tamy

biwahinykre. ²² Tai tahe urile ribedeòtiidỹnyre. Tai ririrenyre ròirenyre.

²³ Tahe kia txule saduseu mahãduõ heka dòidenyde Jesuisi-ò. Rityhynyõhyymyhỹre kia aõma rubu-bibi ixixana heka rityhynyõhyymyhỹre, saduseu mahãdu wahe. ²⁴ Tamy rarybere: —Erydỹdu, Moisesi tyyriti heka kawesemy ribedeerynyre:

—Aõma hãbumy hãwyy heridumy roiukeki aõbohe timykibo hãwyy uladu-di ratxikeki. Hãbuõ iriòrekõ-di rurukeki tai tahe iseriòre heka iriòrese tyby-wana roiuke. Tai heka kia hãbu rubuweleu, kia deròwmy heka uladu ritybienyke.

²⁵ Aõu heka debò inatxi seriòremy kaki rasỹnmy raremyhỹ. Telareny heka roire hãwyy my tahe iriòrekõlemy rurure. Tahe ihãwyytybyhe kia iseriòrewanale roire. ²⁶ Ihelỹna sỹ tule rurure. Kia heka ibutumy debò inatxi reurò tii-wana roihyre iriòrekõule. ²⁷ Tahe hãwyy heka tule rurure. ²⁸ Tai tahe kia ruru-ribi rexixakreu tahe, tiwexe ihãbukre? Ibutumy dorihe tii-wana heka roilehekỹlera. ²⁹ Tai tahe Jesuisi rirawyònyre: —Kaiboho teerytenykõlemahãteny te timybo Tyyriti-ki roimyhỹre. Deuxu ruru tule teeryõte. ³⁰ Tiu iny rubu-ribi rexixakreu iwitxiramy rexixakre. Ýju wesemy ronykre. Timy heka hãbumy hãwyy my roiõtyhy. ³¹ Kaiboho heka tetyhynytenyõhyymahãteny te rubu-ribi ixixana. Idi heka tariatenyõhyymahãteny te timybo Deuxu rarybere? ³² Kiamy heka rarybere: —Jiarỹ heka Abraõ Deuxu rare. Ijai Deuxu rare. Ijaò Deuxu jiarỹ rare. Tii heka iru mahãdu Deuxu

heka tii ihÿre rubu mahãdu Deuxu aõkõ wahe. ³³ Iu iny sõwe ribedeerynyreu, tahe urile iny ribedeòtiidÿÿnyre.

³⁴ Fariseu mahãdu doidenyde Jesuisi-ò wii rotyrenyde. Roholareki wahe aõma saduceu mahãdu ribedeòtiidÿÿnyrenydeki. ³⁵ Bede ywina erÿdÿÿna mahãduõ rÿÿraxire heka aõmybo Jesuisi-ò. Tii rimykeny heka idi riwisÿnymy kia rybebinaõmy rirawyõnykeki rimykeny. ³⁶ Tahe rÿÿraxire: –Erydÿÿdu, tibohe aõbo bede ywina kia-ribi aõnityhymyhewe bedeòtiidÿÿnamy ratximyhÿre. Wakoreny inihe tuu bedelyykre. Tibo kidiòtiidÿÿnamy ihÿre. ³⁷ Tahe Jesuisi dirawyõnyde: –Iny Deuxureny iny iòlòreny luuke heka. Ibutumy awo-ribi heka iluuke, ibutumy aruruna-ribi, ibutumy arayky-ribi luuke heka. ³⁸ Tii heka inatyhy bedeòtiidÿÿna tyhymy ratximyhÿre ibutu bede ywina-ribi. ³⁹ Ijõ ihelÿÿna tahe iwesele heka rare: Iwese ixiluure wese heka ibutu luuke. ⁴⁰ Ibutumy Moisesi bede ywina heka juhoo rare. Tule Deuxu rybedu mahãdu erydÿÿna heka iribile rare. Kia bede ywina inatxi-ribi heka ibutumy iny bede eryna ròhònyre. Kia inatxi bityhynymy bohonykeki iuhe heka tetyhynymahãte.

⁴¹ Iu fariseu mahãdu iweroramy rÿimyhÿò tahe rÿÿraxire Jesuisi tamy: ⁴² –Mobo Deuxu deòdÿÿnamy ihÿre, Kristu wahe? Moriòrebo tii ihÿre. Tai tahe tiiboho rirawyõnyrenyde: –Moma Davi riokore òsana. Tahe ijõ Jesuisi rÿÿraxire: ⁴³ –Tai tahe aõherekibo Davi heka Wanyrÿmy rininire Deuxu Tyytybytyhy irybe riwiòhenanyreu

wahe. Davi dori kawesemy rarybere: ⁴⁴ Deuxu wawedu-ò rarybere.

—Bodonyke warurunawe-ribi, jiarỹ heka aòludu mahãdu-di arawo-txi.

⁴⁵ Davi tawedumy Kristu rininirehãre, timykibo Kristu iriokore riokorekre. ⁴⁶ Tahe inyõ heka Jesuisi rirawyònyõhyre. Tai tahe ruberumyhỹre tamy rỹĩraxike lau.

23

¹ Jesuisi heka iny sõwe nihikỹ ribedeerynymyhỹ taerydỹĩna mahãdu-wana. Tii rarybere: ² — Judeu bedeerydỹĩdu mahãdu heka Moisesi bede ywina bede erydỹĩna mahãduõ rare. fariseu mahãdu tule bede ywina riwinymyhỹrenyre. ³ Iwese ribedeerynyre wese tahe bityhynykre. Uritere iwese tii riwinymyhỹre wese uritere iwidỹĩõmy. Aõwidỹĩmy rarybemyhỹrenyrehãre tahe aõwitzira heka riwinymyhỹrenyre. ⁴ Tiiboho heka atyreneny riòðõnynihikỹmyhỹre bede ywina. Ihãre tahe rityhynyrenyõhyymahãrenyre. ⁵ Aõma òbitimy ratxike sỹny heka iny tamy roholamyhỹre ixi-di ratxirerimy ihỹre. Aõma walabu riòreõ heka rỹimyhỹre axiò-ki bede ywina heka ritidimy roimyhỹre ityky ijeti retydyna bede ywina-txi tõhõti reakemy tuu riwinyrenyre. Sõwemy heka iretydyna riwinyrenyre. ⁶ Ronymyhỹreu heka ikoòhòkỹle ronymyhỹre, worana bedehesina rỹi-wana wahe. Dohodỹĩna heto-ki heka tule ronymyhỹre, iko-ò tuu rexisỹnymyhỹ. ⁷ Hãwãy-ki iny tamy ryrymyhỹre: —Waerydỹĩdu, Habimy, kia tahe irybe-ki bede erydỹĩdu rare. Tii tahe tamyreny awire. ⁸ Tai tahe Jesuisi tamyreny

rarybere: –Kaiboho heka uritere Habimy inyõ adeereny irykõmy ihỹke. Deuxu sohojile bede erydỹỹdu heka rare. Ibutumy kaiboho seriõre wesemy atximahãtenyete. ⁹ Kasu-ki taheka inyõ heka tiu wahamy inyõ widee rarybeõtyhy Deuxu biu-ki ratximyhỹrele tuu bininibenyke heka. ¹⁰ Uritere Wawedu myỹ inyõ kia nidỹỹõmy. Deuxu deòdỹỹnale heka awedu ratximyhỹre Mesia wahe. ¹¹ Anihikỹmy xixi-di mohõtinykeki tahe, kia iny biwiòhenanyke. ¹² Kia ityhy rare xixi-di rõhõtinyinmyhỹre, tii heka ihewo-ribi rabadewokre. Ihewo-ribi tahe aõma aõkõ relekre. Kia iaõkõmy xixi-di rõhõtinykre tahe nihikỹmy heka relekre. ¹³ Belàhàxe! Kaiboho itxenadỹỹluku. Ibina adeereny kanakre, kai bede erydỹỹna mahãdu, fariseu mahãdu. Kaiboho uritere iny ròtedỹỹrenyõmy Deuxu Iòlõna-ò. Kaiboho birõnybenyõtyhy tule iny ròtedỹỹ-ò biebenyke. Kaiboho bexisỹnybenyke òbitinamy. ¹⁴ Aixitòedỹỹna rehereheki wahe hãwã ube-ki. Kaiboho urile iny teitxenanymahãtenyete. Aõma wytese urimynodu heka iheto-ribi teteònymahãtenyete kaiboho heka abinarenyre. Tai heka kaiboho yla aõkõ aõhõkỹmy botỹỹnybenykre. ¹⁵ Belàhàxe! Kaiboho ibutumy iny aratyhynyrenykemy xixi-di tahõtinyinmahãtenyete. Tai heka iny tesỹnymahãtenyete òrarudutyhymy wahe ixiratyre heka teijiradỹỹnymahãtenyete. Aòraru-ki heka aõhõkỹmy botỹỹnybenykre. Iny-di atxikemy heka tahõtinyinmahãte. ¹⁶ Kaiboho ruetà mahãdu wesemy kai ahãte. Kaiboho heka kia wesemy tebedeerynytenyete. Inyõ heka Deuxu bede eryna heto riwawiòhenanykeki heka aõna aõna ariwinykre. Myỹ marybebenykeki, heka

aõ aõkõ heka rare. Deuxu dohodỹyna heto womati tỹrỹrỹhỹkỹ-di marybekeki heka, tii heka rityhynyhy. Ibutumy heka kia bede ywina òta òta tewinymahãtenyte. ¹⁷ Kaiboho heka bede erydỹỹdu bede erytyhykõ mahãdu atxitenyteri dohodỹyna heto kia-ò ralòkeki. Aõbo bedeòtiidỹyna tyhyre womati tỹrỹrỹhỹkỹ aõbo ada dohodỹyna hetole aõbo teeryõte, Deuxu Dohodỹyna heto wahe. ¹⁸ Kaiboho tule tebedeerynyte kawesemy. Inyõ tarybe inatyhy-di rarybekeki, tai heka kia xiwena wahidỹyna-di rarybekeki, tai tahe tii rityhynyõkeki, awira. Tahe tii xiwena wahidỹyna tyre-ki rarybekeki tahe, tii òbitimy heka rarybeke. ¹⁹ Kaiboho ruetà mahãdu wese, kaiboho heka erydỹỹnakõdu mahãdumy toite. Aõbo awityhyre? Xiwena wahidỹyna aõbo ada ityre-ki wahidỹyna roimyhỹre aõbo? ²⁰ Wahisidỹyna heka wiwesele rare. Aõma xiwena tyre-ki roire wana tule wiwesele rare. Aõma xiwena tyre-ki roiõre wana wahe heka aõ aõkõ rare. Xiwena utàle heka rierymyhỹre inatyhy rare. Myheka kai mararybekeki heka tai tahe kai heka xiwena utàlemy tarybeteri. Ibutumy iny ityre-ki rỹire bohomy tule heka tai tuu tarybeteri. ²¹ Deuxu dohodỹyna heto òraru-ki kai koityhyxemy marybekeki heka tai heka kai dohodỹyna hetomy tarybeteri hãre tahe Deuxu iwo-ki ratxirerilemy tuu tarybeteri. ²² Biu òraru-ki ka koityhyxenyteri marybekeki, Deuxusỹmy tarybeteri. Tii dori tarynana-ki ronyreri. ²³ –Belàhàxe! fariseu mahãdu! Kaiboho heka itxenadỹỹdu mahãduõ toite. Tule bede ywina bede erydỹỹdu mahãdu. Adeereny heka ibinamy ratxikre. Arỹsỹna uri

juraõ heka kai Deuxu-ò tewahinyte, hortelã, erva-doce, cominho wahe. Kaiboho heka aõninihikỹ tetyhynytenyõhyymahãtenyete. Iwese õbitina, ruxetõena, inatyhyna kia-ribi heka õhõti losamyhỹre ibutumy. Aõmydỹỹna jura wahisidỹỹna heka awi rare. Tahe tule uritere õhõti losaõmyke aõwitzira-ribi wahe. Aõbo bededõtiidỹỹnare bededõ ywina-ki. Kaiboho heka bededõ erydỹỹdu toite hãre tahe teerytenyõte. ²⁴ Belàhàxe! Kai hãbuõ wese rare. Tiiboho imona berareny-ribi ohoruxõmo riarimahãre. Ihãrele tahe tiiboho irõdu nihikỹ rirỹsỹmyhỹre. Iwesele kaiboho tule terỹsỹmyhỹtenyete. ²⁵ –Belàhàxe fariseu mahãdu, bededõ ywina bededõ erydỹỹna mahãdu. Amona deoreny tesuhõmahãtenyete iwe. Iwo tahe ka isuhukỹlemy rỹimyhỹre. Itxenadỹỹna rỹire. Aõma aumy weselemy heka kia ratximyhỹre. Aõma aumy heka webõrõsityy tyrare heka. Araykywo-ki tahe ibutu itxenadỹỹ heka tai rỹimyhỹre. ²⁶ Belàhàxe fariseu mahãdu! Kaiboho taruetà mahãdu. Kai mona hynawo bisuhõke heka biõtinyke. Aõma bisuhõke ihỹre tahe arayky bityranykre. Tahe ibutumy heka aumy ryranykre. ²⁷⁻²⁸ –Belàhàxe fariseu mahãdu! Kaiboho heka koityhyxenyteri. Rubu heto wiwihikỹ ixideereny tewinymahãtenyete. Kaiboho heka iwesetyhylemy toite. Aõma webõrõsitylydu heka iruxeramy idi toite. Aõma aworeny-ki tahe aõma iny rubu idi ròhòkỹdileka atxitenyteri mahãtenyete. Ibutumy aõbina bina awo-ki arayky-ki idi atxiteri mahãtenyete. Aumyreny-ki heka tykywihikỹ texitykyny mahãtenyete. Aõma hãbu wihikỹwesemy. Hãbu õbitimy matxibenyke myheka iny adi

rõhõtirenykemy heka tuu texitykynymahãtenynte. Araykywo-ki tahe arimyrenywo-ki tahe ibutu itxenadyỹna-di heka toite, òrarudu mahãdu toite. ²⁹ Belãhãxe! Tai heka kaiboho Deuxu rybedu mahãduõ rirubunyre. Kaa nohõti ijaranamy tuu tewinymahãtenynte. Awabederenywo-ki heka noijasa ruxerahakỹle tetidite. ³⁰ Kaiboho heka tarybemahãtenynte. —Tiu wahareny riwinyre wese heka ariwinyrenyõtyhy. ³¹ Kiamy tarybetu heka hãbu bina riõremy texininite. Bowesele toite. Iriõre toite. ³² Iwese juhUU ibinamy riwinyre wese heka iwesetyhyle aõhebo tatỹỹnymahãtenynte. ³³ Iwese hemylala deborehekỹ wesemy heka kaiboho atximahãtenynte. Boreny tule iweselere. Timybo heka kaiboho heòty bede-ribi mahenybenyke? Kaiboho heòty bede-ò boibenyke. ³⁴ Adeereny ariteònykre aõma Deuxu rybeduõ hãbu erydu, tyyriti erydu wahe. Kaiboho bidirubunybedenykre. Ohodyỹna heto-ki ijõ bidihetenybedenykre awaru hetenaõ-di. Itxeòtyre-ki ijõ bidirubunybedenykre. Ijõ heka biheludumykre hãwã hãwã-ò tamy ibinamy riwinykremy. Aõhõkỹmy dỹỹnana heka tamy biwahinybenykre ijõ hãwã-ò rakreu. ³⁵⁻³⁶ Kia heka hãbu ibutumy rurure tyby òraru-ki wahe. Dohodyỹna hetowokile rirubunyrenyre. Kaiboho Abeli juhUU terubunytenynte ikonana tahe Zacaria, Barakia riõre wahe. Òbitityhy juratya-ki heka tuu tewinytenynte. Wijinabòdu mahãdu tai aõhõkỹmy rotỹỹnykre. Ibutumy ibinamy kai atyre-ò kedeseke. ³⁷ Jesuisi ikonana tahe rarybere: —Jerusalẽ hãwã mahãdu, kaiboho heka

terubunytyente Deuxu rybemy rybedu mahādu. Jiarỹ heka aramykemy adi rewisỹnyreri wariõre wesemy tahe waderarenyre kaiboho. Iwese hānieõ iriõre ridyre wese idewo-ki. ³⁸ Aheto heka ixisohojilemy rỹimyhỹre. ³⁹ Kaheka ararybekre adeereny: –Wamy heka bobiōtyhy ixityre. Kai heka Deuxu deõdỹỹna bidykreule wamy bobikre. Iu rarybereu, Deuxu deysanamy, wamy bobikre.

24

¹ Iu Jesuisi rõhõnyreu dohodỹỹna-ribi, ierydỹỹna mahādu tamy rarybere dohodỹỹna heto itxeremy rõikemy, eleri-ò wahe. Tai tahe Jesuisi dirawyõnyde: ² –Inatyhy rare, awi heka rare. Urile tahe kidiixāwididỹỹnykre heka. Timy heka manaõ wityre-ki roiõhyykre. Ibutumy bede-ò idi rehukre. ³ Iribi tahe Jesuisi rehemynyre Oliveira hāwālò-ò heka ronyre. Tai tahe erydỹỹna mahādu tii ritỹỹraxinyre iny sõwe-ribi: –Tiubohe ibutumy kedeixixāwididỹỹnykre. Tiuboho ibutumy bede konanadỹỹnamy reakre. Timybohe rikieryrenykre kai bedehemynyke aõma bede ibutumy rexihukre. ⁴ Tahe Jesuisi tamy rarybere: –Uritere inyõ aitxenadỹỹõmykre. ⁵ Sõwemyhe iny itxenadỹỹnamy rỹirakre. Jiarỹ Kristu rare, Deuxu deõdỹỹna heka jiarỹ rare, myheka adee kanarybekre. ⁶ Kaiboho heka boholamy mabekre iny aõbina rõhõnymyhỹkre: boholamahākre. Ihāre tahe iny rarybekre aõma: –Karibi heka aõbina urihimyõ rõhõnykre. Myhe rarybemahākre. Ihārele tahe kòdòõseõkre aõma ikonana urihimyõ. Ibutumy heka kia wesemy relekre. ⁷ Aõma kia wesemy heka bede roimyhỹ

rarekre aõbo iny witxira witxira heka ibutumy iòlòna heka riteranymyhỹkre. Aõbinamy. Tai heka raaõbinanymy rỹirakre. Aõma rama ijara reakre. Bede ibutumy ramytatakre hãwãõ-ki. ⁸ Kia heka iwese hãwyy uladu dese wesemy robumyhỹre wese tukre. ⁹ Adeereny heka aõhõkỹmydỹñnana tiiboho riwahinykre aõma wani òraru-ki wahe. Ijõ kaibohoõ heka ararubunyrenykre. ¹⁰ Sõwemy heka iny riatymyhỹkre wary-ribi heka riatymy ririmyhỹkre. Wii rityhenymyhỹkre. Widee rakyarananymyhỹkre. ¹¹ Rybebina rybeduõ heka sõwemy kedehemynykre tahe kia heka sõwemy iny riitxenanymyhỹkre. ¹² Iu heka òraru nihikỹ iu ròhònykremy roimyhỹre. Sõwemy heka luuna-di rỹiramyhỹ katahe wiji ixãwikre heka ihomy aõkõ relekre. ¹³ Kia idi hyy rỹirakre ikonana-ò. Tii mahãdu tahe tarasanamy reakremy rỹira. ¹⁴ Ibutumyhe kia iny-ò rybe tỹnydỹñnamy reakremy rỹira, Deuxu Rybewihikỹ Tỹmyra wahe. Ibutu iny witxira witxira heka roholakre rybe wihikỹ-ò. Kia rahudi hikỹle heka taheka kedehemynykre heka ikonana. ¹⁵ Aõbinahakỹ tyhybohe ibinatyhy rỹikre. Tii heka rỹikre heka aõma Deuxu ubetyre-ki, Deuxu isỹ-ki, kiaweselemy heka rỹikre. Bieryke aõbo kia rare. Bieryke aõbo kia rare Danieli heka Deuxu rybeduõ ihetxiu kiamy heka rarybere:

¹⁶ —Judeia mahãdu bede-ribi tahe kia biheny-benyke. Ibutumy heka bõibenykre hãwãlò bede-ò biòturònykre.

¹⁷ —Kia bededỹñnanau heka tiu aõ bimyoõtyhy ahetowo-ribi. Tiiemy heka ròhònyhykyle

rakre aõwesele wahe.

18 Iu bedero raaõmysÿdÿÿkreu heka tiu kòdòòseõtyhy tatyky itxemy. 19 Tule aõma hãwyy bõtòmy rÿira kia bedeu aõhòkÿmy rotÿÿnykremy rÿira. Kia tohouã-di ratxireri tahe tamy isirakre heka itybiedÿÿ idi rakeò heka isirakre. 20 Bedejutytykòkemy heka bexitòenyke ahena mahenykeu. Tule sabado txu aõkòkemy bexitòenyke. 21 Tiu heka aõhòkÿmy dÿÿnanamy iny rotÿÿnyõhyymyhÿre kaa aõhòkÿmy dÿÿnana nihikÿmy. Tule tiu tuu robiõhyymyhÿre. 22 Kia Deuxu irokorehemykre wana heka ibutumy iny ituekre. Kaa urihimyòlekre wana tahe kai Deuxu hõrõ mahådule tuukre. 23 –Aõma Mesia heka kowa-ò rehemynyra, Deuxu deòdÿÿna wahe. Ihãre tahe kai heka inyõ adee rarybekeki tahe tetyhynyõhyyte heka. 24 Kia iu kedehemynykre tahe aõ Kristu tyhy aõkò heka rarekre. Aõma rybedu itxenadÿÿdu heka tule aõna aõna wiwihikÿ riwinykre. Aõma ityhydÿÿdu dori riitxenanykemy idi riwisÿnykre: 25 Boholake, juhuu dori adee relyyleri ibutumy aõhebo rotÿÿnykre. 26 –Aõma arateòwarinyre dori tuu. Kia Mesia, Deuxu Deòdÿÿna heka ròðsereri. Beteheke bederahy-ki, tule hetowo-ki. Iu tahe timy heka tamy itxeremy raõtyhy inatyhy aõkòreki. 27 Iu jiarÿ Deuxu Riòre Hãbutyhyhykÿ arehemynykre ibutumy heka rierykre loosòna delaana wesele heka wadehemynyna heka rarekre biu ibutumy ritÿxinykre. 28 Iwese aõ rubu roimyhÿre, rara heka tamy rabutumyhÿre. Kaiboho rierykre iu rehemynykre. 29 Iu kia bede dÿÿnanamy reakreu tahe txulyby heka

kòdòhònkykre. Ahãdu tule rybynykre. Taina tule ixewesehekỹle kanakre. Ibutumy ramytatakre biu-ki. ³⁰ Iule tahe kia wadehemynynamy iny robikre. Sõwemy heka hinana ibrunana bede bedemy rỹirakre. Ibutumy heka iny robikre wadehemynynamy biuwetyky-ki, jiarỹ dori, Deuxu Riòre, Hãbutyhyhykỹ rare. Loosòna ruruna sõwekreu, tahe arehemynykre. ³¹ Tule wajuròna-di, ŷju aditeònykre iu, ajuròna wodỹhỹkỹ-di. Tahe ibutumy wahõrõ mahãdu he ixidee aributunykre bede bede-ribi, ibutu rehetyhy-ribi wahe. ³² Jesuisi tule relyyre: — Ijyyõmy heka ako arelyykre. Kai heka ibede erylumy bimynykre. Iu kia figueira òwòru hãbu wiji tybiehekỹ. Kia aõma iruru tỹmyra rurunymyhỹré. Tule aõma txirubò tỹmyra ròhònkykre. Tiu tahe bierykre. Kai iòhòra bohe wyra. Myhe tamy besekre. ³³ Iwesetyhyle taheka kai heka bierykre. Aõma wadehemynyna ròhònny relekre wahe aòbitikre wadehemynyna iu, aõhõkỹmydỹnana wahe. ³⁴ Tiu kia bededỹnanaule heka bedekõnyna rexihukre. ³⁵ Biu heka bede-wana ituekre warybe tahe aõu aõu heka rỹihyymy rarekre. ³⁶ Inyõ heka rieryõhyymyhỹre. Tiubo txuu ruu kai konany rỹimyhỹre wahe ŷju dori tiu rieryõhyymyhỹre. Aõma, jiarỹ Deuxu Riòre dori rieryõre. Aõma Waha Deuxule tahe rierymyhỹre. ³⁷ Noe bededỹnana wesemy heka rỹimyhỹkre iny risinykre kia bedeu. ³⁸ Ibutumy heka worana bedehesi rỹikre kiau. Lisisò tahe rỹikre. Herina lisina aõma hãwyymy herina. ³⁹ Tahe Noe bededỹnana wesemy heka reakre. Iu heka

beòra rariare. Tahe rityyhynyõhyyre tiiboho. Tahe heka raòwònyre rariare ibutumy ituere. Iwesele tii heka rarekre heka, wadehemynyna Deuxu Riòre Hãbutyhyhykỹ wahe. ⁴⁰ Inatxi hãbu heka oworu-ki raaõmysỹdỹkre. Ijõ heka rakre dynamy reakre. Ijõ tahe rarikre. ⁴¹ Tule inatxi hãwyy heka raaõmysỹdỹkre heto-ki ratxikre mai risyrenykre. Ijõ heka dynamy reakre ijõ heka rarikre. ⁴² Tai heka iny rexiywinymy rỹimyhỹkemy rybe roimyhỹre awedureny kanakreki. Tiubo rehemynykre, teeryõte. ⁴³ Aõma hãbuõ kanakeki heka tiu aõma hãbuõ itxeredumy ronykeki heka, tiu hãbuõ iribi rawasinyõtyhy. ⁴⁴ Bexiywinymy heka wadehemynyna biijemy bonyke, jiarỹ Deuxu Riòre Hãbutyhyhykỹ wahe. ⁴⁵ Ijõ Jesuisi relyyre: —Inyõ tadinodu deòdutyhymy ratxikeki, tii aõmysỹdỹna riwinyhyy rononymyhỹke tamy. Iheto riywinyhyyke. Teòdu mahãdu txuõ txuõlemy riywinymahãke. ⁴⁶ Kia riwinykeki, deysamy rarekre teòdu rehemynykreu. ⁴⁷ Inatyhymy ararybekre: —Kia deòdu tadinodu aõmydỹna ibutumy idi riywinykre, riyrubunykre. Tii ibutu wedu rarekre. ⁴⁸⁻⁴⁹ Ibinamy tahe tii rõhõtinkykeki, kiawesemy riwinykre: Deòdumy raòhòtemyhỹ, lisilemy rononymhỹ, riroximyhỹ momodu mahãdu-wana riõmyhỹ. Tii ixidee rarybekre: —Wawedu kedehemynyõtyhy, aõtxile ariwinykre. ⁵⁰ Iu rehemynyõkremy rõhõtinyreu, iwedu kiaule rehemynykre. ⁵¹ Tai tahe raòhòtebinakre. Heòty bede-ò riteònykre, Iwese itxena mahãdu tii riteònykre wese. Kia-ò rahinykre, robukre, txuraruti rikyikyiny my aõhõkỹmy dỹna

òraru-ki.

25

¹ Jesuisi ijõ relyyre: —Kia txu heka Deuxu Iòlòna ka ijyy wesemy rarekre. Debòwiò ijadòma heka hãbumy herina riraòmyhỹrenyre. Iny sohoji sohoji heka toosòna riwyre iximynamyna. ²⁻⁴ Iruyrelu tahe tõihti reare aõma adỹỹ-di ritỹxinykemy. Ihony tahe tõihti rosare iruyre wasỹ, ijõ tule ihyna-ki riwykemy. ⁵ Weryrybò rehemynyõre, tai tahe ijadòma mahãdu ele rihynomy rỹimyhỹ themynyna riiraòmyhỹrenyre. Iny sohoji sohoji heka toosòna riwyre iximynamyna. ⁶ Tai tahe rarybera: —Tỹmyra mahãdu-ò wahe rehemynyre. Birybenybenyke ruwetya. ⁷ Tai tahe ijadòma mahãdu he riturenomy rỹimyhỹre. Toosò itỹnytyhomy rookemy. ⁸ Kia ijõ tahe tõihti rosare mahãdu tahe uritere riijere. Itoodỹỹmy idi riwisỹnymyhỹ. Aõma widee he rexitònyre: —Urihimykò inihe wahõrõ-kò biditxiwike karihukòtekre. ⁹ Tai tahe kialemy risỹnyre: —Anokõre wadehunale dokuri rỹire. Bikòryke tahe ijõ itxe tahe. Maa. ¹⁰ Idi tahe ròireny iõbradỹỹmy. Tai titxi tai rohonomyhỹreò. Iòrysomy iõbradỹỹmy ròirenyra rookile tahe dehemynyde kia tỹmyra mahãdu wahe. Tahe rironyrenyre ibutumy riroxikemy. Riratòbònyrenyre. ¹¹ Tai tahe kia iruyre ijadòma iõbradỹỹmy rare tahe dehemynyde: —Wahĩ, itxòtòbòna wadeke bidirakynybedenyke! ¹² Tai tahe kialemy rirawyònyre: —Jiarỹ umyreny reeryõre. Kie riki ijyy. ¹³ Tahe Jesuisi rarybere: —Tai kaiboho bexiywinomy ahãbenyke

wadehemynyna biijebery. Teerytenykõte dori tiubo adòòsekre.

14 Tii ijõ rarybere: —Ijõ ijyymy adeeremy arabedeerynykre timybo Deuxu Iòlòna raremy. Inyõ heka rakemy ratximyhÿre ijõ bede-ò ratÿinykemy. Tii tahe taaõmydÿÿnana ririre teòdu mahãdu-ki. 15 Tanieru tahe tamy riwahinyre timykibo isiraõmy nieru ritamyhÿre myheka tamy riwahinyre. Ijõ-ò 5000 riwahinyre. Ijõ-ò 2000 riwahinyre. Ijõ-ò 1000 riwahinyre. Idi tahe tii rare tabede tÿinamy. 16 Kia iruyre ritara heka aõna aõna riõbranymyhÿre. Diwymyhÿre tasÿ idi rohonyrerimy ihÿre. Tai wylemy heka inieru rabuture. Ijõ ixityre iruyremy ritxienyre iratyretyhy. 17 Kia ijõ inatximy tamy riwahinyre tasÿ tulere aõwesele raaõmysÿdÿÿre ta ròtare tule ijõ inatximy ixityre. 18 Kia sohojimy tamy riwahinyre tahe urile riyrubunyre inieru hãloole riare tamy tahe riyrubunyky heka riare. 19 Sõwemy rabededÿÿnana-ribi tahe iwedureny dehemynde. Tahe tamyreny rarariòwyre takõtareny riòbitinykremy. 20 Iruyre riwyre heka debòwiò diwyde: —Beteheiny wawedu ijõ iruyre anieru tyre rebutunyre. 21 Tahe tawedu sõwemy riwowydynyre iaõmysÿdÿÿna wiwihikÿmy ròhònyraki wahe. Kiamy heka tamy rarybere: —Òbitimy idi taaõmysÿdÿÿteki heka. Sõwemy heka adee ariwahinykre riywinykemy. Aõwaxinyhe bitelenykre aõmysÿdÿÿna. Kai heka wawana beysanihikÿkre. 22 Idi tahe kia inatximy ròtaré sÿ dehemynde: —Beteheke, inatxi tasÿ inaubiòwa ixityre adee rewinyra. 23 Tahe iwedu rarybere:

—Awityhymyhe taaõmysÿdÿÿta! Kai heka deòdu wihikÿ Tate. Kai ibutedile sõwemy tewinyte tahe sõwemy ixityre adee ariwahinykre riwahinykemy. Kai heka wawana beysanihikÿkre. ²⁴ Kia sohojimy tamy riwahinyre tahe rarybemyhe retximyhÿ: —Kai heka hãbu nieru tarasaery heka Tate. Aõ taaõmysÿdÿÿteri-ribi aõkõ heka nieru tetamahãte. ²⁵ Tai heka jiarÿ raberumahã alau watzireri. Tai heka rewore iny lau. Tahe tii sohojidile ratzireri. ²⁶ Iwedu rarybere: —Kai heka eoruxerere, awi aõkõ heka Tate! Inyõ tehuòtekõta heka idi urihimyo ityre ròtakelemy wahe. Kai tiwaeryte wahe. ²⁷ Aõherekibo banco-ki aõkõ tetidite. Kia huòteòwy wanieru-ribi ritarerimy ihÿre. ²⁸ Bitabohe kia nieru-di atxitere, tahe kia debòwiò ritaraò wahe biwahinykre. ²⁹ Kia òbitimy raaõmysÿdÿÿra heka sõwetyhymy ròtakre. Kia òbitimy raaõmysÿdÿÿõmyhÿre kia heka ròõnodÿÿkre. ³⁰ Kia deòdu bimybemyke. Tii dorihe ibinatyhyre inihe bedede luruhukÿ-ò idi behubenykre. Tai heka tii aõhõkÿmy rotÿÿnykre rahinykre.

³¹ Jesuisi tahe ikonana rarybere: —Iu jiarÿ, Deuxu Riòre Hãbutyhyhykÿ, arehemynykreu heka Waiòlònary-ò aronykre. Arehemynykre waÿju mahãdu-wana. ³² Ibutumy heka bedede iny mahãdu wako-ki ributunykre. Iwese budoeni itxeredu heka tabudoeni, budòe-wana wiribi rihitxinyhÿre wese heka bedede iny mahãdu wiribi arihitxinykre. ³³ Wabudoeni heka warurunawe-ribi arisÿnykre. Budòe tahe wahywe-ribi arihitxinykre. ³⁴ Idi tahe waruruna

ludu-ò ararybere: –Manake hewa, beysabenyke. Waha Iòlòna-ò rokonykre. Myheka tamy ararybekre. Juhuu bedeu ihetxiu heka ywimy adireny kia rỹimyhỹre. ³⁵ Rama tahe riwasanyreu rỹsỹna wadee tewahinytenyete. Iu bemy rarureu, wadee tewahinytenyete. Jiarỹ heka tori rare asỹ-ò tiwadytenyete. ³⁶ Jiarỹ heka watykyhoho aõkõu, kaibohole wadee tewahinytenyete. Binamy rỹimy rarewãhã, waroramy tadòitenyete ròtenawo-ò. ³⁷ Tai tahe òbiti mahãdu rarybekre: –Wanyrỹ, tiu taheka ramamy heka wadeereny teate –Adee rewahinyrenyere? Tiubo heka bemy tarumy tatemahã adee rewahinyrenyere? ³⁸ Tiubo heka kai torimy tatemahã idi wahetoreny-ò aradyrenyere. Tiubo atykyõmy tatemahã-di, tyky adee rewahinyrenyere. ³⁹ Tiubo ròtena-ki tỹimy tatemahã-ò ada webinadumy tatemahã-ò, aroramy ròirenyere. Wanohõti atxi reaõhyymyhỹre. ⁴⁰ Tai Jesuisi rarybere: –Jiarỹ, Iòlò, tamy ararybekre: –Iu kaiboho waityhydỹdu seriòre mahãdureny-ò waòraru-ki tewinymy toitemahãu, wadeele tuu tewinytenyete. ⁴¹ Idi tahe kia wahywenawe-ribi ludu tamy ararybekre: –Boibenyke karibi kaiboho heka abinarenyere heòty bede-ò ihyymy boibenykre ix-di ariteònykre. Diabo tatytybybinasỹ-ò idi boibenykre. Deuxu isỹ tamy riwinyre. ⁴² Tiu rama riwasareu rỹsỹna kaiboho wadee tewahinytenyõhyyta. Iu bemy rarureu heka ijõ wadee tewahinytenyõhyyte. ⁴³ Torimy rarewahãu, tiu tiwatobinytenyõhyyte. Tykyõ wadee tewahinytenyõhyyte. Binamy rãimy

rarewãhã ròtenawo-ki wororana webinadumy tahe tòiõhyyte. ⁴⁴ Tai tahe kiamy rarybekre: —Wanyrỹ, tiubohe tuu rewinyreny kõre. Wanohõti heka reaõhyymyhỹre aramamy rubuna-txi, abemy rubuna-txi, torimy tatemahãu, atyykõmy tatemahãu, ròtenawo-ki webinadumy tatemahãu wahe. ⁴⁵ Tahe jiarỹ Iòlò tamy ararybekre: —Kaiboho heka waityhydỹdu seriõreõ tewiõhenanyõmahãteny te tai heka tiwawiõhenanytenyõte. ⁴⁶ Tahe Jesuisi ikonanamy rarybere: —Tai tahe tii tiuhyymy rakre heòty bede-ò, aõhõkỹmydỹnana-ò. Òbiti mahãdu heka umytuedeõna-ò rakre.

26

¹ Kia taijyy rahudi tahe Jesuisi taerymahãdu-ò rarybere: ² —Ixityre inatxi txu-di tasỹ aõma Pascoa worana bedehesimy rỹikre. Kaiboho tahe kia teeryteny te. Iu iny riwatyhenykre Deuxu Riõre Hãbu wahe. Irahu-di tahe itxeònihikỹ-ò riwatamadỹnykre. ³ Tahe aõwesele heka xiwena wahidỹdu wedu mahãdu ributunyre heka judeu wedu mahãdu-wana wahe. Kaifa heto wii rotyre. Xiwena wahidỹdu mahãdu wedu wahe. ⁴ Wiwana heka raryberenyre: —Timybohe Jesuisi aõhebo rikisỹnyrenykre aõma teburemy ijiranakõnahakỹle. Timybo rikisiraõnyrenykre, rikimyrenykre, rikirubunyunyrenykre. Urile iny tuu rierykõre. ⁵ Pascoa worana bedehesi rỹireu tahe aõkõlemy idi rỹire. Kia worana bedehesiko-ki iny raaõbinanykeki dori ibutuhukỹlemy heka raaõbinanyke.

6 Jesuisi heka rare Betÿnia hãwã-ò hãbu tykybinaõ-wana heka isÿ-ò rare, Simaõ heto-ò wahe. 7 Iu iheto-ki riroximyhÿreu tahe hãwyyõ tamy rare aderòna lÿnyrehekÿõ-di manaurahyna-ki. Tai tahe Jesuisi tyre ritxiwire, iratityre. 8 Ierydÿÿna mahãdu heka urihimyò heka rebure riòre iòraru-ki. 9 Iòwy nihikÿtyhyre dorihe. Tai heka tanieru uriterehekÿle rahuraki heka tai rawobinamy. Idi rohonykewile heka rare aõma iòwy tahe iny aõkõ mahãdu-ò riwahinykewihikÿle tii røhõtinyre. 10 Tahe Jesuisi rierityhymy aõmybo tuu raryberenyrerimy: –Aõherekibo kaiboho ibinamy tarybetenyteri hãwyy-ò. Aõwidÿÿnana wihikÿ wadee riwinyreri. 11 Aõma kaiboho heka urimynodu mahãdu-wana ihyymy boibekre. Ibutulemy awanareny jiarÿ watxiwãhãde. 12 Tii heka wahãloodÿÿna riwaywinyra aderòna watyre ritxiwireu. Kia tahe wadee riwinyre. 13 Boholake, iny itxi tõhõti reahyy rÿirakre iòraru-ki. Rybewihikÿ Tÿmyramy ritÿnydÿÿmyhÿkre heka rierymyhÿkre bedede bedemy wahe.

14 Iribi tahe Judasi Isariò, tii waò inatxi reuròõ rare, tii heka røhònyre ierydÿÿna mahãduy-ribi. Tahe rare xiwena wahidÿÿdu mahãdu wedu-ò. Tahe tamy rarybere: 15 – Adeereny Jesuisi ariwahikre wana heka tiwesebo biwaòwynybenykre? Kiamy tahe 30 prata womati nieru myhe tamy riwahinyre. 16 Judasi kia ribile rarunymy raremyhÿ dohodÿÿnaõmy Jesuisi tamy riwahinykremy. 17 Pascoa worana bedehesi rÿireule rexidelenyre, Paõ iuridÿÿkõ, kia txu rÿimyhÿ wahe. Jesuisi

erydÿÿna mahãdu tai ritÿÿraxinyre: –Titxiwexe rikirÿsÿkre Pascoa worana bedehesi jiarÿboho dori ariwinyrenykemy? ¹⁸ Tahe Jesuisi rirawyònyre: –Hãbuõ hãwãhãkÿ-ki ratximyhÿre tii riwaeryre. Tahe tamy marybekre: –Wawedu kÿny rarybereri aõma aheto-ki heka Pascoa worana bedehesina rirÿsÿkremy taerydÿÿna mahãdu-wana. Ibededÿÿna dori iòhòre riki. ¹⁹ Tai tahe taerydÿÿna mahãdu kia riwinyre idi kowa worana bedehesi rÿsÿÿna riywinyre.

²⁰ Bedesòmÿ tahe tai riroximy rorukumyhÿreny, taerydÿÿna waò inatxi reurò mahãdu-wana wahe.

²¹ Aõma inyõ heka riwatyhenykremy ratximyhÿre. Jesuisi heka tuu rarybere: ²² –Mowexe tii rarekre. Tiiboho rabadewomy roire, tai tahe widee rarybere: –Jiarÿ kõaõboka. ²³ Tahe Jesuisi rarybere: –Kia wawana pratoro tebò rearerile taheka tiikre. ²⁴ Iwese Deuxu Tyyriti-ki Rybe roire wese heka arurukremy jiarÿ Deuxu Riòre Hãbutyhyhykÿ watxiwãhãre. Kia hãbu riwatyhenykre tahe tamy heka ibinatyhykre. Ratybienykõre wana inihe awityhyre. ²⁵ Tai tahe Judasi ityhedÿÿdu rarybere: –Erydÿÿdu, jiarÿ aõbohe rare? Tahe Jesuisi tamy rarybere: –Kaityhy wahe tate. Kaile tarybeta.

²⁶ Tai tahe Jesuisi orotxu sohojiõ rimyre ibutumy riroxireu, tahe riyreyrenymyhÿre tahe insohoji sohoji-ò riwahinyre. Tai tahe tamy Jesuisi rarybere: –Kia biybenyke heka. Waumy wese heka kia ratxireri. ²⁷⁻²⁸ Idi vÿi monahynaõ rimymy rexitòenyre Deuxu-ò. Idi tahe tamy riwahinyre iribi sohoji sohoji riõrenykemy. –Biõrenyke kaa dori wahãlubu wesemy ratxireri. Tai sõwemy iny

biu-ò rahenykre Deuxu dee. Ibutumy òraruna ixãwididỹmy heka tuu ròhònyra. Wahãlubu heka Deuxu, iny-wana wii riwoàxinykre rare. ²⁹ Tahe boholake warybe-ò. Awanareny heka ixityre vïï monamy ariõõtyhy. Kia Waha Iòlòna-ò dehemyny-nahykyle tahe awanareny ixbyby tuu ariõkre.

³⁰ Idi tahe wiuõ rawiunyrenyre idi tahe Oliveira hãwãlò-ò ròrenyre.

³¹ Jesuisi tamyreny rarybere: –Wijiru heka ibutumy kaiboho biwaribenykre. Tyyriti-ki heka roire kiawesemy:

Budoeni-di itxeredu rirubunykre. Ibutumy bu-
doeni raubỹtỹkre bede bedemy.

³² –Waixixana kỹnyikreu tahe Kalileia bede-ki awanareny aratxikre. ³³ Pedro tahe rarybere: –Ibutumy ararirenykre wana tahe jiarỹ aõkõre. Ararirenyõtyhy. ³⁴ Tai Jesuisi heka Pedro-ò rarybere: –Kai heka hãnie dele robukõdile biwatxiõ-ribi bexihukre, inataõmy wahe. Tuu wijiru rarekre. ³⁵ Pedro dirawyònyde: –Aõkõre wa, arurukre heka tahe urile aratxiõnyõtyhy. Tule ibutumy ijõ ierydỹna tule Pedro wesele rarybere.

³⁶ Tahe Jesuisi ridyrenyre bederaty oworuõ-ò, aõma Kesemani ninadu-ò ridyre: –Kakile bonykre arakre dori ixitòedỹmy kowa-ò.

³⁷ Tahe Jesuisi heka Pedro ridyre ixi-wana. Tule Zebedeu riòre wiwana ridyrenyre. Tahe Jesuisi rabedeòtiidỹre aõhõkỹmy rotỹnyre bedeòtiidỹ òrarukile. ³⁸ Tii tahe tamy rarybere: –Kaki wawanale atxibekre. Watyytyby heka tỹxihikỹlemy bedeòtiidỹ-di ratxireri. Waki bexiebekre. ³⁹ Urile tahe tako-ò rariareu tahe

resere bede-ò. Jesuisi tahe tyby-ò rarybere: — Waha, rubu mona waribi bitake adeewikeki. Aõkõkeki tahe ariõkre, arurukre adeewilemy aõhebo arotỹnykre. ⁴⁰ Idi tahe dòõsede kia ierydỹna inataõ tai rõrõmyhõ heka ixyby dòõsemy nade. Jesuisi rarybere: —Pedro! Kai heka timy sohoji horamy adi bede rỹiõtyhy wawana. ⁴¹ Bexixaruhyy atxibeke bexitõenymy. Aõkõkeki tahe õraruna kanamykre. Kai heka õbitimy matxikemy tahõtinymahãte. Aumy tahe ibinare heka arurukõre wahe. ⁴² Ixityre rare rexitõenykemy. Tahe Jesuisi rarybere: —Waha, adeewinale ariwinykre. Aõhõkỹmydỹnana monamy heka ariõkre. Kia mona waribi bitaõkeki ihãrele heka arurukre. ⁴³ Tai dòõsede tai rõrõmyhõrenyõle heka nade. Tiiboho ixixamy rỹiõhyre. ⁴⁴ Tahe ròõsere ixybyle ikonanamy. Iweselemy rexitõenyre tyby-ò. ⁴⁵⁻⁴⁶ Idi tahe dòõsede taerydỹna mahãdu-ò rarybere: —Bexielehynybeny. Watyhedyỹdu naderi. Rexihumyhe rare. Hãbubina mahãdu rehemynyre. Jiarỹ Deuxu Riõre Hãbutyhyhykỹ, wahe. Bexixabeny, rakakre watyhedyỹdu dori rehemynreri.

⁴⁷ Tahe Judasi dehemynyde waõinatxi reurõõ wahe. Jesuisi rarybereu, tii nade sõwemy hãbu-di mayrehe-di, õhõte-di tõnori-di widotyde. Judeu mahãdu wedu tahe iteòdỹdure xiwena wahidỹdu wedu wana wahe. ⁴⁸ Juhuu Judasi tamyreny bederiywinyre. Kamy rexirybenymy: —Iõsỹny-õ aruwokrele heka tiikre. Tiile bimynykre. ⁴⁹ Tahe Judasi rarybere: —Rareri, Wawedu. Iõsỹny-õ ruwore. ⁵⁰ Tahe Jesuisi rarybere Judasi-ò: —Iò,

aõwaxiny aõbo biwinykre iwidỹỹmy tateri. Tahe Jesuisi imahãdu rimyre. Ritaataare. ⁵¹ Tahe Jesuisi mahãduõ mayrehe-di rimymy resere. Tai hãbuõ-ò reare. Tai tahe tõhõtyle rikòròmý idi reare, xiwena wahidỹỹdu wedu deòduõ wahe. ⁵² Tahe Jesuisi tamy rarybere. Aõkõre amayrehe birutyke irasirahanawomy. Kia dori inyõ maydese rimymy resekre heka tule rurukre maydeselemy. ⁵³ Karibi ixitarasamy arurukeki dori wahaòle ararybekre. Tai tahe waha sõwemy ýju kiditeònyke, 12 aõbinadu ijoi mahãdu wahe. Kia teeryõtenyete. ⁵⁴ Ihãrele tahe ibutumy tuu bededỹỹnana relekre iwese ritidỹỹna-ki roimyhỹre wese. ⁵⁵ Tahe Jesuisi rỹỹraxire tamyreny: — Aõbo jiarỹ raremy wadi tahõtinytenyteri. Wasidu aõbo. Kai dori waòrysomy themynyte maydese-di, tõnori-di. Aõherekibo wahe. Jiarỹ heka arabe-deerynyrenyre txuõ txuõlemy wahe Deuxu dohodỹỹna heto-ki. Aõherekibo taile tiwamytenykõte kowa watxiwãhãure. ⁵⁶ Kia ibutumy Deuxu Ritidỹỹna-ki roimyhỹre. Tai tahe tuu bededỹỹnana relekre iwese Deuxu rybedu mahãdu rarybere. Ibutumy aõna aõnamy rotỹỹnymy raremyhỹ. Tai tahe taryberahu-di. Ibutumy iery mahãdu iribi tahe robýtỹre.

⁵⁷ Tiiboho heka Jesuisi ridyrenyre Kaifa heto-ò, xiwena wahidỹỹdu wedu wahe. Tai ibutumy judeu mahãdu wedu ributunyre bede ywina erydu mahãdu tule wahe. ⁵⁸ Pedro irehetyty-ribi riheludunyre. Iheto ube-ki tahe ronyre yrubu dỹỹdu-wana. Tahe rehere aõhebo rotỹỹnykremy. ⁵⁹ Xiwena dinodu mahãdu tahe ributunyre

Jesuisimy raruikremy heka riijemy. Aõma rirubunykre òbirele heka tuu rarybemyhỹ. ⁶⁰ Tahe inyõ-ki heka rahaõhyyre turybedu wahe. Iny sõwemy tahe relyyre. Ihãrele rirubunyõhyyre. Iroona-ribi tahe inatxi hãbu dehemynde.

⁶¹ Tai tahe kiamyhe tuu relyyre: –Aõma Jesuisi rarybere: –Aõwesele heka Deuxu dohodỹỹna heto ariatymy idi areake. Inataõ txudi tasỹ ixityre aditamadyỹke, ibutumy adiwinyke. ⁶² Tai tahe xiwena dinodu heka Jesuisi-ò ryyraxire: –Aõbo marybekre kia umy ijyy rohonyreriki? ⁶³ Jesuisi tahe rybeõlemy ronyre roholare. Ixityre tamy rỹỹraxire: –Kai heka inatyhy tyhymy Deuxu Riõremy kai atximahãte. Mesia aõbohe kai tate? Deuxu riwaeryre inatyhymy rarybereri. ⁶⁴ Jesuisi dirawyõnyde tamy: –Kaile kia tarybete. Ibutumy iny-ò ararybekre: –Kaiboho ibutumy bobibenykre

Deuxu Riõre Hãbutyhyhykỹmy, jiarỹle wahe. Tii heka Deuxu rurunawe-ribi heka ronykre. Iribi tahe kanakre biuwetyky-ki. Jiarỹle wahe tiire.

⁶⁵ Tai tahe xiwena dinodu tatyky riykare. Reburere kie: –Aõhere tahaka. Deuxumy heka ibi-natyhylemy tarybemahãte. Ijõ iny-ò aroholaõkre, rexihura! ⁶⁶ Ibutumy kaiboho irybe-ò taholatenyteri, inatyhy? Aõbo rikiwinykre tii ibinatyhyre dori, rikirubunyrenykre tahe. ⁶⁷ Tahe iõsỹny-ò rarybexinyre. Rihetenyre. ⁶⁸ Tamy ihetedỹỹdu rarybere: –Marybeke Kristu, mobo arahetenyra inihe.

⁶⁹ Pedro tahe ube-ki rononymyhỹ. Tahe ijadõma heka deõduõ tamy rehemynyre: –Kai anõbo

Jesuisi Kalileia ludu-wana atximahã. Kumymy rabire. ⁷⁰ Iny ibutuko Pedro rarybere: —Aõkõre, aõmybo arybe reeryõhykyreri. ⁷¹ Tai tahe rare ijò-ò. Ijõ ijadòma deòduõ rarybere kamahãduko: —Inatyhymy heka tiki Jesuisi Nazareludu mahãduno tiki rare. ⁷² Ixityrele Pedro ritxiõnyre: —Reerykõre wahe hãbu. Tiu heka rabiõwãhãre. Inatyhy rare. ⁷³ Idi hãbuõ heka narybede tamy: —Inatyhy rare. Kakỹny irybe weselemy tarybeteri, Kalileia rybe wahe. ⁷⁴ Tahe Pedro rarybere: —Jiarỹ reerykõreri, tuu heka rabiõwãhãre. Deuxu riwaeryre inatyhymy rarybereri. Iule taheka hãnie hãbu robummy reare. ⁷⁵ Tahe Pedro tõhõti itxi reare. Jesuisi rarybere weselemy heka tii riwinyra. Ritxiõnyre. Tai tahe Pedro ròhònymy reare heka rahinyhyre.

27

¹ Ijõ biurasò ruidile tahe rỹire. Xiwena wahidỹỹdu wedu ributunyre judeu mahãdu wedu-wana. Timywexe aõhe rikisỹnyrenykre. Rikirubunyrenykemy heka idi watxiwãhãre.

² Roma dinodu-ò òsana rikidyrenykre. Tahe tiiboho Jesuisi ritaataare idi ridyrenyre tamy, Pilato-ò.

³ Judasi heka rieryre. Tai tahe tii rabadewonihikỹre rityhenyreki wahe. Tai tahe raraykynyre tawo-ò raòhòrere. Tahe nieru òkesedỹỹmy idi ròhõtynyre. Tahe nieru diwyde, 30 prata womati nieru tahe riòkesedỹỹnykremy judeu wedu mahãdu-ò, Xiwena wahidỹỹdu mahãdu-ò. ⁴ Tahe Judasi rarybere: —Ixãwirahe, jiarỹ raòrarunyra hãbu òbitityhymy ratximyhỹrele

retyhenyre heka. Tahe judeu mahãdu dinodu rarybere: —Jiarÿboho, kia aõ aõkõ rare. ⁵ Tahe Judasi nieru-di bedetyrele rihure. Tahe röhõnyre iribi. Tahe rare. Rerotihikÿ-di rexibõtõtaare. Rexirubunyre. ⁶ Tai tahe xiwena wahidÿÿdu wedu riwyre nieru bede-ribi: — Aõwexe kanieru rikiwinyrenykre? Dohodÿÿna hetowo-ò rikirutyrenyke heka aõkõre. Aõma dori rare rubuõwymy iwahidÿÿ heka rare. ⁷ Urile suõle rikiwyrenykre idi. Tai tamy wabede rikiwinyrenykre. Aõma tori kaki rurukreu tahe rikitoonyrenykre tamyle wahe. Tai tahe tiiboho riwyrenyre aõma butxi widÿÿna subede heka riwinyrenyre. Kia heka inire suni wahe. ⁸ Kia bedero tahe rininire aõma Hãlubu Bederomy heka rininire. Wiji tule ini rare. ⁹⁻¹⁰ Iwese Jeremia tyyriti-ki roire wesele heka tii riwinyre:

Tahe 30 —Womati nieruõ-di heka bedero riwyre butxiwidÿÿdu-ribi. Iwese kai riwateõnyre wese. Kia iõwy rare judeu mahãdu-ò tamy riwahinyre wahe. Txiõdÿÿna õwy wahe.

¹¹ Jesuisi heka Pilato, bede dinodusÿ-ki ratximyhÿ. Pilato tahe tamy rÿÿraxire: —Kai aõbo judeu mahãdu iòlò atxiteri? Jesuisi dirawyõnyde: — Kai tuu tarybeta. ¹² Xiwena wahidÿÿdu wedu heka tamy rarybere: —Jesuisi rirawyõnyõhyyre. Judeu mahãdu wedu-ò tule rirawyõnyõre. ¹³ Pilato tahe tamy rarybere: —Kai aõbohe rybe-ò taholate. ¹⁴ Tule tamy Jesuisi dirawyõnyõhyide. Byy! Urile Pilato ribedeõtidiÿÿnyre. ¹⁵ Pascoa worana bedehesi bededÿÿnana tikiemy tuure. Rõtenawo-ribi heka sohoji beõra beõrahyyle

ixinamy inyõ rexideònymyhỹ, inysõwe rybe òraru-ki wahe. ¹⁶ Kia beòra tahe hãbu ibinatytyre ròtenawo-ki rỹire. Baraba inire. Ibutumy iny tuu rieryre. ¹⁷ Aõma Pascoa worana bedehesi rỹireu ibutumy iny ributumy. Tahe Pilato ritỹĩraxinyre: –Tibohe ixinamy ariteònykre Jesuisi Kristu aõbo ada Baraba aõbo? ¹⁸ Tahe iny heka ibutumy urile Jesuisi Kristu luure heka. Tai tahe judeu dohodỹĩdu wedu mahãdu tahe aõkõ tamy waritimy rityhenyreny. Pilato kia rieryre. ¹⁹ Iu tabede ywina dohodỹĩna-ki Pilato rỹireu, ihãwyy tamy tyyriti riwahinyre. Kawese heka rarybere aõma: –Ixinamy Jesuisi bitekònykre. Anobinatytymybo dokuri rarasino txu wadi reakareri. Jikarỹ anohõkỹmy dỹkỹnana sõwemy ratỹkỹnyre Jesuisi kòraru-ki wahe. ²⁰ Iny sõwehekỹ-ò heka xiwena wahidỹĩdu mahãdu wedu rarybere: –Kaiboho mararybebenyke: –Baraba ixinamy bitekònykre. Tiiboho dirawyònyde: –Jesuisi birubunykre. ²¹ Iribi Pilato rarybere: –Tiwexe ixinamy ariteònykre? Tiiboho dirawyònyde: –Baraba bitekònykre. ²² Pilato tahe rỹĩraxire: –Aõhebo tahe arotỹĩnykre Jesuisi-di, Kristu-di? –Itxeò nihikỹ-ki bitamadỹĩnykre. Birubunykre. ²³ Pilato tamy rỹĩraxire: –Aõbinahakỹ aõbo riwinyraki? Tai tahe ibutumy iny rirajuamy rỹimyhỹ: –Birubunyke kia bitamadỹĩnykre. ²⁴ Pilato iny sõwe-di aõ riwinyõhyre aõbinatyhy òsana ròhònykremy idi ròhòtinyre, tai tahe inyõ rarybere: –Bee kidiwykremy baciaro-ki. Tahe tebò risuhore iny sõwehekỹko-ki. Tamy rarybere: –Jiarỹ kỹny

waòraru-ki aõkõ heka rurukre. Kaiboho heka irubudỹỹ erydumyhe boibekre. ²⁵ Tahe ibutumy iny rarybere: –Awire, inyboho heka irubudỹỹdu erydumy rokoirekre, tule wariòrereny òraru-ki wahe ihãlubu rejuxunykre. Soldado ridyre itxeò nihikỹ-ò ritamadỹỹnykremy rirubunykremy. ²⁶ Tai tahe Pilato heka Baraba riteònyre ixinalemy. Iribi tahe Jesusimy raòhòtere.

²⁷ Pilato soldado mahãdu urile idi juhu risinyre, soldado tyamy ritidire. Pilato heto-ò ridyre. ²⁸ Ityky iribi ritare tahe aõma tykysò-di ritidire heka juhu rihetyntyre. ²⁹ Iòdỹỹmy tahe idi ede lòrilòrihikỹ irati-ò ridekremy. Òwòruõ tebò-ò ritidire. Tai iko-ò resere tatiowotimy. Raryberenyre: –Awire, kai judeu Iòlòtyhy. ³⁰ Ityre rarybexinyre. Òwòru rinyre tahe iratimy tuu raòhòtere. ³¹ Iribi ritarenyreny ihõrõ itykyle ixityre rirutyre ityre-ki. Idi tahe ryò ròirenyre.

³² Iu ròhònyreu, hãbuõ Sireni bedede luduõ-wana witxi reare. Tamyhe rarybere Jesuisi itxeò riwykemy.

³³ Tahe Kòkòta hãwãlò-ò rehemynyre. Aõma, rubu ratityby wesemy heka rare. Tai tahe Kòkòtamy heka rininimyhỹreny.

³⁴ Tii vỹ riurinyre bee ihyra-wana, idi tahe Jesuisi-ò kia riwahinyre.

Iurihi-di teramy reare.

³⁵ Tahe itxeò nihikỹ-ki ritamadỹỹnyre. Irahu-di tahe

ityy heka ritxuatxuaenyre wimy rarudeòsanyre tibo iwydydukemy.

³⁶ Idi tahe retehemy rorukumyhỹrenyre. ³⁷ Irati tyre-ki tahe ritidỹnaõ roire:

—Kia Heka Jesuisi Rare, judeu Iòlò Mahādu.

³⁸ Tule wasidu brebunahakỹ tii-wana ritamadỹnyrenyre itxeò hòkỹ-ki, ijõ iruru-ribi, ijõ ihywe-ribi. ³⁹ Iny ibire-di reamyhỹ idi risinymyhỹ kamy rexyrybenymy: ⁴⁰ —Kai inihe bexitake, kai Deuxu Riòre tateki. Bodobeheke itxeò nihikỹ-ribi.

⁴¹ Kai heka arurudiremy iximy tarybemahāte. Dohodỹna biatykemy heka iximy tarybete tahe inataõtxu-di heka biwinykemy tarybeta. Tule xiwena wahidỹdu wedu mahādu idi risinyre. Tii tahe rarybere: ⁴² —Tii heka iny iwitxira witxira aõbina bina-ribi ritamyhỹre ihāre tahe taaõbina bina-ribi rexitaõtyhy. Tii heka aõ judeu mahādu iòlò aõkõ rare. Myheka tuu rarybemyhỹ. Kia itxeòhòkỹ-ribi kedexiberesedỹnykekile tahe rikityhynyrenykre inatyhymy. ⁴³ Tii heka iximy rarybemyhỹre Deuxu Riòre raremy, Deuxu rityhynymyhỹremy. Reketeherenykre inihe aõbo Deuxu riwiòhenanykremy wahe. ⁴⁴ Wasidu mahādu kia itxeò nihikỹ rỹire iwesele heka tamy rarybere.

⁴⁵ Txutyeyu tahe bedede luruhukỹ bedede reare, txi-oro tirehehekỹule bedede kamy reare. ⁴⁶ Kiaule tahe bedede ratỹnyre Jesuisi iu ryyryre:

—Eli Eli Lema Sabatani.

Kiamyhe rarybere:

—WaDeuxu, WaDeuxu, aõherekibo waribi õhõti rosare?

⁴⁷ Tai tahe iny sõwe mahādu irybe-ò doholade. Ijõ kiamy narybede: —Eliasi-ò hòwa ryyryeri.

⁴⁸ Kia ele elemy riwinyre noseõ. Idi tahe vỹõ riryry tamy idi riteònyre. Teòrehemy riwinyre

bemy rimonykremy. ⁴⁹ Ijõhe raryberenyre: — Txiokre inihe inatyhymy aõbo reketeherenykre inatyhymy aõbo Eliasi iwiõhenadỹỹmy kanakremy aõbo inihe. ⁵⁰ Jesuisi ixityre rirajuare. Rurure. ⁵¹ Kia dohodỹỹna heto-ki heka ixiwõtenaõ rỹimyhỹre ierykõna. Tahe urile idi ixiwanale ruamy reare iratyre-ribi bede-ò. Suuhe ramytatare. Mana rabòhòbòhònyre. ⁵² Wabede hãlooõ heka riraynyre. Deuxu hõrõ mahãdu sõwemy rubu-ribi rixixanyre. ⁵³ Wabede-ribi ròhònyrenyre. Iu Jesuisi rubu-ribi riixixareu tahe Jerusalẽ-ò ròirenyre. Tai tahe sõwemyhe iny tuu robire. ⁵⁴ Tai heka soldado dinoduõ ratximyhỹ idi retehemy. Tule soldado mahãduõ tii-wana ratximyhỹre. Ibutumy tuu robirenyre. Tai tahe tabrebu-ribi narybedenyde: — Tii inatyhymy Deuxu Riòre heka rare. ⁵⁵ Hãwyyõ tule retehemy ratximyhỹre irehe-ribi idi. Aõma hãwyy Jesuisi riwiõhenanymy raremyhỹ heka idi retehemyhỹre. Tiiboho Kalileia bede-ribi doide. ⁵⁶ Marie Madalena, Marie Txiause Jyjese, Zebedeu riòrese tule tai ratximyhỹ.

⁵⁷ Bedesòmymy Jyje rehemyre. Tii ityhy heka rare Arimatea hãwã luduõ ratximyhỹre. Tii Jesuisi tyhydỹỹduõ ratximyhỹ. ⁵⁸ Tai Jesuisi umy rexitòenyre Pilato-ribi. Tai tahe Pilato rarybere: —Tamy biwahinykre. ⁵⁹⁻⁶⁰ Tahe Jyje linho tyky rirahananymy. Tai tahe aõma wabede tỹmyrahakỹ riamy roireriò heka rituunykremy idi rara. Idi mana nihikỹ ritidire txiò. Idi ròirenyre. ⁶¹ Marie Madalena ijõ Marie-wana taile retehemy ronyre wabede-ki.

⁶² Ijõ txu tahe fariseu mahãdu wedu tule xiwena wahidỹỹdu wedu heka Pilato-ò sexta feira rahudi

tahe, judeu mahãdu elehyna txu wahe ituere. ⁶³ — Jesuisi irumy raremyhỹu tii rarybere:

—Rubu-ribi heka ariixixanykre inataõ txu-di.

⁶⁴ Ruimy rare tahe ihãrele tahe biyrubunyke iwabede. Aõkõkre-wana tahe ierydỹỹna mahãdu heka iumy riwykre. Tai tahe rarybere: —Tii rexiixixanyre. Tai tahe ibutu rityhynykre iru-ina. Kia ibinatyhymy rarekre. ⁶⁵ Tai tahe Pilato riteõnyre soldado mahãduõ txiò-ki. Tamy rarybere: —Awimy biyrubunyke! ⁶⁶ Kia bede erynaõ heka tamy ritidire. Txiò-ribi resekreule heka rieryrenykre. Tahe soldado mahãdu riyrubunymyhỹre.

28

¹ Ijõ txu rudile tahe Marie Madalena, Marieõ-wana rare ihãloona-ò itxeremy, domingo, nobiutxu wahe. ² Aõwesele tahe iu suu ramytatare. Wanyrỹ ỹju heka dobehede biu-ribi iu. Tahe hãloo ijõ-ribi mana ritamy ityre ronyre. ³ Iõsỹny heka urile ritoosõnyhỹkỹre. Ityky tasỹ iurahakỹre. ⁴ Idi itxeredu mahãdu heka aõma ruberunihikỹrenyre. Urile rõhõtiberemy reserenyre. ⁵ Ỹju rarybere hãwyy-ò: —Uritere berebuõmyrenyke. Kai aõbo Jesuisi teijeteri, inatyhy? Aõma itxeò ritamadỹỹnyrenyre wahe. Reeryre kia. ⁶ Aõkõre kaki aõkõ heka ratxireri. Tii dori rubu-ribi rexiixixanyre iwese tii iximy rarybere wese wahe. Beteheke inihe iherina tyby-ò tai juhu roimyhỹò. ⁷ Make karibi ele elemy ierydỹỹnako belyykre tii rubu-ribi rexiixixanyraki. Tii heka rara Kalileia-ò tamy wirotyreriò. Matahe, relyyra dorihe adeereny.

⁸ Tai tahe rakòrunyrenyrene, hãwyyboho. Ruberumy ròirenyre tasỹ reysamy ròirenyre. Ierydỹña mahãdu-ò heka riijemyhỹre aõma ÿju rybemy ikoreny relyykemy. ⁹ Iu rakòrunyrenyraule tahe wii reòbynyra. Jesuisiwanale heka itxi rekoare. Idi tamy rehemynyre iòhòmy. Iwa rimyrenyrene tahe riwowydynyrene. Jesuisi tamy rarybere: – Toiteri aõbo! ¹⁰ Uritere breburenyõmyke. Boibeny tahe ijyymy waityhydỹñdu mahãdu seriòre-ò heka Kalileia-ò aròirenykemy. Tai tiiboho-wana wii areòbynyrenykemy.

¹¹ Tai tahe tiiboho ròirenyrene. Kiaule tahe wabede soldado itxeredu rehemynyrene xiwena wahidỹñdu wedu-ò wahe. Tahe ibutumy relyyre iko. ¹² Tai tahe nieruõ riwahinyrene ruiõmy relyykemy. ¹³ Tamyreny raryberenyrene: –Ierydỹña mahãdu heka ridyra watỹireny reòbylemy. ¹⁴ Tai tahe bedede dinodu rierykreu heka aõ adee beleõtyhy aõbinahakỹõ. ¹⁵ Tai tahe nieru sòwemy riwyrenymy tahe tuu ròirenyrene ruimy. Wiji dori tuu ijyy rỹira. Ibutumy judeu mahãdu kia rybe-ò rityhynymyhỹre.

¹⁶ Idi tahe ierydỹña mahãdu ròirenyrene Kalileia-ò. Tiobo Jesuisi riteõnyrenyremy juhutyhy. ¹⁷ Jesuisimy robirenyreure tahe tiiboho bedede-ò reserenyrene tahe riwowydynyrenyrene. Ijõ mahãduõ riseõnylemy idi rõhõtynymyhỹre. ¹⁸ Tai tahe Jesuisi iòhòtyhymy tamyreny relere kiamy tamy rarybere: –Waruruna heka ibutu ratyre ratximyhỹre kabede-ki tule, biu-ki tule. ¹⁹ Tai kaiboho waha deòdumy boibenyke ibutumy iny bedede mahãdu-ò, bedede bedede

konananahakỹ mahãdu-ò ihyy behemynybenyke.
Waityhydỹỹdumy heka bitxienybenyke.
Wahanimy, tule Deuxu Riòrenimy, tule Deuxu
Tyytybytyhynimy, tahe bòratisebedỹỹnybenyke
wadeòdurenymy, Waha, Ityytybytyhy, Iriòre
kaboho deròwymy wahe. ²⁰Ibutumy aõbo wabede
ywina adee rewahinyredi bibedeerykre. Uritere
nohõti losarenyõmy awanarenyhy dori ararekre
bededỹỹnanahyy rekehemynykre.

Deuxu Rybe Tyyriti **New Testament in Karajá (BR:kpj:Karajá)**

copyright © 2011 Wycliffe Bible Translators, Inc.

Language: Karajá

Translation by: Wycliffe Bible Translators, Inc.

Karajá [kpj], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Karajá

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

PDF generated using Haiola and XeLaTeX on 21 Feb 2024 from source files
dated 29 Jan 2022

55ce0bcd-101e-52a3-984e-847027efe150